

**SIXTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

**FOR EIGHTH SITTING ON MONDAY, THE 18th JULY, 2011
(Time 10:30 AM to 1:00 PM and 2:00 PM to 4:00 PM)**

OBITUARY

1. ***Pu LAL THANHAWLA***, Chief Minister to make reference on the demise of Pu H. Vanlalauva, former Minister, Government of Mizoram.

QUESTIONS

2. *Questions* entered in separate list to be asked and oral answers given.

LAYING OF PAPERS

3. **Pu H. LIANSILOVA**, Minister to lay on the Table of the House a copy each of the following.
 - a) Report of the Examiner of Local Fund Accounts on the Accounts of the Local Bodies for the year ended 31st March, 2011.
 - b) Statement of six monthly review of the Finance Minister on the Fiscal position of the Government of Mizoram for the second half of 2009-2010 (October 2009-March, 2010).

FINANCIAL BUSINESS

**GENERAL DISCUSSION ON THE BUDGET FOR THE YEAR
2011-2012.**

4. General Discussion on the Budget for the year 2011-2012 (to commence).

NGURTHANZUALA
Secretary

.....

SPEAKER : Mi chung a khawngaihna nei lo chu khawngaihna tel lovin rorel sakin a awm ang ; khawngaihna hi rorelna aiin a chungnung zawk a ni. (Jakoba 2: 13) Sunna hun kan lo hmang anga, Obituary, hei tun hnai maiah kan ex- MLA te pathumin min boral san a. Former Minister zahawm tak Pu H.Vanlalauvan min lo boral san thut mai hi a paw hle a, hemi chungchang Obituary hun hmang turin kan House Leader zahawm tak Pu Lal Thanhawla Chief Minister i lo sawm ang.

Pu LAL THANHAWLA, CHIEF MINISTER : Pu Speaker, tun hun a Pu H.Vanlalauva, former Minister sunna thusawi a ngai thut mai hi paw ka ti hle a, a chanchin tlangpui han sawi hmasa ila, hetiang hi a ni. Pu H.Vanlalauva ex-Minister, 15th July, 2011 chawhma dar 11:50 khan chuap cancer avangin a boral a, kum 72 a upa a ni. Pu H. Vanlalauva hi Upa Sangkhuma (L) leh Pi Lalthangi (L) te fa 8 zinga 2-na a ni a. 1stJuly,1939 khan Kamliana khua Phulpuiah a pianga, kum 1960 January khan Aizawlah an rawn pem a, Chhinga Vengah awmhmun bengbelin tun thlengin he vengah hian an la awm ta a ni. Kum 1976 ah Pi C.Lalhmingmawii nen inneiin fapa 6 leh fanu 4 an nei a. Zirna lamah chuan Middle School thleng a zir a, amah hi mi taima tak mai, thawh hreh nei miah lo, dawr te kaiin, la dum lampangah te ei a zawnga, vawiin thlengin, a thih thlengin a ei zawna ber chu dawrkai a ni. Pu H. Vanlalauva hi MNF a din atangin tel ve nghalin hruaitu pawimawh tak pakhat a ni chho a, MNF rammu zingah tel vein 7th July,1966 khan ram buai vangin man a ni a. India ram State hrang hrangah Jailah kum li a tang a,Varanasi jail, U.P. atangin kum 1970 khan chhuah a ni a, ram leh hnam tan hian hun hrehawm tam tak alo paltlang tawh a ni. Jail atanga alo chhuah hnu kum 1970 - `86 inkarah wavi 11 lai man a tawh a, remna thu MNF leh India sorkarin inbiakna tan a nih lai khan MNF in Public Relations Officer-ah an hmang a, a hnuah Emissary for Peace-ah dah leh a ni. Kum 1998 MLA Election-ah Aizawl East – II atangin thlan tlin niin Minister of State-ah lakluh a ni a. Kum 2000-ah Cabinet Minister-ah lakluh a ni leh a, kum 2003 MLA inthlanah a bial ngai atangin thlan tlin a ni leh a, Cabinet Minister-ah bawh a awm a, kum 10 Minister a nih chhungin department hrang hrang Rural Development, Local Administration Department, District Council Affairs, Prison & Fisheries Department- te a enkawl a, a boral ni thleng hian MNF Hqrs-ah hruaitu niin adviser nilai a ni. Pu H. Vanlalauva hi khawtlang leh ram tana mi thahnemngai tak a ni a, Chhinga Veng leh Saron Veng V/C khata ala awm lai kum 1963 khan V/C a thlan a ni. Chhinga Vengah V/C member leh V/C Secretary hnate a lo chelh tawh thin a, Chhinga Veng Primary School, Middle School leh KVM High School-ah te Board of Chairman a lo ni ve thin bawh. Tin, Chhinga Veng Branch YMA-ah Senior Adviser-in hun rei tak hun a lo hmang tawh bawh a, State Level Society Mizoram Apex Handloom & Handicraft Co-Operative Society Ltd., MAMCO-ah Board Chairman nihna a zawnin term li (4) lai a lo chelh tawh bawh a ni.

Pu Auva hi Kohhran rawngbawlna lamah pawh theihtawp a inhmang thin a ni a, kum 1958-ah Phulpui Presbyterian kohhranah naupang Sunday School zirtirtuah a awm a, Pathian thuhriin khaw hrang hrangah a kal kual thin a, kum 1960-ah Chhinga Veng Presbyterian Kohhran dintute zingah telin Kohhran Secretary hmasa ber, Music Committee Chairman hmasa ber, KTP Leader hmasa ber leh Tual Upa hmasa ber pali (4) zinga mi a ni.

Kum 1972 – 1973 khan Dawrpui Pastor Bial KTP Committee Member-ah telin kum 1975 ah Dawrpui Pastor Bial KTP Secretary rawngbawlna a chelh a ni.

A boral ni thlengin Chhinga Veng Presbyterian Kohhran Thuhrlitu, Puitling Sunday School zirtirtu, inkhawm zai hruaitu leh kohhran peng hrang hrang Committee Member ni lai mek a ni.

Pu H. Vanlalauva hian zunthlum a neih avangin kum 2006 vel atangin a inenkawl tan a, kum 2009 May thla laihawl khan a nak veilam a rawn vung a, Doctor thurawn angin ni 23rd July, 2009 khan AMRI Hospital, Kolkata panpui a ni. Hetah hian chuap cancer a ni tih hmuhchhuah a ni a, ni 14th Aug., 2009 khan a chuap cancer chu Kokilaben Dhirubai Ambani Hospital, Mumbai-ah zai a ni a, a natna avang hian phaiah vawi engemawzat kalpui a ni. A natna chuap cancer bakah zunthlum leh thawhah nen a inkawp baw avangin enkawl thiam pawh a har hle a, mahse amah hi a pachan em avangin tuarchhel tak a ni a, enkawl hrehawm lutukin a awm ngai lo a ni. In lamah theihtawp chhuaha enkawl reng a ni a, ni 12th July, 2011 khan a natna hian zual lam a pan deuh a, heta tang hian a natna hian zual lam pan zelin ni 15th July, 2011 dar 11:15 A.M. khan a rawng a bawl sak thin a Lalpa hnenah min kalsan ta a ni.

Pu Speaker, Mizoramin hetiang mi pawimawh tak, khawtlang leh ram tana mi thahnemngai tak kan lo chan ta hi kan ui takzet a, Pu Auva hi mimal takin kan inhre tha hle a, tin, a nupuite chhungkua hi Chhinga Veng mihlun an ni a, Pi Bah-i tih chuan Zoram pumpuiaah rawng dum lama mi hmasa a ni tih hriat vek a ni a, chumite chhungkua ami chu a ni a, a nupui hi. Mimal tak pawhin tette atanga inhre chho kan ni a, mi chhungkaw ziktluak tak an ni. Tin, Pu Auva hi amah nen pawh anmahni khuaah pawh kan kal dun tawh thin a, tin, Public Relations Officer-a an dah lai hian rambuai thim chhah lai a ni a, chung hunah chuan miharsate, entirnan, sipaiin an pawng man mai maite kha tam tak an awm a, chung lai chuan Congress kan lo din tawh a, kan tanpui thin a.

Tin, Emissary for Peace an nih pawh hian an tangkai hle a, hun engemaw laiah kha chuan special force-te kha an hrang em em a, bomb puak a lo awm hlek te khan man tura zawn hmasak an ni thin a, Pu Aichhinga nen hian. A chang chuan a hmingin kei kha Pradesh Congress President-te ka lo nih tawh avangin Police-ten kan in kha an tih ve deuh te pawh a ni ang, rawn tawm changte an nei thin a. Chutiang chuan kan lo thawk ho hrep tawh a. Tin, MNF ten Headquarters atangin pawimawha an rawn tirh chang te hian kan lo humin khawi khawiah emaw kan lo thukru a. Tin, District Council-ah 1970-ah kan han sorkar khan Council motor hmang te khan khawi khawiah emaw kan kal ho thin a ni. Chutiang chuan remna leh muanna atan pawh hian ram leh hnam tana a lo ram mut piah lamah khan theihpatawp chhuahtute zinga mi a ni a. A mimal tak pawhin amah leh a nupui chhungte nena inhre tha kan nih avangin mimal tan pawh channa rapthlak tak a ni a. Tin, ram leh hnam tan leh kohhran tana a inhman dan ka sawi tawh a, khang zawng zawng avangte pawh khan anmahni leh khawtlang tan chauh ni lovin ram leh hnam tan mi tangkai tak kan lo hloh ta a ni a. A pawh kan ti a, a chhungte, a nupui fanaute, a tu leh fate leh

chhungkhat lainate zawng zawng Pathianin awmpuiin thlamuan turin kan dilsak a. Chu chu kan duhsakna a ni e. Ka lawm e.

SPEAKER : Awle, sawi duh nei kan awm nual niin a lang a. Amaherawhchu, Question hun kha kan ei zel a ni tih kha hria ilangin. Pu Lalduhoma'n a phar a, Dr. R. Lalthangliana a phar bawk a, Pu Lalduhoma i lo ko hmasa ang.

Pu LALDUHOMA : Pu Speaker, Pu H. Vanlalauva hi kan han ngaihthlak tak ang khan sakhaw lamah mi ziktluak, ziktluak taka a hun rawn hmang chho a ni a. Hei, kan ramah hian soal khura lut hrep tawh hnu te thuhritu ropui tak takte kan han nei a, testimony ropui tak takte an sawi a, a lawmawm rual hian a duhawm zawk chu tleirawl soal pawh nei lova ziktluak taka rawn kal chhova te hi an ni fo thin a. Chutiang mi chu a ni a. Ka hriatsual loh chuan Synod Preacher hmasa pawla mi kha a ni a. Tunah hian Synod Statistician Report kumtina an han pekah hian Synod Preacher la dam hi an awm vak tawh lova, tlemte chauh an awm tawh a, chung zinga mi chu niin ka hria a. Chutianga mahni phak tawka rawngbawlna lama inhmang mi a ni.

Tin, mi sincere a ni a, thiante lakah a rinawm a, thawhpuite lakah a rinawm em em a ni. A thiltih reng rengah theihtawp chhuah mi a ni a. Palaiiah hian a tha em em mai a, pawl leh pawl inbiaknaah te, heng han palaina chi reng rengah hian Pu Auva hi diplomat a ni ve tlat a ni. Chungah chuan hman pawh hman rim a ni hle thin a. Amah pawh hi a bula awm a nuamin mi kawm nuam tak a ni a. Tin, Emissary anih lai khan hun harsa tak a tawng chho a. Khatih lai khan amah rawn chhawr thintu Pu Laldenga te lakah khan zaah zain a rinawm tluanchhuakin ka hria a. Kha Emissary dinhmun kha advantage-te pawh lak ve theihna a ni a, thlemnate pawh tawh ve theihna hmun tak a ni. Mahsela, Pu Auva hi rinawm takin kha a mawhphurhnaah khan a dingtlangin ka hria a. Chu chu chhungril takah mi zahawm tak nia ka hriatna a ni a. A tul chuan zanlaiiah pawh Town Commander-te nena lo kalin engemaw buaina, cease fire han bawhchhiat mai theihna tur awm lo awm thin zauh zauhah te khan kan hnenah te pawh a lo kal ve thin a. Chutianga buainaah kan lut leh ang tih hlau va, a theihna zawng zawng thawhtu a ni a. Tin, politics-ah hian a lerlam atanga thuai lovin grass root atangin bul a tan a. A bul te atanga rawn tan chhovin Minister kum 10 lai a lo ni thei a. Minister a han nih chhoh khan, kan tawng a huatthu suhah lekhathiam sang lo a ni a, mahse mite beisei aiin a performance a tha a. Hmanni lawkah Arunachal Pradesh Chief Minister kan sun tawh a, lekhathiam sanglo bawk a ni a. An inang hlein ka hria a. Hetiang mi pianpui B.A kan tih thin quality nei tha tak a ni a. Minister anih pawh khan a department chan kha a hneh em em a ni. A hmain a thawh tawh naah leh a organisation awm naah reng reng hian, politic a ni emaw, party a ni emaw Secretary tha tak, minute ziah thiam tak, chutiang mi chu a ni a. Vawiiina kan han chan ta hi a uiawm kan ti hle mai a, a chungte kan tuarpui a, Pathian thlamuanna an tan kan dil sak a, kan duhpui bawk a ni e. Ka lawm e.

SPEAKER : Dr. R.Lalthangliana.

Dr. R.LALTHANGLIANA : Pu Speaker, ka lawm e. Hei kumin hi he House rorelna a thu mi 3 kan thian duh takte chan kum alo ni reng mai a, a lung chhiatthlak hle maiin ka hria a. Hei tunhnaiah kan rawngbawlpui duhtak Pu Auva kan han chan leh hi mi a barakhaih hle mai a. Mizoram sorkarah pawh hna pawimawh tak mai Minister term 2 lo chelh tawh, department pawimawh tak tak District Council te, LAD te, RD te leh Prison, Fisheries te hneh taka lo enkawltu kha a ni a. Tin, party ang pawhin MNF din tan tirh 1961 atanga a kul ataia a thih ni thleng a dinhmun pawimawh hrang hrang chelhtu a ni a. A thih ni thleng a Adviser a kan neih lai mek a ni.

Tin, Ram leh Hnam leh mipui tan hian hun khirh leh hun harsa a sutlang zak mai a, a ropui hlein ka hria a. Khang hun lai khan keini zirlai pawl hruaitute kan ni thin a. Inbiak zauh zauh changte pawh a awm lo thei lova. Chuvangin, a hnathawh hi a khirh a ni tih ka chiang a, chung zawng zawngah chuan mualpho lovin fel takin hna a thawk thin a. Vawiina kan han chan ta hi min barakhaih hle a.

Kan ngaihthlak ang khan Kohhran leh khawtlangah sulsutu a ni chho thei zel mai a. Hetiang ang ho hi keini Politician ho zingah pawh hian kan tam lovin ka ring a. Politic line-a kan awm chuan thil dangah hian a inhnamhnawih vak theih loh. Ani erawh chu thil tam taka mawhphurhna la thin a ni hi a ropui hlein ka hria a.

Hei Session kan neih lai mekin nimpiniah maiah vuina kan nei a. Engemaw kawng zawng chuan ka ngaihtuahnaah a ropui danglam hlein ka hria a. Session lai tak mai a, kan Minister hlui te, kan MLA te kan chan hi a awm vak lo niin ka hria a. Vuina inkhawmah pawh ruling lampanga kan Minister pawimawh tak takte leh kan MLA te pawh kan kal that ber tum a ni mai awm mang e ka ti a, opposition lam te pawh. Hetiang hun lai tak maia kawng lehlamah kan ui em em lai a, ropui tak mai a uina thu te pawh sawia kan han vui liam kha Pu Auva hi mi mak tak, mi danglam tak, Pathianin a hun tawpah ropui taka chawimawi a duh a ni tih kha ka rilruah a lian em em mai a. Chu chu loh theih lohvin ka han sawi duh a ni.

Tin, a chanchin tlangpui kha kan ngaihthla nual tawh a, a natna hi natna hrehawm tak, kawng lehlamah han thih pui mai theih ni silova tawrh rei ngai a ni a. Kei pawhin ka tlawh zauh zauh thin a, ka hmuh chian em em mai chu han tlawh apiang mai hian, hlim hmel pu tak maia a na tawrh lai pawha min chhawn reng thei mai hi a tuarchhelin a ropui ka ti em em mai a. A chhungte hnen atanga ka hriat dan chuan April ni 8 atanga a thihni thleng khan oxygen hi an lo pe rei hle mai a, an pe tuanchhuak zak a ni tihte ka'n hria a.

Tin, Mizoram hun khirh lai khan 1966 rambuai tirh lai khan Assam Rifle ho hianin an man a, Helicopter-in an phur a, anmahni Assam Rifles ho form an hak tir a, sawlai a pian leh murna khua Phulpui velah sawn an hruai a MNF awmna kawhhmuh turin an han tilui nasa khawp mai a. Ani lah chuan a duh miah lova, tuar pawh a tuar nasa hle a ni. Kangthai an ti mai a, chutiang ang chuan a taksaah an vaw vual tut mai a. Tin, dark room an

ti a chungah te chuan thlakhat vel bawr khung hial te pawh a lo ni tawh a, ram tan theihtawp chhuaha tan la mi leh tuarfei tak a ni.

Hei, LAD Minister anih lai khan, a chanchin ziah lai khan an ziak a ni lem lova. Kan hriat atana tha ka tih riau chu, Mizorama kan khawpui deuh deuhah hi chuan a sulhnu hi hmuh tur vawiin thleng pawhin ala awm deuh vek mai a. Hei, footpath kan ti a, mihring kan han kalna tur checker tile a phah hi Pu Auva hunlaia tih chhuah niin ka hria a, a kutchhuak a tam em em mai a. Aizawl khawpui hmun hrang hrangah te, Lunglei te leh District Headquarters tam takah te hianin a sulhnu hmuh tur a awm a, hei hi vawiinah hian han sawi chhuah hrim hrim hi ka chak hle mai a.

Tin, a hna hi Minister kan nih ho lai pawh khan Pathian rawngbawlina a ni tih hi a Chiang em em maiin ka hria a, a rinawm bawk a. Term hnih Minister-in a awm a, a chhungte lam atanga ka hriat dan chuan, term hnih Minister anih lai khan nu pakhat hianin a fa IR Battalion-ah thun turin min sawipui la a ti a, written test pawh an la nei si lova tih an han sawi a, Pu Auva hnenah chuan written test pawh min tihtlin tir dan a awm mai lawm ni tiin a nawr a, mahse, Pu Auva chuan hetiang thil diklo tak hi chu kan tih tur a ni lo tiin a lo chhang fithla hmiah a ni tihte an sawi a, a ropui hlein ka hria a.

Amah hi Pathian thuawih tlat mi, Pathian fak leh chawimawi hi a nunah hian a bet tlat mai hi a ropui a ni, mi tam takin kan neih theih loh englai pawha Pathian chawimawia fak mi ni tlat mi a ni hi a ropui ka ti a. Kan ngaihthlak tak ang khan thiamna lamah chuan a zir sang lo tih kan hria a. Amaherawchu, ziak kawngah te leh thusawi lamah hian a sawi suallo tluk niin ka hria a, rang mang si lo fan deuh raih hian fel fai deuh maia sawi chi hi a ni a, a ropui hle a ni.

Kum 1972 bawr vel khan Pu Speaker, Dawrpui Pastor bial an tih K.T.P hi ala zau khawp mai a. Chutihlai chuan sawlai Ramhlun te, Venghluie te pawh hi bial khat vek an la ni a. Tahchuan Essay Competition hi an siam a, lehkha thiam tak takte pawh tam tak kha competition-ah khan an tel a, chutah chuan Pu Auva hian mark sang tak hmu in pakhatna a la a ni tihte sawi a ni. Chutiang chuan, vawiin a kan chan tak hi lehkha thiamna lamah chuan sang lo mah sela quality nei tha tak mai a ni tih hi ka sawi duh a ni. A tawp berah chuan Pu Auva ang hi mizo fate zingah chuan kan tam lo hle in ka ring a, amah thiamna lamah sang lua lo mah sela a dam chhung a a thiltih chhinchhiah tlak tak tak hi tam tak min hnutchhiah a ni. Ram roelna khawl a chelhna kawngahte, khawtlangahte leh Kohhran-ah te, kawng hrang hrangah keini a thawhpuite leh thangthar lo awm mekte tan pawh hian hnutchhiah tam tak pawh hi a neiin ka hria a. Chuvang chuan, vawiinah hian channa ropui tak kan channa hi a ni tih ka sawi duh a, a nupui Pi C. Lalhmingmawii te leh a fa te, a tu leh a lainate zawng zawngte vawiinah hian Pathianin awmpuiin thlamuan zel sela tih hi ka duhsakna a ni e. Ka lawm e.

*Speech not corrected

SPEAKER : Awle, sawi duh nei pawh tam tak kan la awm in ka ring a, kan sawina lampang chu kan duhtawk ang a. Tunah chuan Pu H. Vanlalauva, former Minister sun nan ngawi rengin minute khat i lo ding ang u. (Silent) Awle, a tawk e, i lo thu tawh ang u.

Kan tihtur dangah kan kal leh ang a. Zawhna leh chhanna hun kan hman ang a, zawhna No. 71-na zawt turin Pu K. Lalrinthanga i lo sawm ang.

Pu K. LALRINTHANGA : Pu Speaker, ka lawm e. Minister zahawm tak UD & PA chhan atan -

Vairengte khua tan hian Master Plan siam tumna a awm em? Tih ka zawt e.

SPEAKER : Chhang turin Pu Zodintluanga, Minister for Urban Development & Poverty Alleviation Department i lo sawm ang.

Pu ZODINTLUANGA, MINISTER : Pu Speaker, kan Member zahawm tak Pu K. Lalrinthanga zawhna chhanna chu -

Vairengte khua Planned anga Development kalpui a nih theih nan, Mizoram Urban Development & Regional Development Act, 1990 tanchhanin, Master Plan siam tum mek a ni.

SPEAKER : Zawh belhna Pu K. Lalrinthanga.

Pu K. LALRINTHANGA : Pu Speaker, Vairengte khu khaw thang chak tak a ni a, tunhma chuan Khasi panhnah chingte an awm hmasa a. Khulai bial Serlui bial tih pawh khu Bilkhawthlir bial tih thin a ni a, khaw te tak te a ni a. Amaherawhchu, tun hunah chuan mihring sing chuang zet an lo awm ta a, State dangte nen kan inkalpawhna kawtchhuah pawimawh tak a ni a, mi khu an pung chak em em a ni. Chutih rual chuan VC te thahnemngaihna plan eng eng emaw te khu an han siam ve a, inhmunte an han inpe ve a, amaherawh chu thiamna (skill) nei lo an nih avang in duhthu a sam lo maithei a he thilah hian mihring an pung chak a, an tam em em si a, helaiah hian chak deuhin hma min lak sak thei ang em? tih ka han zawhbelh ve leh a ni e.

SPEAKER : A chhang turin a changtu Minister i lo ko ang.

Pu ZODINTLUANGA, MINISTER : Pu Speaker hemi master plan siam tur hian tih tur tam tak Zoram Urban and Regional Development Act, 1990 leh a rules 1990 angin thil chi hrang hrang tih turte a awm a, chungah chuan Detail

Project Report Farm leh scheduled of the boundary map siamte a ngai a, physical survey te, khang zawng zawng kha Pu Speaker tih tur tam tak paltlang ngai kha tunah hian kaltlang pui mek a ni a, tunah hian kan buaipui mek a ni tih ka chhanna a ni e.

SPEAKER : Awle zawhna number 72-na zawt turin Pu Lalduhoma i lo sawm ang.

Pu LALDUHOMA : Pu Speaker, Food Civil Supplies & Consumer Affairs changtu chhan atan ka zawhna :-

- (a)-na Mizoram sorkarin FCI atanga buhfai BPL leh APL rate per kg
- (b)-na Retailer te hnena a pek chhuahna rate, BPL leh APL per kg,
- (c)-na Retailer-ten mipui te hnena an hralhna rate per kg,
- (d)-na FCI nilo hmun dang atanga lei zat leh a rate per kg, 2010 leh 2011 inkarah.

SPEAKER : Chhang turin a changtu Minister zahawm tak Pu H. Rohluna i lo sawm ang.

Pu H. ROHLUNA, MINISTER : Pu Speaker member zahawm tak Pu Lalduhoma zawhna chhanna chu, hei hi a ni.

(a)-na Mizoram sorkarin FCI atanga buhfai a leina rate chu a hnuai a mi ang hian a ni. BPL ₹ 5.65/-per kg., APL ₹ 8.30/- per kg, APL Economic Cost an ti a, hei hi ₹ 22.13 per kg a ni.

(b)-na chhanna chu, Sorkarin retailer hnena a pek chhuahna rate chu a hnuai a mi ang hian a ni. APL including economic cost, ₹ 9.30, BPL ₹ 6.00 per Kg.

(c)-na chhanna chu, retailer-ten mipui te hnena an hralhna rate chu, APL Economic Cost telin ₹ 9.50 per kg, BPL ₹ 6.15 per kg.

(d)-na chhanna chu FCI ni lo, hmun dang atangin buhfai lei a awm lo, tih a ni.

Pu LALDUHOMA : Pu Speaker, ka'n zawh belh duh chu, APL buhfai kan leina leh kan pek chhuahna hi economic rate-a lei nen hian a infin a, a chhannaah hian. Hriat hran thiam a har viau mai a. A rate hi a inthlau viau mai baw si a. Khami rate inthlau deuh mai kha retailer hnena pek chhuah hian rate pakhatin pekchhuah a lo ni ta a. Helai an chhut dan hi min han hrih chiang leh thei se, ka'n ti phawt a. A dawt lehah chuan retailer-in mipui hnena a pek chhuahnaa a hlep hi a tlem hle mai a. Tunhma atang khan hei hi kan sawi thin a. Hemi a hlep ngawr ngawr um hi chuan retailer nih hi thil tih chi niin a lang lova. Mahse, an duh viau baw si a. Buh thar tamna apiangah retailer nih a hlu zual te an ti mah mah a. Hengte hi a mak angreng a. Amaherawhchu, hemia an hlep tur piah lamah hian hlawkna an siam thei tihna a ni a. Helai hi hetiang ni lova, dan dik taka an hlep tur hi tihtam a, engemaw dan dik lo hmanga zawn ngai lova, sakhua taka thawh theih tur hian retailer ho hi kan buatsaih thei lo em ni? tih ka'n zawt leh duh baw a. Tin, Local Procurement-te hi a awm thin ni tein kan lo hria a. Economic Cost-a kan lei pawh kha tuna a chhannaah chuan FCI atang vek niin a lo lang ta a. FCI atang kher lo hian Myanmar atangte leh

keimahni rama buh tharte ngei atangte hian, cheng 22 a kan lei thei a nih chuan, kal mana sen ngai lo nen local procurement system hi sorkar hian introduce a tum em? Incentive atan pawh a tha dawn a, “Buh in thar tam chuan cheng chu ti zat chuan kan lei sak ang che u”, tih policy, neih mai hi a tha lawm ni? Sorkar hian ngaihtuahna a hmang em? tih ka'n zawt duh bawk a.

A tawpna berah chuan, kan rama ration card awm zat hi Pu Nirupam Chakma zawhna lo chhuakah khan 248804 a ni a. Statistic handbook lo chhuakah khan chhungkaw awm zat hi 217405 kan ni a, chumi awmzia chu ration card chhungkaw zat aia a tam na hi 34179 tihna a ni a, heti zat zat chhungkaw aia tam ration card awm hi sorkar hian chhui chhuah a tum em? tih ka zawt e.

Pu B. LALTHLEGLIANA : Pu Speaker Minister zahawmtak chhan atan kan zawt ang e. Tunlai hi kuthnathawk tute thawh rim vanglai a ni a, chutih lai chuan kar khat ration-a buhfai mipakhat tan Kg. 2 chauh a ni hi chhun chaw nen chuan kham ngaihna a awm lova, kuthnathawktute ngaihtuah chungin Minister hian tihpun a tum hnai em? tih ka'n zawt duh a ni.

Pu H. ROHLUNA, MINISTER : Pu Speaker, Pu Duhoma zawhna, economic cost-a kan leina leh APL normal hi a rate FCI a kan leina a inthlau si a, retailer a an pek chhuahna rate kha a inang tho si a tih chungchang zawh belhnaah khan, hei hi a dik a. FCI atangin APL normal hi ₹ 8.30 in kan lei chhuak a, economic cause hi ₹ 22.13 in kan lei thung a ni, a chhan chu normal allocation central atanga min pek hi 2011 census figure anga min pek a ni a; kan kham loh avangin lei belh a ngai ta a, tichuan sorkarin a man tamin sorkarin a lei belh a. Kg.1 ₹ 12.83 ang velin kan sorkarin a subsidized ta ringawt mai a ni. Miretheite kan sorkarin a hmangaih avangin tih loh theih lohvin, kan Chief Minister-in Finance a chan lai te pawhin kan sawi ho thin a, ani pawhin kan tihmakmawh a ni a tiin sum harsa chung chungin kan State sorkarin mipui an harsat lutuk loh nan hian hei hi chu vawiin thlengin min la tihsak zel a. Chuvang chuan mipuiin APL leh Economic cost atanga an han lak hian kg khatah sorkarin cheng 12.83 ang zel hian a subsidise a, chu chu a phurh man tel miah lo a ni a. Tin, thla khatah hian quintal singriat vel hi kan lei dan tlangpui a ni a, Economic cost atangin. Chuvang chuan economic cost leinaah cheng vaibelchhe sawm chuang hi sorkar hianin hmuh let lehna tur awm miah lovin mipuiten Buhfai man tlawm zawka an lei theihna tur hian a seng thin a ni, tih kha ka chhanna ni sela.

Tin, Retailer-in an hlep a tlem tih hi a dik a, tunah hian pawisa sawmhnih ang vel hi APL atang phei chuanin kg-ah hian an hlep ang a ni a. Chuvang chuan per kg-a an hlep hi a tlem em em a ni. Chuvangin kan retailer-te hian a nihna ang ngau ngau hi chuan hlawkna hi a awm tham lo hle tih sorkarin a hria a. Amaherawhchu, Buhfai rate hi han tito ngawt dawn ta ila, mipui phunchiar leh dan tur hi ngaihtuah tel a ngai lo thei lova, mipui phurrit va siam leh ai chuan, a theih chen chenah a rate tunhma atanga an lo hman thin ang hian

kan la kal hram hram a ni a. Chuvangin a phurh man lamah te pawh hian thingtlang fare, weather road kan han tih ang thinte leh kawng chhe zawka Jeepable road-te a sang deuhhlekk a, tunhmaa an lo phurh thinna te, tuna black top lo ni ta te, metal road lo ni ta te, khang ang rate-te kha siamthain lo ennawn leh vekin, chutiangte chuan a phurh man a rate te hi tlemin helamah te hian siamremna dante hi a awm lawm ni tihte ka'n ngaihtuah a. Chung atante chuan hma kan la a ni tih kha ka'n sawi duh a.

Tin, local procurement chungchangah hian, local procurement hi sorkar hmasa khan an lo ti a, mahse an sim thawkhat a ni. A chhan chu a rate hi chuti takin a tlawm chuang lova, chutihruai chuan Buhfai quality tha hi khatianga a metric ton tam tak ang zawngte a han lei khawm tur hi chuan quality inang thlap hi hmuh a lo harsa khawp a. Chuvangin a quality control chungchangah te hian a harsa a, chubakah khatianga tam tham han lei mai tur kha chuan a treatment-te kha tih a lo ngai a. Buhfaite hi treatment tih loh hi chuan reiloteah a chhe mai thin a, tuna FCI atanga kan han lei ho hi chu treatment tih sa vek a nih avangin rei tak takte a dah theih a. Chuvangin local procurement a hi hetia han sawi maia thil tha awm tak, incentive scheme atante pawha kan lonei mite tih sak atan pawha tha awm taka a lan lai hian a problem pakhat hi chu a Buhfai hi a faisa phei chuan rinai hian a dah rei theih lova. Tin, a quality-te a lo inang vek lova, a harsa angreng a. Tin, chumai nilovin, duh anga tam hi a hlawma han lak tur hi heng Burma lamah te pawh hian Buhfai a tam nia hriatnate pawh a awm thin a, mahsela khatianga tak tak han ti tur kha chuan ram pawn lamte a lo ni a, heng border trade-te mumal taka a kaltlang theih hunah chuan Buhfai a tam chuan Sorkarin la ngaihtuah zui atan pawh a thain ka ring a. Chuti a nih loh chuan, tun ang dinhmunah erawh hi chuan han kalpui mai hi thil harsa a nihna a awm a. Chuvangin, khatianga a hlawma Zoram mipuiin kan mamawh ang kan lak theihna FCI atang hi chuan kan inngahna a ni rih phawt mai a ni tih kha ka chhan na ni rih phawt mai sela.

Tin, ration card chungchangah hian sawi a tam a, ration card hi siam dik a har khawp mai, hei kan sorkar ve hnu pawh hian theihtawp kan han chhuah a dik lo deuh lai a awm kan han hriatte hi kan han ennawn a, man chhuahte pawh hi kan nei a, tunah hian a sing tel hi chu kan paih tawh a ni, kum 2009 atang pawhin. Mahse a figure dik tak hi village record kan nei lova, chuang chuan helaiyah hian figure dik tak hi rinaiin hriat a har khawp mai a, tunah pawh thingtlang lamah te chuan ni 100 inhlawhna kan tih mai NREGS te, job card-te nen pawh kan han compare a, henge pawh hi a tlangpui thuin a la inngah chhan tlak em em lo a, tunah pawh department hi chuan 2011 census figure family data hi han peih sela, chu mi ang zul zui chuan ration card hi siam ni sela kan nei dik thei ber ang tih hi kan ngaihtuahna a ni a, chu chu tunah hian Census Directorate lam nen pawh kan indawr reng a, an la inpeih thei lova, an inpeih veleh hei hi kan kalpui tum dan chu a ni a, chumi ang zul zuia kan kal theih chuan population nen a inmil thlapin family wise-in kan nei thei ang, ration card hi, tih hi ka chhanna a ni a.

Tin, member zahawm tak Pu B. Lalhlengliana zawhna ration quota tihpun chungchang hi kum dangah pawh hian tun ang hunah hian (Interruption)

Pu NIRUPAM CHAKMA : Figure point out clarification khawngaih takin. Ka zawhna unstarred question hmannah House-ah a lay a, ka'n en a, ka'n belkhawm a, APL, BPL leh AAY te ration card tun thleng a issue zat eng nge? Ti khan 6,94,884 a ni. Tin, nichin khan Minister zahawm takin sing tel kan paih tawh a ti a. Tichuan hetiang zat kha a la awm em? Heng ration card hi sorkar hmasa issue vek kha a la ni a, keimahni mawhphurhna a ni lo, mawhphurhna kan lak chuan mipuiah ngaihdamna dil a ngai a ni.

*Speech not corrected

Pu H. ROHLUNA, MINISTER : Pu Speaker, kan Member zahawmtak Pu Nirupam-a han sawi kha helaiah hian ration card BPL bik hi figure chhut sual a lo awm a, hei hi 4,20,000 angin chhut a ni a 42,000 tur a ni. Hei hi a Department lamin kan tisual nge ni ka hre chiah lo a 42,000 tur a ni a, 4,20,000 angin an lo chhu palh a ni a, chumi chhut sual avang chuan a buai ta deuh hlek a. Khami 4,20,000 ang ni lo a 42,000 kha a chhanna dik tak zawk tur a ni a, chumi ang chuan 3,16,884 vel hi tunah hian APL, AAY, BPL chi thum a ration card awm zawng zawng chu a ni. APL bik erawh hi chu 248,884 a ni a. Tin, Pu Speaker ration quota tihpun hi, tuna kan dinhmunah hi chuan, kan han sawi tak ang hian kan bufai leina (economic cost) ah te kan sen hnem lutuk avangin Sorkar tan a harsa a, kuminah phei chuan advance Monsoon Stock tur hi kan la lo reng reng a ni. Ti chung chuan thla tina kan quota kan han lei leh additional tlem tlem kan hmuhten a FCI atanga kan lei chhuah hi thingtlang hmun kilkhawr ber berah te kawng chhiat zualna laiah te kan han chhek khawl a, tunah hian kawngchhiat zualna laiah hi chuan thla hnih thlathum ei hi kan chhek theiin kan hria a. Chutih lai chuan kawngpui tlangdung kan han tih pangngaih hian a tlachawp deuhin kan la inpe tho a ni. Chuvang chuan advance-a stock lawk tur hi kan lak lawk theihloh avang hian leh Sorkar pawhin hemi economic cost a kan leina sang lutuk avanga sum harsatna avang hian a quota han tipung mai tur hi chuan Kg 2 a pek hi (tunah hian Kg 2 puitling quota thingtlangah chuan a ni a, naupang quota hi a chanve ang zel kha a ni ta a) KG 1 in han tipung ta i la, rinaiin a stock hi a hek hiau hiau khawp mai a, tun dinhmunah hi chuan hei hi kan kal theih dan chin a ni tih kha kan chhanna ni sela. Tin, Central hianin Civil Supply min pek hrim hrim hi khamkhawp tura min pek hi a ni lo tih hi mipuiten min hriatpui se ka duh khawp mai a, tin, helaiah member zahawmtakte pawhin min hriatpui se. Chhawmdawlana a ni tih zawng hian ngaihtuahna hi kan hman a tha a ni, kham eleuha ei vek chungkaw tinin kan tum hian Central Sorkarin min pek dan nen hian a inmillio hrim hrim a. BPL te AAY-te pawh Kg 35 hi thlakhatah hian Central-in min pek dan a ni. APL pawh hi a ni a. Mahse kha aia tam khan APL bik tak phei chu mimal quota zawng hian kan inpe a, Central Sorkar min pek dan ang pangngai ai hian kan inpe tam zawk a ni tih kha ka chhan theih dan ni sela.

Pu B. LALTHLEGLIANA : Pu Speaker, Minister zahawm tak din lai khan kham eleuha pek tih kha chu K 3 ah pawh tipung ula, kham eleuh chu a ni theilo hrim hrim a, zawhna ka'n zawh duh chhan pawh kumin hi Congress Sorkarin buhthar tam kumah a puan a ni si a, Kg 2 ringawt buhfai pek chuan patlingin thlawhhma zau tak a lak theih loh va. Buh thar tam a har ang a, chuvangin chhunchaw atan Kg 1 talin an pe belh thei lawm ni? Pek tam anih loh chuan tukthuan leh zanriah

ei ringawt chuan buh tam tak tharchhuah a harin ka ring a. Chu chu kum dang a July thla chho vel a tih pun ang khan in tipung thei lawm ni ka tihna mai a ni a.

Pu H. ROHLUNA, MINISTER : Pu Speaker, member zahawmtak thahnemngaihna kha chu a lawmawm khawpin ka hria a, amaherawhchu, kan dinhmun kan en chho zel ang a, tunah hian kan tlin loh hi chuan kan mipui lam bawh hian kan stock a zawh hi chuan harsatna an tawh leh ang tih hi kan hlau va, chu ai chuan hetia an lak theih ang ang ration hi (quota kan pek theih ang ang) a hunbi pangngaia an lak theih zel hi kan duhsak zawk a ni a.

Tichuan khamlo lutuk, chawlhni hmanna tur te nei ngang lo chhungkuate chu ration card nen hian kan suah thin a ni. A man an pe thova, a rate pangngaiin chutiang chuan kan inchhawmdawl hram hram a ni, sorka-in a tlin tawkin tih kha Pu Speaker, ka chhanna ni sela. Tin, Pu Speaker, nichina kan sawi member zahawm tak Pu Nirupama zawhna starred question BPL chungchanga ration card-a figure diklo kan lo tihpalh kha he House hriatthiamna ka ngen a .

Tin, chutih rual chuan a siamthatna khawngaih taka min phalsak turin leh a tihdikna Member zahawmtakte tun Session chhung hian rawn pek theih kan rawn tum dawn nia. Ka lawm e.

SPEAKER : Aw le, tikhan hmanhmawh thilah pawh printing mistake awm zeuh zeuh a ni a. Hmanniah pawh khan kan han puang ringawt a, mahse kan tihdan pangngaiiah hian Minister khan correction phalna kha a dil hi a lo ngai a ni. Khatiang khan member te kha..... (Pu Nirupam Chakma : Pu Speaker, hetiang hian ti lo se a tha, hmannah a chhuak a, an hmu a, wawiinah pawh keimah chuan sawi lo ilang chuan correction an siam lovang. House-ah wrong information an pe tawh tih hre reng chungin) Minister zahawm takin tihdikna a rawn dil a, kha kha chu a theih loh ang tih kha chu a thiang lo a ni. Amaherawhchu a channel pangngai a awm a, chutah chuan Speaker hnenah correction kha ziakin emaw min rawn dil ang a, kan Minister te khan naktuk lamah te emaw a correction kha kan lay leh mai dawn a ni. A dang pawh a la awm nual ang.

Pu K. LIANTLINGA : Pu Speaker, khalai correction tih laia kha kan sawi lawk teh ang. Khami unstarred question 14-na ah khanin Aizawl road North Division tih kha kum 2009 leh 2010,2011,2012 expenditure tura ruahmannaah khan hei ₹ 3278.38 lakh khan a rawn zia a. Hei hi han belh khan ₹ 3268.38 lakh tih kha a niin ka hria a. Hei hi kan House Leader zahawm tak khan a tihdik a va ngai awm ve? Hei hi wrong information tho niin ka hria.

*Speech not corrected

SPEAKER : An rawn ti ang a, khati khan Speaker-in a lo phalsak ang a, in dawhkanah khan emaw an rawn pe leh vek ang che u, lo thlaphang suh u. Figure dik chu in hmu vek ang. Tunah zawhna dangah kan kal ang a, a zawt turin Pu C.Ramhluna i lo ko ang.

Pu C. RAMHLUNA : Pu Speaker, Urban Development and Poverty Alleviation Department changtu Minister chhan atan Starred Question 73-na chu hei hi a ni.

Aizawl khawpui chhunga Local Council-te hi engtikah nge inthlanna buatsaih tum a nih?

SPEAKER : Pu Zodintluanga, a changtu Minister chhang turin i lo ko ang.

Pu ZODINTLUANGA, MINISTER : Pu Speaker, kan member zahawm tak, Pu C.Ramhluna zawhna Starred Question 73-na chhanna chu, The Mizoram Municipalities Act, 2007 Sec 350-nain a sawi angin, State Election Commission –in State Sorkar rawnin inthlan hun leh ni te hi a siam tur a ni a, Local Council thlan hun tur hi a la ruat lo a ni.

SPEAKER : Zawhbelhna Pu C.Ramhluna

Pu C. RAMHLUNA : Pu Speaker, 24/11/2010-ah Secretary Urban Development & Poverty Alleviation-in Mizoram Municipality Rules 2010, (ni 4/11/2010 a an tih chhuah) khami Rules 30-na tlawhchhan khan, Aizawl Municipal area hi a V/C te kha, Local Council thlan hma chuan Local Council atan, transition period atan lo function rawh se, V/C ni thin kha tiin order a chhuah a. Tin 8/12/2010-ah khan Order dang chhuah lehin VCP thin a kha Local Council Chairman lo ni rawh se, tiin Order kha chhuah a ni leh ta a, chuan hemi Mizoram Municipalities Rules 2010, Rules 15 na in a phal ang khan AMC hian January ni 24, January, 2011-ah khan Board of Councils thu khawm khanin a rang lama inthlan hi buatsaih ni se an ti a, chumi basis chuan Chief Executive Officers pawh khanin 10/2/2011-ah khan State Election Commission hnenah khan inthlan hi buatsaih tur khan a ti a, hei hi kan State Sorkar hian hriatpuina a nei em? Tin, hetiang ang a thil a lo awm tawh chuan transition period hi a rei ta viau mai a, churang chuan a rang lam a inthlanna hi buatsaih sak tir tumna hi kan Sorkar hian a nei em? tih kha ka'n zawh belh duh a ni e.

SPEAKER : A chhang turin a changtu Minister i lo ko ang.

Pu ZODINTLUANGA, MINISTER : Pu Speaker, Village Council-te hi Mizoram pumah kum 2009 February thla khan an inthlang a, an term hi February 2012, hi an term tawp hun tur a ni a, an hun hi a rei tawh lo angreng a. Tin kan Rules, hemi Mizoram Municipalities Ward Committee & Council Rules 2010, 30-naah hian, hemi transitional period chhung hi chuan Village Council-te hi Local Council angin an function ang tih kha kan lo nei bawk a, churang chuan vawiina inthlan mai loh hi kan la ti a ni a. Tin, nikum 11th November, 2010 khan Aizawl Municipal Council kan thlang a, heng angteah hian sorkarin an hnathawhna tur leh an mahni tih tur te chak takin ruahhanna a pe mek a, vawiinah pawh, Solid waste management, bawhlhahw

paihte a bul tan nan leh eng engemaw an kuta dah tur a ni a, khami hma khan Pu Speaker, Aizawl khawpui chhungah hian Village Council-te Local Council an nih hma khan Sorkar nen PPP Mode in bawhlawh kan lo paih a. Chung angte chu Aizawl Municipal council thar lo awm bawk, Village Council thar lo awm bawk chuan khang system-te kha Aizawl Municipal Council-a khang hnathawh zawng zawngte kha dah tum mek a ni a. A lo awm sa vawiina lo thiam tawh sate nena Council thar nena an thawhona a that zawkna tur atan heng angte hi vawiinah kan Local Council-te hi la awm rih se tih hi kan tihna chhan chu a ni e.

SPEAKER : Aw le, a chiangin ka hria. Zawhna dang kan la leh anga, Lt. Col. Z.S Zuala zawt turin i lo ko ang.

Lt. Col. Z.S. ZUALA : Pu Speaker, khawngaih taka Home Minister-in min chhan turin ka zawhna te chu : -

- 1) Indo Bangladesh Border Fencing hi Mizoram chhungah hian tih zawh tawh a ni em?
- 2) Fencing hi kan ram chhungah engtianga thuk nge a lo luh hlawm?
- 3) Ransa inkal pawhna siam a ni em? Tihte ka zawhnate chu a ni e. Ka lawm e.

SPEAKER : A chhang turin a changtu Minister Pu R.Lalzirliana i lo sawm ang.

Pu R.LALZIRLIANA, MINISTER : Pu Speaker, Member zahawm tak, Lt. Col. Z.S.Zuala zawhna a chhanna chu :

- 1) Zawh a la ni lo tih a ni a.
- 2) Ministry of Home affairs ruahmanna angin a theih chin chinah International Boundary Zero line atanga yard 150 chhungah hung tur a ni a. A remchang lo laiah chuan 500 yard thleng pawhin fencing line hi alo lut thei a ni.

A zawh belh duh awm tak kan chhang tel nghal anga. Pukzing ramah hian 3 km lai lo lut a awm a. Mizoram lamah chung chu meeting koh a ni a. Chief Secretary hova meeting-naah NBCC te he an hungna lo luta hi tawlh hla leha hung tha tura hriattir mek a ni a. Tin, inkalpawhna (c) na hi inkalpawhna siam a ni a. Border fencing line ah hian, 1 km atanga 2 km zelah inkalpawhna tur siam vek tur a ni.

SPEAKER : Zawh belhna a awm em?

Lt. Col. Z.S. ZUALA : Hemi inkalpawhna tih hi Ramsate Bangladesh leh Mizoram amite hi an inkalpawh thei em? Khami kha ka zawhna chu a ni e, ka lawm e.

SPEAKER : Chhang turin Minister zahawm tak i lo sawm ang. A chhang hman lo ang a, hetah Pu Tlinga pawhin a phar a .

Pu NIRUPAM CHAKMA : Hei Pukzing ram chu a sawi a Minister hian, hemi Zero line atangin 3 km a ni a. Hmun tamtakah hetiang hi a ni a. Chu chu in hriat ve ka duh a. Ka sawi duh ber chu Silongsora khua, kan CEM Pu Kalikumara bial chhunga mi Silingsora khua hi Bangladesh a ni an ti a ni. Kha kha Central Home Ministry-ah pawh report tawh a ni a. Bangladesh ram hi a ni thei lo reng reng. Mizoram a ni tih kha ka sawi duh a ni e.

*Speech not corrected

SPEAKER : Aw le, kan zawhna hun a tawp a, Pu K. Liantlinga chu a ngaih mawh awm hle naa zawt tawh lo mai rawh aw. Khami an zawhna kha han chhan tur a awm chuan kan Minister zahawm tak khan han chhang sela. Ramsa inkalpawhna lampang kha i lo sawm ang.

Pu R. LALZIRLIANA, MINISTER : Pu Speaker, Ramsa inkalpawhna zawhna kha ramsate kha kan zu be thei chiah lova, chhan a har angreng a. Amaherawhchu a inkalpawhna tur siam a awm a ni tih kha ka'n sawi duh a. Tin, helai Pukzing ram bak kha Chawngte lamah te hmun dangah te a awm anih chuan heng hi enzui tur a ni ang.

SPEAKER : Awle, kan zawhna hun a lo tawp ta a.

Dr. R. LALTHANGLIANA : Pu Speaker, khawngaihni Pu K. Liantlinga han zawhna kha unstarred question kha a ni a. Tukin zinga kan table-a an rawn dah ho kha. Ka zawhnaah hianin PWD Division hrang hranga sum ruahmanna ka zawh lai khan Aizawl South leh Road North Division chiah mai hi an rawn furnish a. Hei hi a fel lo ka ti khawp mai a. An hmanhmawh viau a, an zo hman lo a nih pawhin a kim hian min pe thei se tih hi ka duh khawp mai a. Hei hi ka zawh dan ang a nilo a, helai Aizawl khawpui chhung chauh Division hi unstarred question-ah hian a chhanna min rawn pe a. A dang zawng zawng hi a tel miah lo mai a. An inpeih hmanlo a nih pawhin Department hian a kima pek dan hi a awm thei lo emaw ni le?

*Speech not corrected

SPEAKER : Kha kha chu kan la enchiang hlawm ang a, kan zawhna hun chu a lo zo ta a. Minister-in kan Dan 60-na angin Statement pawimawh pek a rawn dil a. Chu chu phalsak a ni a. Tunah hian Statement pawimawh sawi turin Pu R.Lalzirliana, Minister-in-charge, Home i lo sawm ang.

Pu R. LALZIRLIANA, MINISTER : Pu Speaker, ka lawm e. Hei nimin ni 17 zing dar 9:30 vel khan Thinglian khua ami Bilburam, kum 35 mi, a pa Sakarai chu mi 4 UDLA, hmannia rubotute ni a hriatte khan in atanga ko chhuakin an kaphlum a. Heng mi 4 te hian Police tanpuitu anga ngaiin an kaphlum ta mai niin a khaw mite chuan an sawi a ni. Bilburam hi Haticherra, Assam atanga Thinglian khuaa

pem lut a ni a. Thinglian khuaah hian kum khat awrh chauh a la awm hman a ni. A nupui fanaute phei chu Haticherra, Assam-ah an la awm mek a ni. Hemi thu hriat anih veleh Kolasib O.C leh police engemaw zat tirh nghal an ni a.

A tul dan ang zela operation thlak nghal a ni bawk. Mitthi ruang hi nizan dar 7:00 vel khan Kolasib thlenpui a ni a. Vawiin ni 18 hian PME tih a ni ang. Tin, Nimin ni 17.7.2011 zing dar 7:00 vel khan Bairabi Sumo counter neitu Remsiam, Bairabi Chhimveng chuan SMS dengkhawng tak pahnih a dawng a. He SMS hi English a thawn a ni. UDLA Member ni a inchhal, M.R. Chhorki in ti chuan Bairabi khaw bomb darh vek a vauin Bairabi chheh velah UDLA member 35 ralhuam tha tak nen awm angin a sawi bawk a.

He SMS thinthawng tak hian Bairabi khaw mipuite a tichiai hman viau a ni. SMS chungchang leh a kaihhnawiha mipui chiahi thlamuan turin Sorkarin rang takin hma a la nghal a. Police patrolling leh venhimna uluk tak ruahman nghal a ni. SMS chungchang ngawrh taka chhui anih hnuah a thawntu leh a awmna ni thei awm uluk taka chhui zuina chuan rah tha a chhuah ta a. Nizan dar 9:30 P.M. vel khan a chhuitu CID (SB) te chuan Falkland veng, Zemabawkah SMS thawntu leh a mobile an man chhuak ta a ni. He SMS thawntu hi hel pawl mi niin alang chiah lova, Bairabiah pawh kum 5/6 vel lo khawsa tawh a ni a. Police-te hmaah a thu thawn leh ama mobile ngei atanga a thawn thu a puang tawh a. Hei hi finfiah nghal a ni bawk. Amah hi Ramluaia kum 28 mi, a pa Khawma (L), Sihthiang, tuna Aizawla mi hrang hrang ina awmkual vel mai mai thin a ni a. A hnen atang hian mobile handset pakhat leh sim card 2 bakah driving licence 2 man tel a ni a. Police custody-ah thu zawhfiah tura kawl mek a ni. Chu chu ka han sawi duh lawk a ni e. Ka lawm e.

SPEAKER : Aw le, engmah sawiho tur leh zawhna leh chhanna ang tur pawh a awmloah ngai ilangin. Vawiinah hian kan member-te absent Pu J.H. Rothuama, Minister, a ni hi Empower Committee of State Finance and Taxation Minister meeting, New Delhi-ah vawiin leh naktuk hmang turin a zin bo a ni. Tin, Pu S.Laldingliana, Parliamentary Secretary hi damlohna avangin a lokal theilo a ni. Tunah Paper Lay na hun kan lo hmang ang a, Pu H. Liansailova, Minister zahawm takin heng paper –

- 1) Report of the examine of Local Fund Accounts on the Account of the Local Bodies for the year ended 31st March, 2011 leh
- 2) Statement of Six monthly review of the Finance Minister on the Fiscal/Position of the Government of Mizoram for the second half of 2009-2010, October to March, 2010 te hi House dawhkanah han lay sela, i lo sawm ang.

Pu H.LIANSILOVA, MINISTER : Pu Speaker, i remtihain he House zahawm takah hian heng paper-te hi ka rawn lay e.

- 1) Report of the Examiner of the Local Funds account on the accounts of the local bodies for the year ended 31st March, 2011.

- 2) Statement of Six monthly review of the Finance Minister, on the Fiscal position of the Government of Mizoram for the 2nd half of 2009-2010. October 2009 to March 2010.

SPEAKER : Awle, a copy kha han sem rawh u le. Budget 2011-2012 general discussion kan tan dawn ang a, a tlangpui tak meuh meuha sawihona hun a ni a, department lam zuk luhchilh a la ngai rih lova. Khang kha chu anmahni department, Demand for grant hunah khan kan la sawiho dawn thova. Member tinte minute 10 inpe ila a tawk mai em?

Pu B. LALTHLEGLIANA : Nihnih kan sawiho dawn a, member-ten sawi duh deuh vek dawn pawh ni ila ni hnihah chuan kan la thawl thei thovin ka ring a, minute 15 tal chu i ti the ang u. Minute 10-ah chuan sawi duh tlangpui pawh kan sawi thei lova. Pu Speaker, Session neihte hi a harsa si a, minute 15 tal chu min phalsak thei la.

SPEAKER : Dar 4:00 P.M.-ah khan kan ban ngei kha a tha ang a, tin, naktuk lamah kha chuan a wind up leh member-te ngaihawh rawn react-na kha Minister in-charge te, House Leader te pawh khan an neih duh hmel a, Minister leh House Leader khan darkar khat chu an la leh dawn a, khatianga han paih zel kha chuan member-ten han sawi tliar tliar pawh ni ilangin minute 15 kha chu kan leng lo deuh lam chu a ni.

Chuvangin minute 10 ti ila amaherawhchu, khat liam deuhte kha chu han in ngaithiam ilangin. Tin, Group Leader-te kha chu minute 15 te kha chu phal sak turah ngai ila a tha mai lo em ni?

Dr. R. LALTHANGLIANA : Pu Speaker, tunhma kha chuan hetiang discussion hi chu kan chance ve deuh hi a ni a MLA ho hian, ruling pawh opposition pawh kan ni vek thova, kan hun tha deuh hi a ni ve a. Naktip lawka kan tih tur Demand-te hi chu department engemawzat kha a ni a, a buaithlak deuh a, chuvang chuan dar 4:00 P.M. han tih tehrun loh pawh kha hreh lo ila, kum khata kan hun pawimawh a ni bawka. Minute 15 talte kha chu tih a tha lo maw? Kum dangah pawh kan tih ve thin kha a.

*Speech not corrected

SPEAKER : A nih leh mithiam chin mahni in control thei chin kan ni a, tumahin minute 15 kha pelh tum lo ila minute 13-ah bell ti ri ilangin minute 15 kha chuanin thut chat theih tum ta ilangin, insumtheihnate kha han hman leh ilangin a tha ang e. Tichuan, Minute 15 chu tam deuh sawina hman a ni a. Abraham Lincon-a pawh reilote a thusawi kha khawvelin a hrereng an ti a nia. Sawi rei loh kha kan hrereng thei zawka a sin mawle. Tunge han sawi tan dawn le? Pu K. Liantlinga.

Pu K. LIANTLINGA : Pu Speaker ka lawm e. Hei vawiinah hian kan Budget General Discussion kan han nei dawn a ni a. A hma kha Vote on Account-in kan kal a, tichuan, central atanga plan fund-a fel kha March thla vel kha a ni a. Kan House Leader-te, tin, kan Speaker-te pawh khan May emaw June-ah emaw chuan kan nei leh mai ang chu tih kha a ni a. Amaherawhchu, Vote on Account tawp kher kher kan han nghak a, thla li chhung vel khan kan Finance Department/Planning Department lam hian standard allocation leh thil dang hi an ti thei lo nge ni a, tunah pawh a hunah kan pharh hlei thei lova, kar khat chhung budget pawh pharh lovin kan awm a ni a. Kan han pharh tak hi chuan kan budget chu a tha tlangpuiah chuan ngai ta ila, a bak han sawi em em tur pawh a awm lova. Kan Minister khan an pharh kha a ni a, kan sum leh pai hman tur pawh a tam khat viau a ni.

Helaiah hian kan sawi duh chu, a hma pawh a kan lo sawi tawh a, kum khat chhunglai performance budget hi kalpui ni sela tih kha kan lo sawi tawh a. Kum khatna khan kan han tan a, nikum kha a tha ta mang lova. Ngun taka kan ngaihtuah ngaiin ka hria, tunah pawh hian performance budget chu an rawn pharh ve ngei a, mahse duh thu a sam lo a ni. Work programme te, work performace te leh annual report-te a ni a. Tin, hmanna MAMCO-in annual report a pek kha 2002-2003, 2003-2004, 2004-2005 thleng kha an pe a. Khatiang report kha a lay-tu Minister pawh a zahthlak khawpin ka hria. Khatiang annual report kha vawiinah hian engatan nge kan tih ang le? An hnathawh awmzia kum tawpah pawh en theih loh a nih chuan thil harsa a niin ka hria a. Tin, tunah hian Work Programme leh Work Schedule siam thei lo department an ni vek mai a. Chutah pawisa pek a ni a, an performance pawh report leh thei lo an ni si a. Tehkhinnan kan fapate hian ₹ 1,00,000 min dil sela. Engatan nge i mamawh dawn? ti ila, a tul tul atan a ni mai, tiin min chhang sela. Tichuan kan han pe ta a, a thang ta vang vang a. Alo haw leh a, ka sum pek che kha engatan nge i hman? I expenditure han thehltut teh ti ila. Ani chuan, engemawah ka hmangral ta mai alawm mawle ti sela, Expenditure Statement thehltut duh baw si lo sela. Eng eng nge i lei han tih pawhin, a thil lei list pawh kha min pe duh baw si lo sela. Chutiang ang vel chu, tuna kan sorkar kalphung leh dinhmun hi a ni tlat mai a ni. Chuvangin vawiinah hian Member zahawm takte pawhin kan ngaihtuah chian ngai a ka hriat chu, work performance thehltut thei lo hi department engemaw zat an la awm a ni. Home department pawh hian a thehltut tha taw lovin ka hria a.

Tin, Industries te, Tourism te, Taxation, Sport & Youth Services, UD & PA, Finance, DP & AR, Planning, Horticulture-te hian an thehltut lova. Horticulture te phehi hi chuan Technology Mission-ah khan 98-50 crore an hmang tawh a ni. Tin, GAD leh Power-te pawh. Heng department-te pawh hi ngun taka zuk thlir chian chuan, kan senior Minister-te chanvo a ni deuh vek mai a. Chuvang chuan Assembly pawh hi an ngaipawimawh lo a ni ang a.

Tin, department thenkhatte leh Minister junior deuh chanvote hi chuan an rawn thehltut tha a ni. Chutiang zawngte chuan han teh sak ila, kan House zahawmna hi vawng tha tur chuan tupawh nisela, eng department pawhin performance budget leh work programme-te tha taka siam hi an tih tur a ni. Chumi anih loh chuan ngun taka kan ngaihtuah a, kan sum leh pai hmanna zawng zawngte pawh hi kan Minister-te pawh hian hriatpui vek sela. Minor works leh major works-ah ₹ 50 lakhs, ₹ 20 crore, ₹ 30 crore tih a, dah tawp ang chi te hi chu; dik tak chuan duh

duh a pawisa hmanna a ni ringawt mai a ni. Tunah kan department officer-ten kan Minister-te hnenah ka pu budget-ah a awm a, hei hi pass tur an ti ang a, an tih sak mai ang a. Tin, Minister-ten an duh zawng han tih tir dawn se, ka pu budget-ah a awm lo an ti leh mai a, an duh ang pawh an ti thei thin lo a ni. Khatiang khan duh duha sum chalai theihna lai anih avangin, hei hi a pawimawh hlein ka hria a. Vawiih hian Performance Budget thehlut lote phei hi chu kan House hian mawilo lam nilo sela chu, an budget hi pass lo ngam hial ila, a tha mai awm mange aw tihte ka rilruah chuan a awm a ni. Khang kha ruling party lamte pawh hian in ngaihtuah ngun a ngaiin ka hria a. Tin, submit-na hun a la awm a, tunah pawh hian han prepare zung zung sela. Budget general discussion kan neih chhung pawh hian. Tin, a bik takin a hmasa lamte phei hi chuanin a tlangpui chuan famkim em em lo mahsela an submit deuh vek a ni. A ni ningana, chho velah hian a ni tan chauhva, ni 21/7/2011 hian a submit kim lo tan a, Industry leh Tourism-te a ni a, ni 25/7/2011 na chho te , tin, ni 26/7/2011 na te anih chhoh hlawm avang hian Department tan pawh Performance Budget siam lehna hman ala awmin ka hria. Kan House Leader zahawmtakin a sawi ang khan “Corruption hi a zung chawpin kan pawt phawi ang a, kan phoro ang”, a tihna tur atan chuan he Performance Budget hi hmanraw tha ber a ni, hei aia tha hi a awm lo reng reng, min kumkhat chhunga hna tur a rawn tihlan a, nikuma a hmanna zawng zawng a rawn tihlan baw a, annual report zawng zawng a rawn tarlan baw chuan corruption hi 50 % chuan a tla nghal ang. Performance Budget hi corruption tihtawp nan chuan hmanraw tangkai ber niin ka hria.

Tin, ka'n sawi leh duh chu Delegation of Financial Power hi nikum hmasa atang khan tum ruk vel kan sawi chhuak tawh a, Expenditure sanction hi a tawpah a inhnaw khawm a, kum tawpah pass tumin Finance Department kan nawr leh a. Helaiiah hian corruption pawh kha a awm a ni tih kha kan House Leader pawh khan a sawi a. Hemi chungchang hi vawi tam tak kan sawi hnuah, nikum khan 70 crore vel a lapse ta a. Hemi chungchang hian kan House Leader leh Finance Minister ni baw khan a sawi a, Proceeding page 892-naah khan a system siamthat hi a tul ta ber niin a lang a ni a ti a. Kan sawifo chu Financial Power sem sawm leh dan mumal tak neih kha a ni a, tin, a phok 890-naah chuan kan department hrang hranga Secretary-te hi Financial Power pek chin nei ila, a tha hlein ka hria tiin a sawi baw a. Khang angte pawh kha engtiang angin nge kalpui a nih tak tihte ka ngaihtuah a, mumal takin a system kan siam thar a, Performance Budget kan hman chhohva, uluk taka kan kalpui chuan, kan ram hi awlsam te a thang thei a ni. Mi nuaisawm lek kan awm a kan budget pawh a tha a ni, a hman dan dik leh fel thlep thlawpa tih anih chuan harsatna hi kan neih ka ring lova. Chuvang chuan uluk taka kan thlir hi a ngaiin ka hria a. Tin, kan department hrang hrang hi han en ila department puitling la ni chiah lo te hian Performance Budget hi an rawn thehlut tha em em a, SCERT Education atangin leh Prison atangin a ni baw a, tin, ATI atangin a ni leh a, chu chu DR & AR department a ni a, Prison chu Home hnuai a ni a, tin, Forensic Science leh Fire Emergency leh Civil Aviation - GAD atangin, tin, Directorate thar Geology & Mineral Resources kan han tihte atang hian tha takin an thehlut a ni. Hengte hi Directorate thar anni a, a tenau deuh te hian an ti tha em em a ni. A hranpa a Department anga dah pawh an la ni lova, chungte chuan an rawn thehlut tha a.

Tin, District Council ho hi sum kan pek that loh vang nge kan pek that vang nge ni rin aiin an ti tha a MADC te, CADC te, LADC te heng hian an rawn thehluh thlap a ni District Council Affairs-ah khan, Chakma Autonomous District Council hian an ti tha ber a. Hengte pawh hi hrek an hlauh vangin performance report an rawn ti tha anih ka ring, an fund-te hi kan lo delay deuh thin a ni maithei a ni, chuvang chuan kan State Sorkar hian fund a release that duh loh an hlauh avangin; Performance Report hi tha takin an rawn thehlut a nih ka ring a, performance budget bu-ah hian tha takin a rawn chuang tlat a ni. Amaherawhchu, department lian lian leh plan fund ngah ngah hian an thehlut lo a ni. Chuvang chuan, an sum leh pai hmanna tur crore za tel fe hi chu performance report-ah hian a lang dawn lova, work programme pawh a lang hek lova. Chuvangin kan ramah hian sum leh pai kan hman dan hi a mumal lovang tih ka hlau em em a ni. Vawiinah hian a sawi chhuak hmasa berah pawh han tang ila, chuvangin department la thehlut lo zawng zawngte pawh hian rawn thehluh hman vek sela a tha awm mang e aw? tih hi ka rilruah chuan a lian em em a ni.

Kan House Leader portfolio-ah pawh hian General Administration Department-te, Power tihte a ni a, a dang hi chu Minor Irrigation te, Fisheries te, Soil Conservation te hi chuan an ti tha em em ani. Amaherawhchu, PWD hi plan fund-ah crore 171.79 vel hmang tur an ni a, hei hi a mumal lo khawp a, tin, Power Department-ah hian crore 39.54 hmang tur an ni a plan budget atangin hengte pawh hi duhthu a sam lova. Tin, Industries-ah hian crore 22.30 vel hmang tur an ni a, Tourism hi chu nuai 332 vel a ni a, plan fund-a an sum neihte ruahmanna awm lo leh thehlut lo zawng zawng kha vawiin hian han sawi chhuah a thain ka hria a. Tuna kan budget hrim hrim kan pass tur hi chu pass mai tur pawh a ni a. Tin, department luhchilh tur pawhin Performance Budget a awm loh hi chuan Budget bu lian atang ringawt hi chuan han en ila, break up an ziak ringawt a, engmah hriat theih tur pawh a awm lo. Vawiinah hian Mizoram Budget general discussion-ah hian heng thu hi ka sawi ve duh chu a ni e. Ka lawm e.

SPEAKER : Tunge sawi leh dawn le. Kan chawl rih mai dawn em ni sawi tur in awm loh chuan kan wind up tir mai dawn em ni? sawi turin awm lo maw, a tawp lamah hian a sawi kha in chuh leh si ang e, tunge sawi dawn? Sawi tur in awm lo maw. Pu Chawngtinthanga.

Pu CHAWNGTINTHANGA : Pu Speaker, kan in khek hlawm a ni ang e member zahawmtakte. Tlema zawng kan sawi ve ang e. Hei kan Budget general discussion kan han nei dawn a nia, kan thlir dan a inang lo nual ang a, thian zaho saipui hmu pawh an report dan a inang lo a, a thenin a mei atangin an tan a, a thenin a ngho atangin an tan e an tih thin ang deuh khan, kei chuan Fiscal Management lampang atangin ka thlir a, chutiang zawng chuan ka'n sawi ang a.

Kan hriat theuh angin Mizoram State hian Fiscal responsibility on budget management 2006 kha siam tawh a ni a. A tul ang zela hei hi amend zui a ni nghe nghe a ni tih kan hre tlang a. He Fiscal Responsibility on

Budget Management Dan siam leh Fiscal Deficit tlak hniam zel hi debt relief leh debt write-off atan a pawimawh em em a. 12th Finance Commission pawh khan pre-condition atan a siam a ni tih kan hria a. Tichuan 13th Finance Commission rawtna hrang hrang a lo awm leh a henge tihlawhtling turin Mizoram sorkar-in nawrna pressure a tawng zel tihte pawh rawn tihlan a ni a. Central Sorkar atangin sum (resources) kan dawn hian kan mamawh a phuhru zo si lo a, State Sorkar hian keimahni sum dehchhuah, own resources hi kan tihpun nasat a ngai a ni tihte pawh Budget Speech-ah khan kan Finance Minister-in chiang takin a rawn sawi a. Tichuan 1st April 2005 a VAT kan han lak khan State own tax resource chu a lo pung chho a, a lawmawm hle a. Tichuan kum 2011-2012 ah hian crore 173.17 tling chho tura chhut a ni nghe nghe a ni. Central tax leh Excise duties-te kan dawn ve hi a pung chho ve zel a, kum tin 15% aia tlem lo in a pung ve zel a ni tih pawh Finance Minister-in a rawn sawi a. Hetiang hian Financial Year 2011-2012 ah BE-ah hian crore 709.73 nei tur angin kan in chhut a ni. Grant-in-aid pawh a pung zel a, Central Grant-in-aid hi kan State Fiscal position hriltu ber a ni pakhat nghe nghe tih kan hria a. Tin, non-tax revenue collection lamah pawh kan tha hret hret zel tih kan hmu a, amaherawhchu, heti chung hian Fiscal Deficit tihnam turin tan a ngai nasa fe tih pawh Speech-ah khan kan hmu a ni. 13th Finance Commission leh FRBM-a 2006 ruat ang chuan Fiscal Deficit hi 2010 leh 2011 ah GSDP 7.5 aia sang lo tura ngaih a ni a, tin, 2011-2012-ah 6.4 aia sang lo tura ngaih a ni tihte pawh kan hmu. Mahse Fiscal deficit hi 2010-2011 ah chuan 16.63 to GSDP crore 732.85- ah hian a ni daih mai a, ti chuan 2011-2012 ah hian fiscal deficit hi 5.86.to GSDP a ni, ziaawm lam a pan chho hret a ni.

Tin, kan non tax resources-ah hian 13th Finance Commission tuk chin ai mahin kan ti tha chho thei niawmin Budget speech-ah khan a lang nghe nghe a, hetiang dinhmuna kan din chhohna chhan hi kan state sorkar-in uluk taka finance management a khawih avang leh fimkhur tak leh inrenchem taka ngaihtuahna a hmanin fiscal control a exercise vang niin a lang a, chuvang chuan a lawm awm hle a, sorkar chungah pawh hian lawmthu ka sawi a ngai hlein ka hria. Amaherawhchu, heti chung chung hian Finance Department hian sorkarin challenge tam tak kan neih te hmachhawmin a beih chhoh zel a ngai a ni. Hengah te hian han sawi chhuah atan chuan public sector unertaking chhe mek, tla chhe mai tur ni a lang te, sum leh pai mai nilova remhre tak leh thiam taka ngaihtuah a ngai. Tin, pay revision te, Muster roll employee hlawh tihsan avanga state sorkar-in fiscal stock kan tawh te, siamthata, (tide over) ngai baw si te, tual chung tharchhuah kan neih mumal loh avangin buhfai supply leh chini supply-te tihhniam ngawt theih ni si lo, chutiang bawkin electric supply tihhniam theih ni ngawt si lo, heng kan mamawh chawp luhna tura pawisa maktaduai tela pek chhuah ngai reng si, henge han manage chawp ngai baw nen, ram chhengchhia kan nih avanga inkalpawhna kawng tha siam a ngai a, leilung nghet lo ram kan nih avanga min leh kawng siamthat pawh tlo hlei thei lo, siamthat ngai reng mai si te, ngaihtuah ngai baw nen. Tun hma lama tuihna tha te lo kang chat a, khawtin, vengtin maite pawh tui thianghlim pek belh ngai nasa zual em em mai te, mihring kan lo pun zel avanga zirna sikul tam zawk kan mamawh a, sikul tha zawk kan mamawh a, chung buatsaihna a tana sum dapchhuah ngai reng mai si te, khawpui chang lo zokhua thleng pawh a hriselna ngaihpawimawh a ngaih chhoh avanga Health Department atanga hmalak ngai nasa em em mai te leh ei leh bara kan intodelh theih nana mirethei zawkten eizawna nghet an neih theih nante nasa taka Sorkar hmalakna tihlawhtling tura kalpui zel leh a sum mamawh kan neih theihna tura tun mai ni lo a,

hun lo kal zel atana Sorkar sumpui dinhmun ngaihtuah ran chung bawk siin hetiang hian Budget hi kan siam a ni a. Chuvang chuan kan budget han en thuak thuak hian hetiang dinhmun harsaa kan din avang hian hei aia tha lehzuala budget han siam hi tih rual ni pawhin ka hre lo.

Tin, thil pakhat han sawi kai kher ka duh chu, State Finance siamthat leh sawh ngheh tul em em avanga kan Sorkar-in fiscal policy a siam chhoh a rawn reflect hi a ni:- consolidated sinking fund atana 21.75 crore invest tur a rawn tih te, guarantee redemption fund additional investment 100 lakhs dah tura tih te, collection of revenue stamp tih te, water supply fee tihsan te, Transport Department in charge hrang hrang siam a tum te, compulsory registration of revenue tih te, registration of casual labours tih te, Bamboo tariff tih san leh PWD project a cess tihpun te, heng ho a rawtna hi a tha em emin ka hria a.

Kan hnathawh chuah ang zelin central atang khuan fund devolution hi kan hmu a ni tih kan hre theuh a. Kan dawngdah chuan engmah kan hmu hleithei lovang a, Central Finance Expert pakhatin a sawi a, an tih hi kan hriat atan a pawimawh hlein ka hria. 'The Central should not be expected to compensate lack of efforts' a ti a ni. Chuvangin kan theih tawkin kan sum pai deh chhuah hi thahnemngai takin tihpun zel kan tum a pawimawh hlein ka hria a. Kan hla pawhin thawk zel la, i thawhah lawm rawh. Thawhrim hi chawlhna nuam a ni tiin a sawi nghe nghe kha.

Tichuan chutiang ka sawi pah chuan nichina member zahawm tak, Pu K. Liantlinga'n a rawn sawi kha ka support khawp mai a. Work programme leh thil dangte kan han thlirin, performace budget-te kan han thlirin department tamtakah chuan an thawk ngei a ni tih keipawhin ka hriat chian te, mahse an rawn reflect loh a awm tlat mai a. Hetah hian kan sorkar official-te hian an tih tur an ti tawk lo deuh a va ni mai awm ve aw, tih ngaihtuahna ka nei deuh a.

Entirnan, department hrang hrang chu ka sawi lovang a, Saitualah leh Phuaibuangah khian Water supply project PHE hian a kalpui mek niin ka hria a. Saitual ami phei chu kan House Leader zahawm tak hian a han hawng nghe nghe in ka hria a. Amaherawhchu hei hi ka han thlir a, khawiah tak lang ve ang maw ka ti a. Work programme-ah a lang si lo a, Performace budget-ah a lang bawk si lo a, Hetianga lang lo atan chuan a uiawm hi ka ti ngawih ngawih mai a. Chuvangin kan department officers te hian an tih awm tak leh an tih turte hi Chiang taka an tih hi a van tha em! Central lam atanga lo kal Scheme thenkhat hi chu Budget-a reflect kher ngai lote pawh a awm an ti a. Chung ho zingah chuan an lo tel nge ni ka hre lova. Chu chu ka han sawi chhuak ve hram duh a.

Tin, chubakah khi ka bial chhungah, Vanbawngah khan nikum lamah daih tawh khan Water Supply Project hi a pump chi lehngal, PHE in an zo fel der tawh a. Mipuiin tunah khian an chhawr tangkai tawh a. Amaherawhchu, hei hi Performance Budget-ah hian a lang lo tlat mai a ni, tih kha ka han sawi duh a. Tin, a dawt lehah chuan han sawi lang hram ila. Helaia Statement to the Budget, Details of Fund Transfer to Local Bodies, tihah hian a lo lang thliah thliah a. Khilala bialtu MLA nih ve manah Sinlung Hills Development Council-a Fund transfer hi ka han en a. A beitham deuh hlekin ka hria a. Khilai Area-ah khian, State nu leh pate hian min ngaihthah deuh bik a ni tia lungawi lohna hun rei tak ata a lo awm tawh thin a. Mahni chan ang tawk tur chang lo ni a inngaihna te, hmuh tur ang hmu lo ni a in ngaihna te

avang hian lungawi lohna hi a lo awm thin a ni a. Chuvangin kan sorkar pawh hian, 'a ni tak e, a bik taka enkawl ngai a nih hi mawle, helai area hi', tiin Development Council pek an lo ni tawh a. Kum tam tak a kal tawh a. Development Council hi a mumal leh a taka changa development hnathawhna hi hmuh tur a awm lo em em a. Tunah chuan beiseina sang tak neiin mipui te an awm laiin helaia Fund lo kal hi a beitham deuh hlekin ka hriatpui a. Khilai area khi Border Area Development Fund hmu ve lo, tin, Backward Area Grant Fund pawh hmu ve lo, Normal Development Fund a tih hram hram an nih avang hian kan sorkar hian Special Package-a development han pek dante pawh hi ngaihtuah sak theih nise a va duhawm em, tiin ka han sawi chhuak duh a. Tichuan, chung zawng zawng sawi pah chuan vawiina kan Budget, General Discussion kan neihah hian he Budget hi a tha tawk thawkhat e, kan dinhmun harsatna zawng zawng tied over chung a inngaihtuah chungin hetiang a Budget an rawn siam hi an fakawm e, tiin ka thlawp e. Ka lawm e, Pu Speaker.

SPEAKER : Hun i hmang thiam hle mai. A lawmawm khawp mai. Tunge sawi leh dawn le? In kian lo khan han sawi zung zung teh u. Ngaihnawm deuhin han sawi teh u. In reh vung vung zel mai a. Lt. Col. Z.S. Zuala.

Lt. COL. Z.S. ZUALA : Pu Speaker, ka lawm e. An sawi duh hmel loh hlawm riau a. Chuvangin ka'n tlawmngai ang e. Hei, Budget Speech kan Finance Minister zahawm takin a rawn present hi tha ka ti a. Kan Budget hi a hun takah an present in ka hria a. Kan present tlai avanga hloh kan neih ka hre lova. Planning Commission atanga grant hmu kan nih avangin anni zai ngaia kan budget hi present a ngai tih kan sawi chamchi a. Chuvangin a tlaina ka hre lova. Chuvangin budget-ah hian harsatna bik deuh hlek an nei ni awma a han sawilan pay revision kan tan a. Tin, chu bakah kan ration nasa taka kan subsidise a ngai a. Hemi avang hian kan Sorkar hian harsatna nasa tak a hmu a. Hemi kara budget han siam chhuah pawh hi thiam a har viau awmin ka hria.

Tin, pawisa sanction thuah kan simplify anga tih hi a tha hlein ka hria a. Budget Estimate department hrang hrangin an ti a, an discuss a, engkim an approve hnuah budget an present thin a ni a. Hemi kara sanction tur a dawhkan tam tak kal tlang ngai an han sukiang hian awlsamna leh efficient-na tur kawng a hawngin ka hria a.

Tin, hei, M.R. Wages-ah hian 30% dah a ni a. Mizoramah hian M.R. te hi kan tihleihluak ta deuh emaw ni chu aw, tih turin a awm a. Ni 90 chinah chuan M.R. te hi a hranpaa lak leh zel tur tih dante a awm a. M.R. te regular-a kan rawih rei lutuk chuan a neitu emaw te an inti a, inbante pawh a har a. Department hrang hrangte hian kan M.R. te pawh hi control deuh ila. Chuti lo chuan association-te an siam a, a tawpah min vau let zaw mah mah a. Hengte pawh hi sorkar hian en ngun deuh se a tha ang.

Tin, hei, Defined Contributory Pension Scheme kan introduce hian nakin zelah kan pension payment problem nasa takin a solve dawnin ka hria a. Hei hi a tha dawn hlein ka hria. Hmun hrang hrangah hei hi an lo ti tawh a, Defence-ah te hian an tan tawh a. Hemi kan lo zawm tur plan fel tak an rawn siam chhuak hi a lawmawm a.

Tin, allocation a rawn siamah hian Urban Area share hi a lang lova, hei hi ka hriatthiam loh vang pawh a ni mai thei a. Aizawl khaw chhung hi, AMC te kan nei a, rural development scheme tam takin min tinsan a, a scheme thar hi tun transition period-ah hian kan nei ta mai baw si lova, entirman, NREGS te kan nei tawh lova, kan mirethei inhlawhfakna turte a lo bo a, mirethei in sak scheme te a awm tawh lova, thingtlang lamah rangvate an sem chur chur a, Aizawl khaw chhunga mirethei in sakna tur rangva pawh kan hmu ve tawh lo. Hmanni lawkah mautam kan tuar a, rawtuai leh thil dang kan preserve turte hi Bazarahite hian an zuar leh vak tawh mai a, hengte hi environment leh forest lam te hian uluk deuh hian enfiah thei sela ka ti khawp mai.

Tin, Local Area Development fund-ah hian 25 lakhs min pe a, fund zawng zawnga hman that ber a ni tih kan hre tlang a, hei ai hian tihtam deuh hleka allotment dang atangte pawha han pek a phu khawpin ka hria, MLA fund hmang tha lo tih hi sawi tur a awm vak lovang, mahse Department-in an hman that loh complaint hi a tam si a; chuvangin MLA fund-ah hian a tam zawk thun thei ila chu kan thatpui ka ring.

Tin, World Bank Road-ah hian Aizawl atanga Lunglei hi Km. 71 in a tawi ta a, a lawmawm hlein ka hria a, hei hi tunhma kan House Leader-te hmalakna kal zel kha a ni a, tunah hian kan lo hmang tangkai ta a ni a. Amaherawhchu maintenance-ah hian problem kan nei dawn, hmanni pawh kan bial chhung World Bank road-ah kan tlan a, lei tla leh khuarkhurum a awm a, repair a ngai dawn, repair lova kan hnawh khawm chuan nakinah pawisa harsatna avangin kan repair thei lo mai ang tih a hlauhawm a ni.

NLUP-a allotment hi a rawn sawi a, a tam khawp mai a, kan budget pumpui allotment atang hianin a percentage a sang khawp mai a, allotment an han siamah pawh hian BPL-ah hian beneficiaries hi 34% dawn lai a awm a hei hian kan Finance Minister hian miretheite dawm kan nan pawisa hi a pe tam a, mirethei hi a ngaihtuah tih a chiang hle mai a, amaherawhchu, mi tam takin an sawisel a, a muang an ti a project lian reng reng chu planning chhung hi a rei a, a execution erawh hi chu a awlsam zawk thin a. Tunah hian planning stage kan zo thawkhat tawh a execution-ah hian kan lut tawh, hei pawh hi tha takin kan kalpui thei turah ka ngai. Tin, kan harsatnate leh a lohtheih lohna avanga Tax khawnte hi a rawn propose a, a rawn sawi a, hei hi tha ka ti a. A neitu kan nih chuan Tax pekte hi kan ui tur a ni lo, mi tam takin an sawi a, sap ram hmun changkanga awmte chuan tax pek theih loh te hi an zak a. Ka hriat reng chu, kan nau pakhat sap rama awm, a nau neih laiin hnathawk thei lovin a awm a, free-in grant an pe a, a zahthlak khawp mai a ti a. Khatiang ang attitude, khatiang mentality kha kan develop ve theih hun hi a nghahhlelhwam hlein ka hria a. Chuvangin kum tluana hemi tax khawn hi a inthlahrung lo turah ka ngai a, kei chuan, hei aia tam pawh hi la khawn se a awm ka ti khawp mai.

Hei, Labour Welfare-te pawh hi an han ti a, hei hian mipui, mi hnuaihnhung zawk tana sorkarin hma a lakna a tilang chiang hle a, hei hi tha ka ti a. Hetilalah, Police-ah, P.T.C. an lo transfer tih ang te, Police Training Centr-te chu establishment lian a ni a. Training Centre-te hi chu Battalion-te ai chuan Establishment lian zawkah an ngai a, a command pawh a lian zawk a. P.T.C. hmun zau zawk leh expansion remchang zawka an lo sawn hi tha ka ti a. Local

miten an lo ui a, hetiang local mi tam takin sentiment avanga lo ui beh rikngawt kha sorkar Planning-ah chuan khatiang mai mai khan min ti sukuk turah ka ngai lova. Sorkar kan ni a, sorkar angin kan function anga, N.G.O kan ni lo tih hi hriat fo a tha a, khatiang anga hma an la hi lawmawm ka ti a. Nakinah chuan P.T.C. ah te sawn Establishment chi hrang hrang Training Wing chi hrang hrang tam tak kan la tihbelh duhah ka ngai. Hman deuh khan Infantry School Mhow, Maharastra-ah khuan Belgaum-ah sawn tur an ti a, khunglaia Maruari leh mihausa ho khan an ui a, sawn lo turin Prime Minister thleng an thlen a. Mahse, an sawn tho, a chhan chu a hmunin a zo tawh lova hmun tha zawkah an kal a ngai a, khatiang deuh khan kan thatna tur a nih kha chuan hetiang ang thil tam tak hi kan paltlang a ngai.

Tin, MPSC-in Exam Hall tha deuh mai an nei hi a lawmawm ka ti a, tunah MPSC Chairman tha tak kan nei a, an ni ho hian MPSC pawh hi fuih an ngaiin ka hria. Kan Officer turte pawh hi selection-ah hian kan fimkhur hle a ngaiin ka hria. Induhsakna avanga, a tha lo zawk, a tling lo zawk lak te hi nakin hnua kan tuar tur a ni a. Chuvangin MPSC pawh hi tang se, kan Selection system hi him se. Tun thleng hi chuan MPSC in an select Officer-te hi sawiselna em em a la awm lova, chuvangin hetiang tradition, hetiang culture-a an kal chhoh zel theihna tura hmalakna tura examination hall tha zawk kan nei thei hi, hengte hian a pui theih em em turah ka ngai. Tin, hei Fiscal Reform Central Finance Commission-in a rawn recommend vaibelchhe 79 emaw vel tal hi keini hian kan lo contribute ve tur a ni tih hi tlin hram tum ila, kan tlintheihna tur kawng tax collection-te a rawn sawi a, kha kha kan tih chuan kan tlin ve turah ngai ila, ram te tak te kan ni a, kan in mobilized chuan hetiang amount tam vaklo te hi chu kan ti thei ve turah ngai ila, Sorkar department reng reng hian thil tam tak, luxury item hi kan uar lutuk a. Motor thar lei te hi a tam lutuk a, hengte pawh hi in control thei ila a tha hlein ka hria. Petrol leh diesel man percentage san dante hi heng aia la tihsan ni se thain ka hria a, LPG erawh hi chu hetiang hian kal ta se, petrol leh diesel man hi tisang mah ila, a pawilo hei ai hian la san leh ta zawk ila, diesel erawh hi hnathawh nana vehicle tam takte hman a nih vang hian ngaihnathiam pawh a ziaawm maithei a, Kan hriat angin Aizawl hi traffic jam avangin kan che hleithei tawh lova, petrol-te pawh hi sang deuh hlekin tax ta ila, hengte pawh hian kan traffic-te pawh hi min shortout pui mai thei a. Tin, stamp reform registration man an lakte hi a tha a, tin, LSC hi han sawi ka duh a, mi tam takin LSC thingrem khat khatte an nei a, chutih laiin mithenkhat NLUP a hnathawhna tur ram neilo an awm lai hian, ram zau tak tak neia hmangtangkailo ho hi chu engemawti a insem tlan dan ngaihtuah a dan fel tak siam hi a thain ka hria a. Tin Registration of Casual Labour hi a tha ka ti a, hei hian kan ILP control-na thleng hian min tanpuiin ka ring, hemi registration hi a ngai a. Tin, Labour ho Welfare atana Scheme an siam hi a tha ka ti a. Mi tam tak nihnih khat an inhlawhloh chuan ei tur an neilo mai a, khatiang ho welfare-na tur kawng zawnga Sorkarin sum a lo ruahman-te hi thiltha niin ka hria. He budget hi a thlamuanthlakin ka hria a, mipui mirethei te tana budget a ni a. Tin, tax collection thua hian hman deuh khan Nagaland-ah kan kal a, an road tax collection-naah chuan heti lamah hian Sorkar tax collector an awm a, heti lam pangah hian ramhnuai mi collector an awm a. Hetami an pek khan ramhnuaimi ho an pek ve zel a ngai a ni. Amaherawhchu khang angte kha Mizoramah hian kan neilo, kan vannei hlein ka hria a. Hengte hi Remna leh Muannain a hrinchhuah a ni a (Speaker : Duhtawk dawn tawh rawh aw) Ka lawm e.

SPEAKER : Tunah Pu John Siamkunga

Pu JOHN SIAMKUNGA : Pu Speaker, hei kan budget puitling han pharh hi thil phurawm tak niin ka hria a, kan member zahawm tak tak ten thil hrang hrang an rawn sawi tawh a. Ka luhna erawh chu a rawn dang deuh hlek dawn a, tuna kan budget han pharh tak hi vaibelchhe sangli zathum sawmruk pasarih nuai sawmthum pali leh singhnih leh sangkua lai a ni a, a lawmawm khawp mai. Hetih lai hian kan fiscal deficit hi Gross State Domestic Product atanga tehin 2.4 percent chauh a ni a, fiscal management chu a la tha viau niin ka hria. Tin, kan outsourcing debt hi State Gross Domestic Product atanga tehin 49.6 percent ala ni a, 13th Finance Commission khan 85 p.c chin kha himah ala ngai a, chuvangin kan la him viau ah ka ngai a ni.

Hei tun 2011-2012 a kan GSDP han project chhin chu vaibelchhe sangsarih zahnih sawmparuk point 75 crore a ni. Hetih lai hian service sector-in 59.47 % a rawn tum a, Industrial sector-in 21.97 % a rawn tum a, Agriculture sector-in 18.56 % a rawn tum a ni. Hemi alan dan atang hi chuan kan service sector in a tum lian ber a, Industry lamah tan kan lak a ngai tih a tilang a. Agriculture lam pawhin nasa taka tan a lak a ngai tih a tilang a ni. A bikin Industry lamah a private players, Private Investors hi awm tha thei sela, Department lam atanga Corporation emaw helampang sumdawna ai hian private investors-te hi encourage zawk ta ila, abikin hei NLUP kan beih chhoh mekah pawh Industry lama hmalakna a awm chho zel dawn a, hengah pawh hian kan private players hote kan hlut thiamawmze neia kan hman tangkai chuan helaiah hian contribution nasa tak an rawn neih theih ka ringa, a vang chu an ni chuan hlawhtlin loh hlaua bei an ni thin a. Corporation hmanga sumdawng ho hi chuan an hlawh a kiam ve chuang lo ti zawnga ngaihdan neiin an tan hlawhtlin a har bik thin a. Industry lama hma kan lakna hian thui tak a rawn la sukiang ang tih ka ring a.

Tin, Agriculture lamah pawh hei NLUP hian nasa takin hma a la a, helamah pawh hian contribution nasa tak, hei aia nasain a rawn neih theih leh a rinawmin a lang. Kan hmuhna lampangah hian hei tuna kan Budget-ah hian States own tax revenue atang hian cheng vaibelchhe 173 vel kan hmu a, ala beitham hle a ni. Tanlak a ngai tih hriain kan Finance Minister zahawm takin a speech-ah pawh a tawp lamah khan kan tanlak ngaihna lai tur thenkhatte a rawn tarlang nghe nghe a ni.

Tin, States Own non-tax revenue lamah hian cheng vaibelchhe 237 a rawn lang leh a, chulaiah pawh chuan kan thawhchhuah tur ngau ngau kan thawhchhuah vak loh avanga kan tum anga la sanglo a tam, chumi anih avang chuan tan lakna tur thenkhatte kan budget speech-a lo lang ang khan helamah hian hma kan lak chuan hei aiin kan la improve thei ang tih a lang a. Chumi anih loh chuan kan State sum kalphung leh a dinmhun hi a tha vaklo tih a chiang, tin Central Taxes and Duties lam atang hian vaibelchhe 709 lai a lokal thung dawn a Tin, Grants-in-Aid kha Central Sorkar atangin cheng vaibelchhe 2627.29 crore a lokal dawn bawk a ni. Tin, Loans & Advances atangin vaibelchhe 493 kan hmu bawk dawn a. Khang kha kan Budget kalphung a rawn siamtu lian zual deuh deuhthe kha an ni a.

Tin, kan hmanna lampang tur ve thungah hian sorkar hnathawk hlawh atan hian kan budget atangin cheng vaibelchhe 1447.72 kan hmang dawn a ni, chumi awmzia chu za zela 33% kan hmang dawn a ni - sorkar hnathawkte hlawah a kal ral dawn tihna a lo ni ta a.

Tin, pension-ah hian vaibelchhe 219 zet a kal ral anga, loan puk interest kan pekna atan vaibelchhe 270 vel a kal bawk dawn a ni. Administrative cost-ah vaibelchhe 707 vel a kal anga, hmasawna programme kan thawhna tur chu a kiam chho duak dawn tih a lang a ni. Amaherawhchu, thiam takin kan budget khawihtu, kan budget han siamna lamah leh helama kan sulsutu ber kan Finance Minister in rawtna hrang hrang a rawn siam atang hian hetiang expenditure hi chu kan meet thei turah a lang a, kan budget ah hian a rawn chiang viau a.

Tin, chutih bakah chuan AMC leh V/C te, District Council te tana sum pek tur cheng vaibelchhe 186 lai lo awm “supplement to budget” ah khan a lang a, khangte kha a lawmawm a ni. Chumi awmzia chu he sorkar hian AMC te hnena sum dah tur tam tak a neih zia te a rawn lang ta a, tin V/C zasarih chuang hnena sum pek turte a rawn lang tawh a ni. Tin, chubakah District Council te sum pek tur, normal fund pihlama pek turte a lo awm ta bawk a, khangina a entir chu he sorkar hian decentralization of power hi a ngaipawimawh a. Tin, chubakah thingtlang leh khaw hrang hranga kan roreltute ngaipawimawhin inawpna tha an neih theihna turin nasa takin a voh a ni tih a rawn lang bawk a ni.

Tin, budget-a lo lang pawimawh leh ta em em chu hmun pawimawh ber kan chantir, vaibelchhe 234 lai lo lanna NLUP kha a ni. Kha kha miretheite tan, mipui, he budget rawn thawkchhuaktute tana kan siam, he sorkarina a thil tih ropui tak niin ka hria a. Hei hian kan economy hi nasa taka chawikang turin kan beisei a, mi retheite nasa taka chawikang turin kan beisei a, dinhmun tha nei lo, eizawna tha neilo te eizawna tha tak a siamsak anga, Mizoram tinuamtu leh Mizoram tana contribution nasa tak neitu citizens tam tak ala chherchhuak dawn a ni tih a lang a ni.

Tin, a dang leha chuan kan budget speech-a lo langah khan ‘Administrative Initiatives’ tihah khan, Taxation Department tihchangtlun tumna lo lang kha a lawmawm khawp mai a. Avang chu Taxation Department lam atanga kan chhiah khawn hi 2009-2010 ah khan za zela 79.88% lai kan chhiah hmuhah khan a han luah phak a ni, an hmu tam khawp. Amaherawhchu, a hnuah a rawn tlachhe leh ta si a. Chuvangin, nichin lawka kan hmuh takah khan ti hian a rawn inziak a. ‘It was an unacceptable development’ a rawn ti hial a ni. Kan chhiah hmuh tlakhniam chhoh zel dan kha. Chumi chu a nih avangin kan Finance Minister zahawm takin he Taxation Department hi tihchak a ngai a ni a ti a, budget speech-ah hian. He Sorkar hian management lamah nasa takin hma a la a, a ngaihna a hria a ni tih a rawn langin ka hria a. MIS (Management Information System) mai hi a tawk lo. Hemi anih hi chuan tu ten emaw eiruk theihna a la tam em mai tiin National E-Governance Project vaibelchhe ruk leh nuai 91 lai project an siam a ni. Chumi chu a hlawhtlin hunah chuan Tax kan pek dan pawhin awmzia a awm tawh ang a. Tah chuan Web base VAT in kan kal tawh dawn tihna a ni a. Kan payment system pawh

e-payment a ni tawh ang a, e-registration kan ti vek tawh dawn niin a lang a. Chuvangin, he Budget Speech leh he Budget pharh hi a ropui hlein ka hria.

Tin, a dang lehah chuan, Tax and Non-Tax proposal kha nichina kan hmuh te kan sawi tawh a. Duhthu a la sam lo mange aw kan tih lai te kha siamthat tumna a rawn awm bawk a ni. Chumia lo langah chuan _____ 'Revision of Sales Tax and VAT' tih te a lo lang a ni. Chumi kan sawi duh lai chu kum 2010-2011 Budget Estimate-ah khan crore 96.93 kha VAT atanga hmu turin kan inngai a ni. Hei hi kan hmu chiah lova, 80 crores vel kan hmu a. Kuminah erawh chuan cheng 135 crore lai hmuh tuma hma lak chhoh a ni ta a. Hei hian chhiah lak siamthatna avanga hmasawwnna a rawn thlen dawn niin a lang a, a lawmawm a. LPG ah te 2% in kan up a, Petrol-ah 2%-in kan up a, Diesel-ah 2% in kan up a. Kha khan thui tak hlawhtlinna a rawn thlen ngei dawn a ni.

Tin, chubakah chuan, hemi VAT chungchangah, a bikin retail-a thil kan hralhchhuah te atangin VAT kan la a. A wholesale-a kan hralhchhuah te atangin VAT kan la bawk a ni. Kan Tax lak danah hian phaia kan kal chuan kan hre vek a. Loh theih lohvin receipt min pe thin a ni. Receipt min pek atang khan kan han chhut a VAT hi a lo lang ve kiau thin a. Chumi awmzia chu nitin State Treasury-ah khan sum a lut reng tihna a ni. Keiniah erawh chuan khatiang kha a awm ve lova, retail-a kan hralhah te hian VAT hi keimahni Sorkar suma lut lovin mimal pockect-ah hian a lut hnem hle tih a Chiang a ni.

Tin, chubakah Way-Bill kan pe a, Way-Bill kan pek hian ₹ 20/- dawr nei silo te hi kan pe thin a, a form manah khan. Chu chuan phai atangin an zuk phur a, a pawt takzetin ka hria.

Kan sawi leh zawr zawr ang e. Stamp Registration-ah hian kum 2010-2011 ah khan Budget Estimate-ah cheng nuai 70 a lo lang a. Tuna chhetea han tihsan tumnaah hian thui takin hma a sawn dawn tih hriat nan cheng 125 lakhs lai a rawn lang tawh dawn a ni.

Tin, chutiang bawkin Water Supply-ah te, hei hi State Non-Tax revenue lam a ni a. Hei hian thui tak hma a rawn la thei dawn a ni tih hi kan Budget Estimate atang hian a rawn lang a, nikum aiin hma kan sawn dawn tih a lang. Tin, transport chungchangah pawh chhiah tam tak kan hmuh belh dawn tihte a rawn lang bawk a. Tin, chu chauh niloin Compulsory Registration of Revenue Related documents-ah hian nikuma cheng vaibelchhe hnih chauh an beisei laiin kumin hian cheng vaibelchhe 10 chuang beisei a ni. Hei hian nasa taka kan than tur a kawkin ka hria a. Tin, Compulsory Registration of Labors kan tih ah khan nikum lamah khan cheng singkhat chauh kan dah ngam a ni. Kuminah erawh chuan hemi hnuai ah hian crore 5 kan budget ah alo lang ta. Hei hian hmasawwnna a siam dawn, a bik takin work force kan ngah a, heng atanga cess kan khawn hian thui tak hma a la dawn a ni tih hei hian a rawn ti langin ka hria a.

Tin, chu bakah, vawiina kan labourers-te hi train ngai an ni. A dik tak chuan hnam dangte nena kan chhawr dun chuan kan mite hi kan chhawr duhlo deuh zel. Engatinge a chhan kan tih chuan hlawlhfa awmzia, hlawhfa nuna nun kan thiam

loh vang a ni. Heng atangte hian training thate Labour & Employment department hian ti se, chu chuan nasa takin min pui anga 1% cess te pawh lo khawn ta ilangin sum a rawn thawk chhuak nasa anga, kan mite chhawr tlakin kan siam baw ang. A tawp berah chuan regular employees-te atanga eng eng emaw lak tumna lo lang hi a pawimawh bawkin ka hria a. Awle Mizoram mi kan ni a, contribution chu State-ah hian kan neih ve a ngai, kan kohhranah pawh contribution ka neih chuan ka inti ta tu thin ang bawkin, contribution State sorkara kan neih ve hian khua leh tui nihna dik leh sorkar mi nihna sorkar neitu min tihna a tilang chiangin ka hria a, he Budget hi ropui ka ti a, ka support e. Ka lawm e.

SPEAKER : Sawi tur kan awm tawh lo em ni? Pu B.Lalthlengliana.

Pu B. LALTHLENGLIANA : Pu Speaker, ka lawm e. Kumina kan budget hi a tlangpui, tuna ka hma miin a sawi anga luhchilh kha ka tum hran lo a. MNF Term tawpa MNF Plan Budget kha vaibelchhe 1000 a ni a, he Sorkar a lo din khan an budget chu cheng vaibelchhe 1250 ah alo pung chho a, 2010 – 2011 ah chuan cheng vaibelchhe 1500 ah a pung chho a, 2011-2012 ah cheng vaibelchhe 1700 in a lo chho va. Nikum lam aiin cheng vaibelchhe 50 in a tlahniam ta hi a pawl ka ti khawp mai a, a chhan chu tuna kan Budget-a langsar zualah khan NLUP te MLA LAD te, Lunglei High Power Committee te, Rajiv Gandhi Stadium leh Thuamluaia Mual tihte Plan atanga pek tumna alo lang a, kum dang anga a pun ang khan pung chho sela chuan heng han pek hi thil uiawmlo tak pawh a nih ka ringa. Amaherawhchu cheng vaibelchhe 50 laia alo hniam chung pawha hetiang dah an ni tur hi a thente hi chu a awm ka ti a, NLUP hi sorkar Flagship policy a nih avangin cheng vaibelchhe 234 dah a ni hi policy tihpuitlin nan chuan thil awm pawh a ni anga.

Tin, chumi piah lamah chuan Centrally Sponsored Scheme atanga cheng vaibelchhe 15.83 beisei alo ni baw a, kumin atan NLUP a pawisa dah hi a tlem lo a ni. Kum hmasa lamah mi engemaw zat, chhungkaw engemaw zat pek an nih tawh avangin second batch-ah mi tam tak sem theih turah ka ngai a. Tin, priority a lo lang ve si ah chuan MLA LADS cheng nuai 1000 chauh, a ngai lo lang leh hi chu department dang kan sawi chhiatna ni lovin department-a nuai 25 hman leh MLA tena nuai 25 kan hman hi a tha hlein kei chuan ka hria a. Hetianga priority-a lo lang ve anih si chuan nuai 25 chauh MLA in a neih hi nuai 30, 35 vel tal hi chu ni thei sela chuan MLA te tan hian a va tha dawn em, bial mipuite tan tih hi ka rilruah alo awm a. A chhan chu thingtlang lam bialah chuan kawthler tin mai hi step pawh mumal lo, kawr thuk tak tak awm, side-drain pawh awm lo, nasa tak mai a siam la ngai a ni. Chutih laia cheng nuai 25 chauh mai kan han hmang chho leh tur hi a lungchhiat thlak deuhin ka hria a.

A lehlam zawnga ngaihtuah chuan opposition MLA tlem te awm hi thik tham pawh kan awmin ka hre lova. MNF sorkar laia nuai 20 kan tih theih kha chuan Congress sorkar-a budget pun dante ngaihtuah leh Central lam atanga pawisa lokal dante han ngaihtuah hi chuan tlema min han tihpun sak leh hi ka lo beisei a. Amaherawh chu a ngai baw lo lang leh hi chu a lungchhiat thlak hlein ka hria a, helai hi ka sawilang duh a. Khawpui chhung eg, Aizawl angah te chuan UD & PA leh Department hrang hrangten nasa takin an chei a, khawpui chhung MLA fund hi chu hmanna a vang angreng hle a, an vannei khawp a ni.

Tin, hei Lunglei high Power Committee atana crore 7 lo langte pawh hi a awm ka tih pui a. Rajiv Gandhi stadium atana cheng vaibelchhe 15 dah hi chu kum 2005-2006 a 12th Finance Commission atanga cheng vaibelchhe 25 kan hmuh ang khan Plan atang ni lo hian 13th Finance Commission atang hian hmuh dan a awm lo em ni? Chuan helaia 15 crore Rajiv Gandhi Stadium atana hman tur hi MLA fund lamah te han kal thei sela chuan MLA tin te hi kan va lawm dawn em, ruling te pawh anni tho. Thingtlang kil khawr tak tak bialtute anni ve tho si a tih kha ka sawilang leh duh a.

Tin, Thuamluaia Mual atana cheng vaibelchhe 4 dah pawh hi a khaw neitu tan chuan a lawmawm hle ang a, a tha viau ang a, keipawhin ka lawmpui a. Amaherawh chu, Plan atanga han hmanna tur em chuan a ni thei dawn em ni ka ngaihtuah ve mai mai a. Chumi bakah chuan Transport-a chhiah lak tihpun tih kha chu hmannah helaiah bill-te pawh kan sawiho tawh a, kha kha chu tha kan ti a. Khua leh tui kan nih chuan chhiah laka ram inenkawlna ruahman hi kan tih tur a ni tih hi hmannah pawh ka sawi tawh a. Hei hi ka principle dik tak a ni a. Amaherawh chu, Revenue punna atana LSC leh Periodic Patta atanga compulsory registration tih kha ka hrethiam lova. LSC kan siam dawn hian pawisa tam tak kan chawi tawh a. Chutihlaia compulsory registration han tih leh kha a uchuak lutuk deuh lo em ni? Miretheite tan harsatna a siam lutuk lawm ni ka ti a. Chutih lai chuan ziak lan ve loh land lease atanga tih ve tumna awm lo ni a lang hi chu tha ka ti lo. Central Department hrang hrang ram nei ve teuh te hnen atanga lease compulsory registration ti ve ngei se tih hi ka rawtna a ni. Tin, Labourers leh Casual Employee atanga compulsory registration tihte pawh kha a tha ka ti a, awm ka tia ni.

Tin, Pu Speaker, Aizawl Indoor Stadium, Pitarte tlang ami hi 2007-ah khan 13 crore hmuh a ni a, chuta tanga bul tan a ni. 13 crore hian zo thei tura in beisei em ni ni ang aw, zawh theih tur anih avang em ni tunah hian Plan atanga alo lan ve loh tih kha ka'n hrechiang duh a. Tin, 13 crore -a zawh theih anih chuan engtik hunah nge khu khu hman theih anih ang tihte pawh kha ka'n hre chak deuhva. Tin, Champhai Indoor Stadium, kum 2007 DoNER atanga 12 crore kan hmuh atangin sak a ni a, tunah khian sak zawh tep a ni tawh a, khingte pawh khi tunlai thangthar infiam mite tan chuan a chhenfak awm dawn ngeiin ka hria a, ropui ka ti a, engtikah nge hawn theih anih ang tihte ka'n hre duh a. Amaherawhchu, Mizoram Sports Academy, Zobawk a kum 2008 a DPR cheng vaibelchhe sawmthum leh pasarih thehluh atanga cheng vaibelchhe sawmthum leh pali hmuh, wawiin thlenga hnathawh tur hmuh la awm lo hi engnge ni a chhan ni ang aw, a rei viau tawh bawk si a, pawisa kha dah reng anih khan khulam atante pawh a ngaimawh awm thei em? Tin, Mizoram thalai, a hmang turte tan pawh a va nghahhlehawm em, tih kha ngaihtuahnaah khan a awm a. Pawisa la thleng lo leh ngaihtuah chawp ngaite chu ni selang chuan a hriatthiam awm a, amaherawhchu, kum 2008 daih tawha pawisa kha hmuh niin a langa, chulai chu Pu Speaker, ka'n sawi chhuak duh bawk a.

Tin, Fisheries Department-ah hian kum 2010-2011 Revised Estimate-ah khan cheng nuai sangkhat leh sawmsarih pakua leh point sawmkua pasarih alo lang a. Tun Budget Estimate 2011-2012 ah hian cheng 1395/- lakh in alo lang a, a lawmawm ka ti khawp mai a hei hi. Ka chan ve hunlai atang pawh khan Fisheries hi kuthnathawktute intodelhna atana awlsam tak, kumkhat

chhunga intodelh mai theih a ni a. Horticulture te, Agriculture te a tha lo kan tihna ni lovin, heng hi kum rei tak tak nghah ngai te a ni a, chutih laiin Fisheries hi chu miin dil bigha sawm kum khata a siam chuan, kumkhat chhungin sangha quintal sawm, sawmhni a seng hman a, chu chu Mizoram mipuite tan hian a chhenfakawm dawnin ka hria a. Tunah hian Andhra Pradesh atanga sangha kan lak hi Crores and Crores a ni a, Mizoramin kan mamawh chauh tharchhuak tur pawh hian hmabak kan la ngah lutuk a ni. Chutihlaia remchang hre taka cheng vaibelchhe 1395 lo lang hi, a figure hi ka hmusual lo anih chuan lawmawm ka ti em em a. Hei hian sangha khawina lama eizawngtute tan chuan nasa taka hmasawna a thlen ka ring a, ka beisei baw a.

Tin, chutihlai chuan Sericulture Department-ah 2010-2011 Revise Estimate-ah khan 1587 a lo lang a, kumin 2011-2012 ah hian 533 chauh alo lang thung a, helai erawh hi chu engtizia nge aw ka ti a. Sericulture leh Fisheries hi kuthnathawktute tan a immediate intodelh theihna leh thil tih awlsam a ni a. A market-ah Sericulture hi a buai ve ngai lova, vaiho mi maktaduai tel tam takin silk puan an ngainat chhung hi chuan MoU market atan sign a ngai ve lova, kg.-ah cheng za leh tihte a ni daih a, kum khatah cocoon tam tak an thar thei baw a, a chaw tur nise mulberry hi tun ang thla chhovah chuan satchhum hmawh ila leiah vit phun ilang a nung zel a, chutiang khawpa a chaw a harsa lo anih laia nikum aia heti tak maia an tlahniam hi enge he department kal dan tur kan hmuh dan hi ka hre lova, chu chu paw ka ti a ka sawi chhuak duh baw a.

Tin, Pu Speaker, PWD in kumtina sum maintenance atana an mamawh mithiam ten an sawi hi ordinary repair-ah hian cheng vaibelchhe 37.740 a ni a, periodic repair-ah hian cheng vaibelchhe 76 a ni a, tin, flood damage repair-ah hian cheng vaibelchhe 22.749 a ni a, special repair-ah hian cheng vaibelchhe 22.748 a ni a. Hei hi an mamawh anih laiin tunhnaiah Finance department lam leh Engineer-in-Chief lamah PWD lamah inhriatthiam lohna lai a awm a, chulai chu Pu Speaker, kan sawilang zawk duh a. Finance Department-in 2010 - 11 ah 13th Finance Commission-in pawisa a pe lo tih kha, PWD in pe a, mahse divert anga sawi a ni a, kha kha department changtu Finance-in emaw nakinah min sawifiah sak sela, 2011 – 12 ah 13th Finance Commission khan cheng vaibelchhe 19 Mizoram tan ruahman a ni a, hei hi hmuh ngei ngei tur a ni lo tih kha an sawi dan a ni a. A chhan chu condition pahnih a awm a 2011 – 12 RE ah major head 3054 hnuiaia Non-Plan Revenue Expenditure (NPRE) kan tihah khan cheng vaibelchhe 32.56 tal an hmuh a ngai a. Pahnihnaah chuan 2011 – 12 budget estimate-ah target siam sa cheng vaibelchhe 32.84 tlin a ngai tih a ni a. Helai tak mai hi Pu Speaker, helaia Finance Commission lehkha an guideline para 2-ah hian ‘the grant is additional to the states on budget provisions for maintenance of roads. Therefore, the grant is subject to a condition that an appropriate level of Maintenance of Non-Plan Revenue Expenditure (NPRE) under major head 3054 road and bridges be incurred by its state from its own resources during the period 2010 to 2015 the required quantum of expenditure is reproduced in Annexure II to this guideline’ tih a ni a. Helaiah hian Annexure I leh II an rawn dah a, chu chu kuminah hian cheng vaibelchhe 19.04 hi kan hmuh tur angin lang mahsela, nichinah kan sawi ang khan helai condition hi a ngai a.

Amaherawhchu, para II ah Mizoram cheng vaibelchhe 32.56 hi a hmanna utilization emaw kha a tihfel loh chuan tuna cheng vaibelchhe 19 kan hmu ang tih kha a chiang chuang lo tih a ni a, chuti a nih chuan cheng vaibelchhe 32.56 kha nikum lamah khan kan hmu lo reng em ni. Kan hmu lo a nih si chuan engtin nge tuna crore 19 kan hmuh kha hmu thei tura hma kan lak tak ang tih lai kha ka'n hre duh a. Department lam atanga ka hriat dan chuan he 32 (SPEAKER : Duh tawk dawn tawh rawh aw. Kan hun pawh a tawp tlat tawh a nia.) Ngawi rawh hei chauh hi kan sawi zo lawk Pu Speaker, 32.56 atanga kan hmuh kha non-plan ah 4.05 a ni a, plan-ah 1.27 a ni a, tichuan a vaiin 5.32 a ni. Chu chauh Department-in an hman a nih si lai a 32.56 hi Central Finance Commission a zu ziah mam tum kha engtin nge kan sawi mam ang a, a hnu zela kan hmuh tur helaia cheng vaibelchhe 34,37,38,42 Annexure II a arawn dah leh I-a a dah zawng zawngte hi hmu thei turin hmalakna leh engtin nge kan chulmam ang tih lai kha ka rilruah zawhna a awm a. Chu chu kan chulmam thei lo a nih chuan heng zawng zawng hi kan chan tur anih si chuan Mizoram Sorkar hian kan va chan nasa dawn em, hlohna nasa tak ava ni dawn em tih kha ka sawi lang duh a. Pu Speaker, minute 15 min pe nang a ka sawi tur zat ve ka sawi hman tawk a, amaherawhchu ka lawm e.

SPEAKER : Veteran politician-te chuan in khung zung zung tur a lawm. Tunah chuan kan hun a lo tawp ta rih a dar 2:00 P.M.- ah kan thu leh dawn nia. I chawl rih ang u.

2:00 P.M.

SPEAKER : Sawihona kan tan anga, han phar lawk kha kan awm lova, ka hmuh dan chuan. Tunge sawi dawn? Panga in kan sawi tawh a, Pu Nirupam Chakma.

Pu NIRUPAM CHAKMA : Pu Speaker, hei sawina hun min pek avangin ka lawm e. Pu Speaker Budget General discussion hi ni hnih awt tur a ni a, waiin leh naktukah. Hun min pek pawh minutes 15 a ni a, thusawi theih tam tak House-ah kan sawi thei dawn a, a hmasabera ka sawi duh chu tun tum budget, kan Finance Minister zahawmtak, Pu Liansailova present, document min pek kha ka lawm em em a, Pu Speaker, ka lo tarlang ang a, Demand for Grand bu min pe a, Employment Data min pe a, Performance Budget-2010- 2011 min pe a, Supplementary Budget, Detail of Fund transfer to Local body 2011-2012 min pe a, Work Programme 2011-2012 a tel bawka, received budget 2011-2012 tunhmaa tel ngai lo min pe a, Annual Financial Statement 2011-2012 budget ami min pe a, Explanatory memorandum of the budget 2011-2012 min pe a, micro economic, Financial statement min pe a, Medium Transfiscal Policy Statement min pe a, medium term fiscal statement min pe a, document sawmpakhat min pe tel a ni, Bag tha tak nen. Hei hi Assembly Budget, Mizoram Legislative Assembly-ah hun rei tak kei pawh ka tel ve tawh thin a, hetiang document tam tak hi tunhmain min pe ngai lova, reilo te chungin Finance department an thlak hnuah khan hetia buatsaih thei si hi Pu

Speaker, a hmasain lawmthu ka sawi duha, hei hi achievement ropui tak a ni a. Tin he document atangin Mizoram Budget chu a lang chiang a chhiar peih tan chuan engkim hriat theih tur a ni. Chhiar peih loh chuan document khan awm zia a awm lova, chuang chuan hei presentation speech pawh ala sei ber a ni awm e, a detail lutuk a, chuang chuan Finance Minister chungah te, Parliamentary Secretary chungah te, department hotute chungah te lawmthu ka sawi duh phawt a. Pu Speaker, kan Budget hi kan hre theuh a, Medium Transfiscal Policy Statement pheik tawpah hei table pakhat a awm a. Hetah 2009-10 kan actual Budget figure te, tin, 2010-11 Budget estimate leh 2010-11 Revised Estimate te a tel bawk a. Tin, 2011-12 Budget Estimate a tel bawk a. Chumi piah lamah Target for next 2 years tiha 2012-13 leh 2013-14 ah Projection Figure hi a lang ve lo. Heta a lan danah chuan Revenue Receipt hi kan Revised Estimate 2010-11 khan 3716.32 tur a ni. Tin, 2011-12, tun Financial Year ti mai ang, 3748.30 crore a ni a, capital receipt hi 2011-12 ah khan 573.39 crore a ni. Total expenditure lam chu 2011-12 ah khan 4216.09 crore a ni a. Pu Speaker, hetia Budget figure a en atangin tax revenue te, Budget Estimate 2010-11 khan 1181.20 crore atangin Revised Estimate ah kan hmu tam a. 1241.15 crore a ni a. Kuminah 117 crore a ni a. Chutiangin hei Tax Revenue te, Non-tax Revenue te, tin, of Central taxes-te a pung zel a. Grant-in-Aid from Central Govt. pawh a pung a ni, nikumah chuan. Non-Plan grant kan projection revise-ah a pung a. Plan Grant pawh Budget Estimate atangin Revised Estimate ah a pung a. Tin, Capital Receipt pawh chutiang bawk a ni a. Expenditure lamah a concern awm ber chu Salaries te a ni. Pu Speaker, ka sawi duh chu Mizoram Budget hetia en hian tu tu nge beneficiaries tih kha? Share tam zawk chu Govt. employee-te an ni. Member zahawm tak, Dr. R. Lalthangliana zawhna, Unstarred Question Friday leh vawiina chhanna lang chu Unstarred Question 18 leh 7 ah khan Plan Fund hnuaiyah sorkar hnathawk A,B,C,D leh MR, Workcharge, Contract basis, etc ah engzatnge awm? tihah khan a Group hrang hrang belhkhawmin Plan hnuaiyah hlawh la 17360, (seventeen thousand three hundred sixty two) Chutah Group A-ah one thousand four hundred seventy six numbers. B Group-ah four thousand seven hundred ninety four numbers, Group D-ah one thousand four hundred fifty numbers, M.R. six thousand nine hundred thirty eight numbers, Work Charge seven hundred seventeen numbers. Tin, Contract basis-ah nine hundred seventy nine. Grand Total - seventeen thousand three hundred sixty two a ni a. Tin, Non-Plan hnuaiyah hlawh la, Group A, two thousand five hundred ninety a ni a, Group B, twelve thousand three hundred seventy one a ni a. Group C, seventeen thousand nine hundred fifty eight. GROUP D, eight thousand seventy one. M.R leh Work Charge contract-a thawkte hi four thousand twenty five. A vaiin, Non-Plan atangin forty thousand nine hundred ninety a ni. Hei, kan budget estimate-ah hian sorkar hnathawkte hlawh ringawt one thousand two hundred sixteen point ninety crore a ni a, pension tel lovin, regular hlawh ringawt, One thousand two hundred sixteen point ninety crore a ni a.

Pu Speaker, ka sawi duh chu, Mizoram Budget atanga mipui zawng zawngin kan dawn chu buhfaita a ni, it goes to every family..., BPL te, AAY te, APL te telin. Chief Minister atanga mi te ber pawhin he budget atanga kan dawn chu BUHFAI a ni. Thlatin 10 crore chu buhfai subsidy-ah kan seng thin a, chu chu budget-ah return a awm si lo. Electric-te hi chu chhungkaw tam takin connection pawh an la nei lova. Tin, MNF Sorkar lai chuan direct a public a lut thei ang chi kha a tam vak lo a ni, 20/30 crore emaw a ni ang a, MIP atan a ruahman kha a tam ve a. Nikum leh kumin budget-ah hian mi retheite hnena direct-a lut tur kha vaibelchhe 234 leh tlem a ni. Hei hi MNF Sorkar budget leh keini sorkar budget danglamna tak a ni a.

Tu tu nge beneficiaries kha ka sawi mek a ni a, Budget-a contribute tute nge ni, Non-Tax revenue atangin kan contribute a, Central sorkar-in kan contribute a, chhungkua zawng zawngin kan contribute lo. Chhungkuain kan contribute chu land tax chauh a ni. Beneficiary dawng tam zawk chu sorkar hnathawkte an ni a buhfai subsidy-te pawh an ei tho, mirethei angin hei hi kan chhut ngai em? Pu Speaker sorkar hnathawkte hi ka ngaihndan chuan Mizoram budget-ah contribution hi tun aiin an ti tam tur a ni. Public-te chuan thlatin hlawh an hmu lo, sorkar hnathawkte chuan thlatin hlawh an la a ni. Tiangin ngaihtuahna siam ila Professional tax kan pe thin hi tihpun dan a awm lo a, mi mirethei dawn ang an dawng tho va hei hi kan ngaihtuahna turin ka sawi a ni. Tin, APL tana buhfai subsidy (Speaker- India Constitution hianin a tuk tlat alawm keini tribal ho chu) kha chu Pu Speaker technical chu ka sawi lo ang, chumi piah lamah buhfai subsidy hi kan ngaihtuah chhin ngai em kumtin buh thar pawn ration a nei tho kum tina buhfai..... Kurzanathar kawt pawh.. kan nei tho, chuvangin hemi thil pawh ngaihtuah a ngai, hei kei pawh mimalah ka ngaihtuah thin a, Dan pawh kan la ang, nakum atangin, beisei anga kan awm theih chuan nakum atangin supply buhfai ei loh ka tum a ni. Chutiang ti tur chuan Leilet neih emaw, leilet neih chuan tam, hunah MLA zahawm tak tak te, Official-te pawh leilet nei tamtak an awm, public pawh khatiang tho a ni a, mahse, ration card kan dawng vek, surrender kan duh lo a. Hei hi ngaihtuah a ngai a ni, Pu Speaker, Mizoram economic hi. A chhan chu kan senso hi a tam zawk chu Buhfaiah kan seng a, Electric-ah kan seng a, Electric chu tam tak 7 years kan surplus ni mai ang. Pu Speaker, naktuka sawi tur a ni a, mahse, ka rilru a hmanhmawh a, kan sawi a nih kha, ka lawm e.

*Speech not corrected

SPEAKER : Tunge sawi leh dawn? Sawi tur kan awm tawh lo em ni? Kan bang mai dawn em ni? Aw.. Pu H. Zothangliana

Pu H. ZOTHANGLIANA : Pu Speaker, ka lawm e. Kan Finance Minister zahawmtak hian kan State sum dinhmun harsat leh a that lem loh ziate ngaihtuah chuan Budget tha deuh mai a rawn present thei hram hram mai hi a fakawm ka ti a, lawmawm ka ti a ni. Amah leh a mah tawiaawmtu kan Parliamentary Secretary-te, leh kan Official-te zawng zawng thawhrimna leh nasa taka thahnem ngai taka an thawhrah he House-ah hian rawn pharh chhuah niin ka hria a. Chu chu nichina kan member pui zahawm tak rawn sawi zulzui khan ka han sawi hmasa duh a, an hnenah lawmthu ka sawi duh a ni.

Kan member thenkhatte sawi tawh han thual nawn duh lai ka nei a. A hmasa berah chuan, tunhma atanga kan lo kal phung ni tawh laklawh vawiin thleng pawha kan chhunzawm loh hleih theih loh avanga kan State pumpui sum atanga sorkar hnathawh hlawh leh pension-ah te, an medical re-imburement han tih leh Office expenses sorkar hnathawh leh a kaihhnawih zawng zawnga kan sum neih kal nasa lutuk mai hi rilru a luah lian lo thei lova, hei hi Budget vawihnih khat present a siamthat theih a ni lo tih kan hria a. Chutih rual chuan kan ngaihtuah ngun deuh a kan sawi tam a, a kawng tha zawk deuh pawh hi kan dap chhuah a tul tawh hlein ka hria a. Kan State a pachhia a, thawhchhuah kan la

nei tlem si a, vawiina kan kal ang zela kan kal chuan, nakin lawkah hian Financial crisis hi kan tawng lovang tih hi sawi a har em em ang tih hi ka hria a ni. Entirnan tun 2011-2012 Budget-ah hian Sorkar hnathawk chi hrang hrangte hlawh tura chhutchhuah chu Cheng vaibelchhe sangkhat zali sawmli leh pasarih point 72 (crore) a ni a, hei hi kan State Sorkarin kawng hrang hranga a dawn tur belhkhawm cheng vaibelchhe sangli leh zahnih leh sawm leh paruk a dawn tur ka han tih palh Pu Speaker ka sawi sual a ni, hman tur a neih pumpui zawk a ni e. Pawisa hman tur a neih zawng zawng cheng vaibelchhe sangli leh zahnih leh sawm paruk point zero nine crore atanga han chhut hian za zelah 34.33% a tling daih mai a, sang vah vah tak ani. Chubakah chuan an pension tura chhut hi Vaibelchhe 272.89 crore a la ni leh bawk a. Chungte nena chhut chuan sum hman tur kan neih zawng zawng za zel 40 chuang, 40.81 % hi sorkar hnathawk hrang hrangte hlawh leh an pension ringawtah hian a kal nghal huk mai a ni. Hetiang reng hi chuan kal a harsa ang tih a lang reng mai a, vawiina kan document hmuh pakhat 'statement on salary' tihah hian a lan dan chuan Sorkar hnathawk post sanction tawh zawng zawng atanga hnawhkhah loh a awm hi a tam tham khawp mai: 7348 post hnawhkhah lohin a awm a, District Council pathum te a post hnawhkhah loh te nen a chhut phei chuan 8958 post hnawhkhah lohin a awm a ni. Hei hi hnawhkhah thuai thuai a va tha em tih lamin ka rilru-ah a thawk ve hauh lova, kum tam tak heng post te hi hnawhkhah lohin a awm a, chuti chung chuan India ram pumpuia pawh hian ani awm e, state hrang hrangah te budget siam dan kalphung pangngai deuh a awm ve a, Central Sorkarin budget siam dawn laiin nikuma in dinhmun pangngaihan khan lo din phawt rawh u min han ti a. Keini State Sorkar pawhin Disctric Council pathum leh Local Body dangte chu nikuma in thuthmunah khan lo thu phawt rawh u, tiin kan han instruct thin a. Chutiangan anih avang chuan department tin ten an sum mamawh tur an rawn chhutchhuak a, an post sanction neih zawng zawng kha hlawh pek tur angin an rawn telh barh zel mai a, kum tawp ah salary a pek tur pawisa department thenkhat phei chuan a vaibelchhe telin pawisa chuang an nei thin ta a ni. Chu chu practice thalo deuh maia kan neih a ni a, chu kumtawpa pawisa chuang salary chuang an neih chu Motor lei nan building chhia repair nan, furnishing atan emaw divert an rawndil thin a, engemaw chen chu phalsak loh theihloh niin phalsak te pawh an lo ni thin ni awm takin ka hria a. Chutiangan awt a kan kal chuan kan plan fund size a kha tullovah kan lo pawt hek nasa hle thin a ni tih zawng pawh khan a ngaihtuah theih a ni. Chutih karah chuan post sing tel dawn mai hnawhkhah loh khan he sorkar hi a lo kal thei a, chutiangan anih rau rau si chuan kan plan fund size te hi a tak tak a tihlen a lo nih theihna turin tul lutuk lova pawisa hi non-plan lama kan hman chiam chiam tihbona turte pawh ni pah fawmin huai taka ngaihtuahna kan hman a kawngthar kan dapa post chuangtlai kan neih te pawh hi a tihbo dan te pawh hi kan ngaihtuah mai loh chuan vawin ang ngawt hi chuan kan kal zel thei dawn lo ani lawm maw ni ti a kan ngaihtuah te pawh hi a tul a ni lawmni ka ti a ni.

Tunlaiin thangthar lehkha thiam sorkar hnathawk nihve duh em em leh tlin em em tamtak an awm tih kan hriat laiin hetiang ang thu sawi hi a nuam hauh lo, amaherawhchu, kan economy dinhmun hian 'tul' a ti tlat si a ni tih hi enonomic point of view atang hian sawichhuah ngam hi a tulin ka hria a, ka han sawi rawt mai a ni, a ngaihtlak a nuam vaklo ang tih pawh ka ring. Amaherawhchu, thil tul nive tlatin ka hria, chutiangan an karah chuan ka ngaihtuahna vakvel zelah chuan tuna kan budget siamdan kalphung pangngai hi a tula tha zawk nia kan hotuten an hriat phei chuan ram thenkhatin an tih anga Zero based bugeting an han tih, engmah awmsa leh chuti sa ani tih ngaihtuahna tel miahlo leh a thar hlaka in chawkhhuak tha leh a budget

siam tih zawng pawhin a sawi theih awm e. Hengte pawh hi kan ngaihtuahve a ngai tawh zawk a ni lawm maw ni aw ka ti a, chutianga bul kan tan that loh chuan reitak kan kalzel thei lovang, Central sorkar pawh hian min chawmhlawm ringawt kumkhua thei bik lovang tihte pawh a rinawm ang tih ka hria a ni. Chutiang chuan 13th Finance Commission pawhin hei kan hotuten an sawi fo tawh ang khan kan lakah pawh thil phut a rawn nei sang tual tual a, kan State own tax revenue te pawh tipungve turin min phutin min kar hle a ni. Chung angte pawh chu a tak taka kan hlen chhuah ve theih loh chuan nakin lawkah hrek te pawh hi kan tawh ngei dawn niin a lang a ni. Keini chuah ni lovin India ram State hrang hrangte pawh an ni ve tho mai, chutiang ang karah chuan tax tam zawkte pawh hi a ram mipuite pawh hian sorkarah kan chhunglut ve anga, hei hi kan duty kan mawhpurh a ni; kan responsibility a ni tih hi kan ngaihtuah ve pawh hi a tul hlein ka hria a ni.

Nichina kan han sawi tak ang khan he kan ram zimteah hian sorkar hnathawk kan tam hluah hluah khawp mai a, hengho zawng zawng hi chuan kan phuloh tamtak hi chu a ni awm e, hlawh kan dawng a ni tihte pawh hi kan admit ngam ve te pawh hi a thain ka hria. Chumi azarah chuan sorkara peklet leh te hi in huam ve deuh ta ila, a tul mange aw, chu chu kan ram hian a mamawh a ni tihte pawh hi rilru taka kan pawm a duhawm hlein ka hria a. Chumai piah lamah chuan kan revenue hrim hrim hi Tax a ni emaw, Non – Tax a ni emaw kan tihpun a ngai ka ti a, chung ang kawngah chuan a kawng tur hi ngaihtuah thiam a harsat viau rualin Finance lama kan mithiamte leh tu tu te emaw ka han biak rawnna atanga an han sawi, pawm nahawm deuh deuh ni a ka hriat ve te, thil thenkhat ho te te te pawh a ni maithei thenkhat ngaihah chuan, mahse han tarlan ve ka duh a awm a. Pakhatnaah chuan Mizoram hian hmun hrang hrangah Mizoram House kan nei nual a, Circuit House kan nei nual a, tin, Guest House-te pawh kan nei hlawm bawh a, hengah hian a pe thei zawk hlei hlei awm harsat lo zawk awm hlei hlei, sorkar hnathawk lian pui pui kan VIP te tana rate a hniam thei ang ber mai, hniam uchuak lutuk maia kan han tuk tlat maite pawh hi ennawn a tul tawhin ka hria. VIP room-ah te A/C room angah te hi chuan vawiin a kan rate biktuk ai pawha alet thum let li let nga thleng pawha kan tihsan ngam hi a hun tawhin ka hria a ni. Chutiang ang te te te leh entirnan kan ramah hian Lei pawimawh tak tak tamtak a awm ve a, heng zawh man Bridge Toll kan tih ang chi te pawh hi kan introduce ve tawh hi a hun viauin a lang tlat a ni, chutiang ang zel chuan hei tui leh electric lama kan pawisa senso kan ssubsidy portion hi a sang em em a ni tih kan hria a, (SPEAKER : Minute hnih ila nei e) vawiinah hian Piped water supply nana sorkarin a senso, hmun ruka thena hmun khat ang vel chauh hi user charge anga kan lak let a ni a, a thenah phei chuan hmun 7, hmun 8, a thena hmun khat chauh hi consumer-ten a kan pek let a ni, hei pawh hi tun aia kan tihsan a ngai a ni tih hriain kan hotuten an buatsaih mek a, chu chu alo chhuak mek tawh a, mipuite pawhin hei hi a tul a ni, a awm ve reng a ni tih nachang kan hriat pawh a pawimawh khawpin ka hria a. Vawiina hotuten ruahmanna an siam pawh hi kan State dinhmun en hi chuan ala tawh lo hle niin ka hria a ni. Chutiang ang zel chuan Power & Electricity lamah pawh kan power lei man, a lei man ngau ngau hi chu a sang lutuk lo a nih pawhin a transportation leh a transmission cost hi a lei man zat tho a sang a ni a. Tun dinhmunah chuan kan senso zawng zawng zatve pawh hi consumer ten kan pe let lo a ni. Chuvang chuan thlatin, nitin mai hi vaibelchhe tel tak meuhin kan afford zawh loh pawisa hi kan hmang hiau hiau a ni ringawt mai a, hei hi chu a fello, tihdanglam ngai a ni, siamthat ngai a ni. Chutiang ang zel chuan nichina member zahawmtak Pu Nirupam`an a sawi ang khan buhfai subsidy pawh hi a hausa ber atanga a mite ber thlenga subsidy inang veka kan ei ringawt mai hi chu a diklo a ni. AAY te, BPL ten

rate hniam a an dawn hi chu chhonzawm zel ni teh meuh rawh se, a awm e, tin, chumi piah lamah chuan APL te pawh hi then hran deuh kan ngai, Slab hrang hrangah, category hrang hrangah thliar hran deuh kan la ngai e, kan ti a nih pawn ala awm tho mai, amaherawhchu tlema dinhmun ziaawm deuh hi chuan a tak takah chuan Ration Card neihloh kan duhlo chung hian kan hmang duh tak tak chuanglo, kan thehthang mai mai a, tu ten emaw an lo hawh kual mai mai a, tam tak pheih hi chu zu zuar, Rangvamual vela zu siam ten an lo khawn khawm a, an hmang mai mai a ni. Chutiang angte pawh chu kan tihtawpna tura theihtawpa tan kan lak a ngai a, chutiang ang chu hriain kan Supply Minister zahawmtak pawhin chak takin hma a la mek a, smart card introduce te pawh a tum a ni tih ka hria a, lawmawm ka ti khawp mai. Hengte pawh hi kan enchian deuha mipui lam hian kan inphal ve deuh hi a ngai a ni tih hi ka'n sawi duh a. Kan budget-ah hian thil lawmawm tak mai pakhat, thil tam tak karah kan sawilan tel ve hram duh chu, Central sorkar atanga Grant-in-Aid kan hmuh tur hi kumin atan hian cheng vaibelchhe 2627.82 a project/estimate a ni a. Nimahsela nikum 2010-2011 a Revised Estimates-ah khan cheng vaibelchhe 2823.80 kan lo dawng reng tawh mai a; chuvangin, helai bikah hian kan pawisa hlawm lian ber lo luhna kawngah hian beiseina a sang thei viau mai hi thil lawmawm tak a ni. Beiseina sang tak, room zau tak zuah chungah hetiangah budget tha tak mai kan Finance Minister-in min present thei hi a lawmawm ka ti takmeuhvin lawmthu ka sawi duh rualin he Budget hi pass pui ngei kha a va tha em tih kha karawn sawi ve duh a ni e, Pu Speaker, ka lawm e.

SPEAKER : Tunge sawi leh dawn le, in ngawi vung vung mai a, in phur lo hle emaw ni! Kan wind-up tir tawh mai dawn em ni? Mi pasarihin in sawi chiah a ni tikhanin. An wind-up chuan naktuk chu kan chawl thei a ni mai a. Anih leh Minister chu kan ko tawh mai dawn em ni, kan duhtawk viau em ni?

Pu C. Ramhluna a nia, midang han ti leh tur phar lawk in awm em?

Pu C. RAMHLUNA : Pu Speaker, vengchhungah mitthite an awm avangin inbuatsaih a harsa deuh hlek a, naktukah ka sawi ang tiin ka lo inbuatsaih deuh hlek a. Mahse ding an awm tak loh avangin kan dingchhuak ta a.

Hei, tun tum kan budget general discussion hi a hmasa bera ka sawi duh chu Finance Minister thar kan nei a, budget tha tak arawn present niin ka hria a, a lawmawm ka ti a, ka lawmpui a, chumi rual chuan han zir a hriatchian loh thil thenkhatte a awm nual a, chung chu han sawi tel ka duh a, min clarify sak se tih pawh ka duh tel bawk a.

A hmasabera ka sawi duh chu he Supplementary Budget detail of Funds transfer to local bodies tih kha a awm a. Hemiah hian Aizawl District, Aizawl Municipal Council-ah fund kha khatiang zat kha pek a ni a ULB ah khan. Hemi hi a detail distribution kha a lang ve tlat lo mai a. Hei hi kan hmu ve lova, mahse kan hriat danin helaiah hian engemaw opposition party-a ngaih

deuh leh ruling party-te hi a insem dan hi a rualkhailo deuh nia hriatnate ka nei a. Kan han hriat danah phei chuan ruling party-a a hniam berin a chan kha, opposition party lampangin a chan sang ber ai khan a la sang e tihte a ni a. Aizawl khawpui theuh theuh khatianga inanglo nuaia han then kha a diklo deuh mai awm mange tih kha ka rilruah a awm a, chu chu ka sawi duh a. Engemawti a ngaihtuah that leh te a awm thei anih chuan rualkhai deuh hlek zawka Aizawl khawpui chhung na na na hi chu sem theih ni sela a van tha dawn em tih kha ka rilruah a awm a, chu chu ka sawi duh a. Tin, hei District dangte chu a lang tha khawp mai a, a lawmawm ka ti a. Chuvangchuan, hei hi ka'n tarlang ve duh a.

Tin, chubakah chuan ka sawi leh duh Pu Speaker, tun tuma kan Demand for Grants Book ka han en hian nikum lamah te pawh khan a ni tho mai a. NLUP kan sawilo thei lova, Flagship Scheme anih avangin helam panga thute pawh hian kan tuipui loh theih lohna chin a awm ve a, Mizoram tana thil tha tur a nih avangin. Nimahsela, beisei anga fund kan hmuh theih tak loh avangin kan budget hi nasa taka min effect nia kan hriatna lai hi han sawichhuah ka duh a. A chhan chu a tir lampanga kan inhriattir danin Prime Minister Special Package a ni e kan ti a. Tin, he House-ah te pawh khan sawi thuak thuak te pawh a ni tawh thin a. Nimahse, keimahni Annual Plan Budget-ah ACA anga a lo kal ta hianin department dang zawng zawng hi a effect niin kan hria a. Hei ka han chhut chhin a department 18/19 vel hi chu nikuma an budget allocation ai hian a hniam vek mai a. A te ber pawh hi a effect ve a ni, Labour & Employment te pawh hi nikumah khan 280 lakhs an nih lai khan kuminah hian 250 lakhs chauh kha an nei ta a. Khatiang khan department dang tam tak pawh kha sawi tur a tam mai a. Hei a list pawh ka nei a. Chuvangchuan, kan NLUP pawh hi kan ti lo thei si lova, kan kal chho chu a ni a. Nimahsela, hei hianin department dang allocation hi nasa takin a effect a. Chuvangchuan, department tam tak tan chuan hnathawh a harsa hle dawn niin ka hria a, an Salary component atanga han chhut sak hian salary hi a sang ul a, hna hi a awm manglo dawn nia hriatna ka han nei a.

Tin, chubakah chuan Pu Speaker, hei tunlai chanchinah hian a lang a lang mai a. P.W.D-in Finance Department-in kan pawisa min pawh pen sak a, 32.5 crore vel kha kan nei a ni a, Finance Commission atang khan. Chumi atang chuan pawhpen sak kan ni ta a. Tichuan chumi atang chuan 4.5 crore chauh hi kan nei ta a ni e, an ti an ti a. Helai hi Finance Department-in kan pawtpeng lo ve an ti baw si a, hriatchian a chakawm viauin ka hria a, hei hi mipui interest a ni a. Helai hian thil pakhat Pu Speaker, i phalnain han chhiar chhuah lawk ka duh a, hemi 13th Finance Recommendation hi 12 para 114 ah khan – 'we had decided to provide grant-in-aid for roads maintenance to the extent of 50 % of the requirement assess for non PMGSY roads and 90 % of the requirement assess for PMGSY roads for 4 years starting from 2011-2012', a ti a. Tichuan the total amount of grant work out to ₹ 19.30 crores a ni a. The State year wise break-up of this is given at annexure 12.16 a ti a. Helai hianin thil pahnih a awm ta a, a pakhat naah chuan projection for non – plan revenue expenditure under roads and bridges a ni a. Chumiah chuan 32.56 kha 2010-2011 ah khan an rawn project a. Khami atang khan 19.04 hi grant-in-aid for maintainance of roads tih kha alo awm chiah a ni. Khami kha a release tur pawh khan a committee tur kha an siam tur a ni a. Chief Secretary Chairman niin Secretary of the Department te pawh kha member an ni tel ve tur a ni a,

chu chu a kalphung tur kha a ni a. Tuna a landan hian hemi 19.04 atang hian a bak hi 32.56 thleng hian State sorkar hian an pe ve tur a ni a ti tlat a ni. A chhan chu State matching kha PMGSY road-ah chuan 90/10 a ni ang a, non-PMGSY ah chuan 50/50 tur kha a ni a. Chumi an project danah chuan 32.50 kha projection kha a ni ta a, 19.04 hi an grant kha a ni ta a, 13th Finance Commission khan. Khami atang khan pawisa kha an release tur kha a ni ta a. Chuvang chuan helaia pawhpen awmlo ni anga Finance Department-in an rawn sawi hi hriatchian a chakawm khawp mai a, kan kawngte a chhe ropui mai si a. Keini chhim lampang pheite pawh saw Hrangchalkawn atanga Lawngtlai saw tunhma atanga kawng nuam ber ni a kan ngaih thin kha, tunah chuan kawng tha lo berah a lo chang ta tlat mai a. Chuvang chuan helai hi han hriatchian hi a chakawm hlein ka hria a. Chu chu ka han sawiduh bawka ni a. Tianga department leh department an han inbei ta te pawh hi thil pawl tak a niin ka hria a. Helai hi chin fel dan leh eng emaw ti a han tih fel dan awm thei thuai ni thei sela, mipui interest niin a lang bawka si a tih ka sawi duh a.

Tin, a dang lehah chuan hmanni khan NIT (National Institute of Technology) hmun chungchang thuah khan Lengpui-ah khan compensation-te pek a ngaih avangin kan ti thei lovang ti a sawina kha kan hotute hnen atang khan awmin ka hria a. Mahse hei tukin zing chanchinbu chhuakah hian chiang deuhin a rawn ziaak a. Lengpui Joint Action Committee chuan NIT, Mizoram hmun atana Expert Team lokal ten an duh ber chu Lengpui ram anih thu an sawi rualin, Lengpui V/C te pawh hian a thlawnin compensation pe miah lovin NIT atan hian ram hi kan pe thei ani e tih hi an rawn ziaak kuau mai a. Helai te pawh hi kan House-ah hian han sawi chian leh deuh atan te pawh hian a van tha e, te ka ti a. Sorkar thu leh Lengpui Joint Action Committee-te thu hi a in kalh tlat mai si a. Tin, chutia han ngaih maiah chuan Lengpui te chu National Institute atan chuan duhthusam a ni a, a chhan chu kawng a hnai a, chubakah chuan mithiamte lokalna atan pawh, an rawn tum anga Lengpui-ah, tichuan, an rawn thleng thei nghal mai dawn alo ni a. Chuvang chuan hetiang anga Joint Action Committee-in an sawi anga free-a an pe thei dawn te anih ngai chuan helama kan kal mai hi kan tih tur a ni dawn lawm ni aw tihte pawh kan rilruah a awm a. Chu chu vawiinah hian Pu Speaker, han sawi tel ka duh nghal bawka ni.

Tin, tuntum kan Budget-a lawmawm ka tih chu nichin a an sawi tak ang khan Performance Budget kan nei thei a, a lawmawm hlein ka hria a, tin, work programme-te kan nei thei a, a lawmawm hlein ka hria a, mahse, an work programme erawh hi chu duhthu a sam lo hle mai a, department tam tak khan an pe thei lo kha a ni a. Chuvang chuan hengte pawh hi Pu Speaker, tun hnuah chuan chianguang deuh hleka inhriattir ni thei sela, a thain ka hria a, chu chu ka han sawi tel duh bawka.

Tin, ka'n sawi tel duh chu, Reserved Fund atana Sinking Funds kha nikumah khan ₹ 16.5 crores kha dah a ni a, heta tang hian ₹ 90.75 crores hi invest kha a ni tlat a, tichuan ₹ 21.75 crores hi 2010-2011 atan proposed a ni a. Hei hi engtiang anga hman tur nge ni ang tihte hi han hriatchian kha ka han chak deuh hlek a. Tin, Guarantee Redemption Fund kha hmanni khan a Rule pawh kha kan han siam ta a, kuminah hian ₹ 100 lakh kha han propose kha a ni a. Mahse, hei hi amah khan alang fal ta lo tlat mai a, Annual Financial Statement han en hian, hemi Annual Financial Statement-a a lan dan ah kha chuan a dang ho nen khan a rawn lang tel ta a, kha kha hman zawh vek

tumna ang khan alanga. General and Other Reserved Funds a ti a, chumiah chuan ₹ 25.75 crore kha tunah hian estimates kha a ni a, nimahsela, Revised Estimate-ah hian nikumah khan ₹ 800 a ni a, chu chu nikumah khan ₹ 650 lakhs kha disburse a ni bawk si a. Tin, chubakah chuan Budget Estimates-ah khan ₹ 800 lakh hi General and Other Reserved Funds-ah khan hman tum ang khan alang bawk si a, hemi anih kha chuan helaia a figure Budget Estimates-a ₹ 27.75 crore lo lang leh heta disbursement atana ₹ 800 lo lang kha a amount kha a inthlau ta em em mai a, khami kha anih chuan kuminah hian department dang zawng zawng Plan Allocation Expense a khatiang ang zat zat va invest kha engnge thil ngai tur ni ang le? Tih kha ka rilruah khan a awm a ni. A chhan chu khami a khatiang ang zat zat kan va dah khan midang pawh khan an harsat phah dawn niin ka hria a, chu chu ka'n sawi tel duh bawk a ni.

Tin, chubakah chuan Pu Speaker, ka sawi leh duh chu receipt-ah hian a tam viau mai a, receipt-ah hian ka sawi duh chu Forest & Wildlife-te hian nikumah khan nuai 380 kha an hmuchhuak thei chauh kha a ni a, kuminah hian 660 an han proposed ta a, hei hi an hmuh theih an beisei tak tak em aw tihte pawh ka rilruah chuan a awm a.

Tin, chubakah chuan Non-ferrous Mining & Quarrying Industries tihte hi 485 nikumah khan an hmu thei chauh va, kuminah a let deuh tho 886 an han proposed tak duai te hi a tam em em mai a. Road & Bridges-ah te pawh hian tax lak an tum niawm tak a ni a, nikumah 129 lakhs an lak theih laia kuminah 2160 an han laksak a an project sak te hi a sang lutuk deuh lo maw tihte ka rilru ah a awm a.

Tin, Medical and Public Health-te hi nikumah 30 an la a, kuminah 93 lakhs han beisei tak daih, henghote hi mi rethei te te in damdawiinah an va kal a registration fee ₹ 10 te an va pek atanga an lak kha a ni si a, hetiangte hi mi retheite tax vak vakna tur thil a ni a, damlo mi retheiten khatiang registration an va tih ruala pawisa ₹ 10 te emaw ₹ 5 te emaw an va pek tihpun tumna kha mipuite hmangaih lohna budget a ni ang tihte ka hlau khawp mai. Chuvang chuan, Pu Speaker, hengte hi enchian leh theih deuh a ni angem aw tihte ka rilruah a awm deuh hlek a ni.

Tin, a dang lehah chuan nichin khan kan sawi tawh a. MLA Fund hi Pu Speaker sawi hrehawm tak a ni na a, mahni tan a nih loh avangin ka sawi lo thei lova bial tan a ni a. MLA fund hi kan hmang tha em em theuhva, hman sual pawh hi a awmin ka hre lova, MNF hunlai atang khan 5 lakhs-in kumtin khan an tipung a lo ni a, chu chu MLA te pawh hian beiseinate chu kan nei ve a ni, 5 lakhs te te a an tihpun kha, mahse, kum thum budget-na a ni tawh a, cheng khat maha a la pung lo erawh hi chu Pu Speaker, enchian leh deuh atan a tha lawm ni. Keini ang bialte pheih chu opposition kan ni lehngal bawk si a, a zau ropui mai bawk si a, chuvang chuan, Pu Speaker, hei hi chu han tihpun deuh a thain ka hria a. Hetiang anga MLA fund hrim hrim kan tipung thei lo anih pawhin a department wise hian a fund hi min propose sak ve sela a tha lawm ni te ka ti a. Entirnan, PWD-ah te, Sport & Youth Services-ah te hian 2.5 lakhs tihte emaw 3 lakhs emaw 5 lakhs tihte emaw kha kan duhzawng kha kan tih ve theihna tur atan khan a department khan min dah sak ve ta sela tichuan, nuai 25 plus those

amount kha a ni ve ang a, chu chuan engemaw chen kha min pui ve thei ang a tih kha ka ring a, chu chu Meghalaya-ah pawh an pek dan a ni a. Khatiang angte khan min pe ve thei nise a tha lawm ni tihte kha vawiinah hian ka sawi duh a ni, minute 15 a ral tawh a ni maw. Ka lawm e.

SPEAKER : Tunge han sawi leh dawn le. In ngawi vung vung hlawm mai a, ka tin san thut mai zawk dawn che u emaw ni le, tunge han sawi tur kan awm em? sawi nawn lampang kha chu a tih chi mang si lova, Pu Tlinga pawh hi sawi nawn chu phal ilang a chak pawl tak tur chu a ni mai a, tunge sawi dawn? Le tunge sawi dawn? Sawi tur kan awm lo maw? Pu Liansailova, Minister kan wind-up tir tawh mai dawn em ni, general discussion kha. Ni 2 kan pe na a ni 2 hman tur tihna a ni chuang lo a nia sawi tur kan awm tawh loh chuan. Pu Lalduhoma.

Pu LALDUHOMA : Ka sawi dawn hrih lova Pu Speaker, keini lamah hian group leader tih loh chuan kan sawi deuh vek tawh a. Kan han pratice danah hian sawi hnunungah te pawh hian kan han tang ve thin a, mahse practical-ah chuan kan sawi hmasa deuh fo a. Hetiang hi anih deuh fo avangin hmanah khan min zilh tawh a member-te hi, tiang ching tawh lo tur hian. Tunah hian pawn lam atanga min thlirtute tan pawh kan hmuh nawm loh a ni. Chuvang chuan a hnuah kan ding leh tho si a, hei hi chu ti lo thei ila tha hlein ka hria.

SPEAKER : A dik khawp mai i sawi chu kan din leh tho si kha chuan ti raw. A nih phungah chuan group leader-te khan a hnunungah an sawi ang a, chumi hnuah Minister-ten emaw House Leader-ten emaw a tawp an han bawk tur ni awm tak a ni kan kalphung turah chuan. Tichuan Hon'ble Member panggaite khan kan han sawi char char ang a, kan ngaih mawh zawngte khatiang khan. Chumi hnuah chuan Opposition group Leader-ten an han ti ve ang a, chumi hnuah chuan Minister emaw House Leader emaw khatiang kha niawm tak chu a ni. Mahse sawi tur kan awm si loh kha chuan. (Interruption)

Pu K. LIANTLINGA : Group Leader-te kha, Opposition Group Leader te kha ko ta la, chuan House Leader kha ko leh ta la, chuan, Minister kha wind-up tur khan i ko leh anga. Tichuan a pali khan book sa nita sela, midangin an sawi duh lo a nih chuan a tha mai lo maw tih kha ka rawt duh a ni.

SPEAKER : A tha maiin ka hria. Chu chu rawtna fing tak niin ka hria. A tha mai ti rawh u? Chutiang chuan i ti mai ang u aw. Tichuan Opposition Group Leader tu zawk nge rawn ding dawn le? Pu P.P Thawla'n sawi mai rawh se. A ni hi ama nih dan dan a hotu ve tak a ni a, a bial na na na chu a seh nghet a ni.

Pu P.P. THAWLA : Pu Speaker, ka lawm e. Hei nizanah mitthi kan neih avangin ka tlaivar thak a, chawlhni pawh nileng thakin ka buai a, naktuka sawi turin ka rilru ka lo in ruahman ve chu a ni a, mahse sawi tur an awm tak lohah chuan kan ding chhuak veleh mai ang a. Kan Finance Minister thar zahawm tak Pu H. Liansailovan kum 2011 leh 2012 kan budget tur mawi hnai takin a rawn present ta a House zahawm takah, a ngaihnaawm in thu leh hlate pawh a chiang fek fawk hlein ka hria a, a lawm awm ka ti a. Nikum lamah khan kan budget kan hman chungchangah kan sum hman zawh loh lapse tih thu hlate kha kan hria a, pawh kan ti tlang hle a, chanchinbuah te pawh an tial nual a ni. Chutiang hun kal zelah tun 2011 leh 2012 inkar kan budget tur chu Finance Minister thar zahawmtakin a rawn present ta a, detail takin, mi thenkhat tan pheih chuan in zir thiam pawh a harsa hmel hle a, tiang chu nimahsela dan tlangpuiah chuan tha turah, kan sum neih ang ang vaibelchhe sangkhat zasarih kan neih hman ralna tur ruahmante chu budget a rawn present-na buah khan chiang takin alo tarlang tawh baw a.

He tiang hi a tlangpui a ni a, kan plan sum 2011-2012 chu vaibelchhe 1700/- a ni a, Agriculture and Allied lamah vaibelchhe 51.30, Rural Developedment lamah vaibelchhe 39.10, special area programme lamah vaibelchhe 84.35, tin Irrigation and Flood Control lamah vaibelchhe 78.56, Energy lamah vaibelchhe 91.25, Industry-ah vaibelchhe 27.65, Transport lamah vaibelchhe 129.56, Comunication lamah vaibelchhe 3.80, Science, Technology and Environment lamah vaibelchhe 2.01, General Economic Services lamah vaibelchhe 123.19, Social Service lamah vaibelchhe 534.65 leh General service lamah vaibelchhe 234.58, kha kan budget vaibelchhe 1700 atanga kan hman dan tur tlangpui a ni. A aia detail zawk chu keini tan chuan kan hrethiam lo ang a, kha kha kan hman dan tur a ni ta a.

Pu Speaker, kan general discuss-a ka tarlan duh chu, Mizoramah District-a kil ber kan nih avangin ka sawilang lo thei thin lova, Saiha District lamah hian harsatna tam tak kan nei. Tun chawp chilhah hian Kawlchaw ka va kan chiah a, Kaladan ka va kan chiah a, khawthlang lam Phura potential area lam pang panna kalkawng chu a ping a ni. Kawlchaw kai atanga New Latawh inkarah hian PMGSY hma lo lak tawh a ni a, a piahlaham BRTF- hnena pek a ni a, amaherawhchu tunah fur a ni a, BRTF-in New Latawh atangin an tan a, khaw khat dang pawh an la kai em lova. Tin Kawlchaw a tanga, New Latawh inkarah PMGSY hmalakna kha a chawlhian an chawlhsan vang vang a, Kawlchaw tui a lian a, leilawn a len bo tawh a, tunah hian a kal theih tawh miah lova, furah khawthlang bial chu harsatna namen lo an tawh a. Tin, a piahah Kawlawh luite pawh thingtlang mirethei inhlawhfakna tura NREGS sum atangin an thawhkhawm a. Chutiang chuan an thawh mai mai ta a lo ni a. Chutiang chuan leilawnte pawh an siam a ni. Amaherawhchu, kan harsatna lai ber chu Kawlchaw atanga Kawlchaw lui dai kaina tur leilawn a awm ta lova. Tui len apianga motor kal thei tawh lova khawthlang lam buhfai tawlh thlak theih lohva a awm ta khu ram mipuiin harsatna namen lo kan tawh a. Hei hi heti mai hian em ni kan sorkar chak tak hian min enthlak ang a, min ngaihsak loh vang? tihte ka rilruah a awm a ni. Tin, he leilawn hi engtin chiah nge a nih chin? Contractor-te lak a ni tawh em? Eng chen nge hma lak a nih tawh tih chu detail-in kan hre lem lova. Chungte chu Pu Speaker, min hriatpui atan tha ka ti hle a.

Tin, a dang ka'n sawi kai leh duh chu, hei MLA te ho Area Development Fund hi kum engngemaw zat, kum 6 vel kal taah khan MLA tin hian an lo hmang tangkai hlawn hlein ka hria a. 2005 atang khan nuai 5 atanga tan nuai 10,

15, 20 tein a pung zel a. Kum 2009 sorkar thar lo pian khan nuai 5 belhin nuai 25 a lo ni a. Nikumte khan nuai 5 dang belh chuan nuai 30 tawh tur a ni a. Kumin hi nuai 35 tawh tur a nih laiin a chawl vang vang mai a, a pun chhoh zel kan beisei tehlul nen. Hengte hi engatinge ni hetiang hian kan Budget, kan Plan sum a pun chhoh mek zel laia area bik Development Fund hi a pun theih tak loh? tihte mi ngaihtuah tir hle a ni. Engngeni a chhan leh a vang ni ta ang?

Tin, a dawt lehah chuan hei, NLUP kan tih hi a lar bawk a. Tun sorkara kan Flagship programme a ni, kan ti a. Vaibelchhe 234 hi hemi atana tun vaibelchhe 1700 atang hian ruahman a ni a. Chung hman dan tur chu Agriculture & Crop Husbandary-ah nuai 10519.72, Horticulture ah 1733.94, tin, Soil & Water Conservation lamah hian 2686.54. Tin, Animal Husbandry, Vety lamah nuai 7325.40, Fisheries lamah nuai 980. Tin, Environment & Forest lamah nuai 34.40, Sericulture lamah nuai 120, tih kha NLUP sum department hrang hrang line department lama an hman tur chu a ni. Heng lama kan sum hi a kal tak vang em ni ang, MLA Fund te hi a pun theih tawh loh, tih te, tin, tuna ka hmaa member zahawmtak Pu C.Ramhluna rawn sawi tak ang khan PWD lamin vaibelchhe 32 vel pawisa an neih atanga kawng hrang hrang atanga deduct zel a tawpah vaibelchhe 4.5 vel chauh chuang anga sawi rik lo awm ta mai te kha, khatiang avangte khan em ni ang, khitah Kolodyne piah lam panga district ten harsatna, kalkawng lampangah te kan lo tawk a, ei leh in lampangah te harsatnate kan lo tawh tak mai aw tihte nasa takin mi ngaihtuah tir a ni. Chu chu Pu Speaker, min lo hriatpui atan ka han tarlang duh a.

Tin, NLUP te pawh sem a ni, a lawmawm hle laiin development sum kalna a rual khai lo hle a ni lawm ni aw tih min ngaihtuah tir a, a chhan chu NLUP launching programme kha January 14 atangin kan tan a. Tute emaw tan chuan inchung khur chei nan kan hmang hlawm a, han ngaihtuah chuan a lawmawm a, mahse a nawl pui ngaihtuah chuan kal kawng tha kan neihna turin a lo tuar phah a, Department thenkhatten an hmalakna a tibuai a chutiang ang ngaihtuah chuan a lawmawm viau laiin a famkim lo em tih ka ngaihtuah a ni.

Tin, Kaladan Multi project hi project thar lian kan neih tur a ni a, he project hi ka ngaihtuah a, Lawngtlai atanga Zochachhuah lampangah kalkawng kan ruahman a, contractor pathum thlana hma lak tum hi, a ram leilung a chhe em em mai a, chuvangin Look East policy-te a lo nih rau rau chuan tuna Kawlchaw lui kan kai chiah a, Phura lampang kawng, 1977 atanga a kawng sial tawh KT road laih tawhte hi sum tam tak an lo sen tawhna a ni a, tin, kawng tha sa a ni a, han min vak vak tur a awm tawh lo bawk a, hengte hi zawh ta se, Longmasu atangin Paletwa hi pan ta mai sela, senso a tlem zawk anga, a tlo zawk lovang maw? hengte hi ennawn leh sela kan sorkar hian. Tuna kalkawng hi chu Kaladan lui piah lama mi chengho chuan kan tawm tlem dawn hle a, va dai kai law law a kawng awm sa a zawh a, Longmasu a pan chuan Lawngtlai District Leh Saiha District-ten kan tawm dan pawh a rual khai hle dawn a ni. Chubakah Tuipang, Laki, leh Lungpuk kalkawng tuna double lane-a BRTF in hma an lakte pawh hi a tha hle mai a, sum tam tak an lo sen tawhte pawh tawm hian hemi piah lamah hian he project tihhlawhtlin nan hian hmalakna hi tha takin a tihchhonzawm theih zawk lo ang maw tihte pawh vawiih hian House-ah ka tarlang duh a ni.

Kaladan Tuikhuah Mega Watt 450 vel tihchhuah tur a ni a, hemi hi khuah zawh a lo nih chuan tui hi Darzokai lamah tui li a awm ang a, chungah chuan Lawngleng nen transport thar tam tak hmasawna kan hmuh ngei ka ring a, Kawlchawkai atanga a thlang Longmasu inkarah hian suar pahnih bawr vel hi kan khuah law law chuan tuili in zam put kha chuan a rampumpui hmasawna pawh a siam chhuak dawnin ka hria a, chuvangin Kaladan tuikhuah rual hian a thlang lam suar hmuh hnih hmuh thum velah hian khuah ni leh ta sela, Saiha District mipui chu kan lawm hle ang tih kha ka'n tarlang duh bawka ni.

Tin, Power lampangah hei term khat liam ta a ka han tel chhung zawngah khan Lawngtlai leh Saiha inkar velah hian Tower line ngei hi ruahman nisela ti kha phak ang tawk tawkin ka han au chhuahpui thin a. A chhan chu thingtlang ram hi chu leimin thin, thingbuk awmna ramte a nih thin avangin Tower line lo hi chu Electric hrui hi a ban a tlu a, thing a lo tlu a, a vaw chhia a, a thawktute pawh an khawngaihthlak em em a, chuvang chuan Power line khu ka rawt a. Hmannia ka han zin chu la complete chiah lo mahse, a lo inzam put mai a, thil lawmawm tak niin ka hria a. Hemi sorkar thar hmalakna a lo nih phei chuan lawmthu ka han sawi ni mai sela, a lawmawm hlein ka hria. Chuvang chuan hetiang lampangah hian hmasawna thil kan hmu zelin ka ring. Harsatna power lamin kan tawh avangin ZEDA lampangin Solar system lampang kha a introduce a, thingtlang lamin kan tangkaipui em em laiin 2009 sorkar thar lo pian khan solar supply lo tihtawp te kha pawl kan ti khawp mai a. Hengte hi thingtlang power tawm thei zan lo hote'n cheng sangnga lek leka power tha tak mai, eng an lo neih mai theihna tur kha kan sorkar thar pawh hian min ngaih pawimawh sak thei hram se tih ka duh a, chungte pawh chu ka han tarlang duh bawka ni.

Tin, supply chungchangah hei, tunah harsatna thawm lutuk phei chu kan hre lova, amaherawhchu, fur te kan la hmabak a ni chauh a, chuvang chuan thingtlang lampangah hian sorkar hian buhfai thiar hi chak zawka hma min lak sak ka duh a. Ka hriat thenkhatah chuan Store Keeper hian Carrying Contractor ni si lo, tute contractor hming ten emaw Buhfai te an lo phur ve tawp a, an ni chu a receive-tute an nih avangin harsatna an tawk lem lo, Carrying Contractor tam tak hian phurh turte an lo neih loh laiin Store Keeper thenkhatten an lo phur tam a, tin Buhfai hi special permit kan tih hi ₹ 500 a an lei theih laiin black chuan cheng sangkhat ten an lo zuar thei bawka a. Chutiang chuan thingtlang lamah hian Store Keeper then then hian Buhfai hi mipuiin special quota kan dil theih loh laiin anni chuan khawi khawiah emaw an lo hralh ru thin tih hriat a ni a, pawl ka ti hle a. Helam pangah hian kan thuneituten beng min chhit sak pawh ka duh hle a, ka han tarlang duh a ni.

Hospital lamah hian kan kal zing em em mai a, hei kan hotute min lo hriatpui atan Hospitalah hian damlote avangin zanah te, chhunah te ka kal fo mai a, Ward lian pui pui maiah zanah te hian Nurse pakhat lek lek emaw te an awm thin hi a aia tam zawk ward tinah hian a indah theih lawm ni? tihte pawh thahnemngaih thua ka han sawi ri duh a. Contract basis hian Nurse tamtak lak an ni a, an rim ve em em thova, an contract basis hlawh te hi tihpun theih dan a awm em? tin hengte hi kum tam tak an lo thawh tawh chuan regularised theih dante a awm em? tihte pawh ka han sawi kai tel duh bawka ni.

Pu Speaker, tum loh huna sawi chu rin aiin a point lak fuh a lo har bawk a, tichin kha ka sawi theih tawk ni mai sela. Ka lawm e.

SPEAKER : I point a tha lutuk, Kawlchaw i sawiah pawh Tuipui thlang lamah pawh chhak lamah pawh kawngpui lianpui pahnih kha a phei tur a ni ringawt mai Burma chhunin. Pu T.T. Zothansanga

Pu T.T. ZOTHANSANGA : Pu Speaker, ka lawm e. Hei kan BAC in a rawn tihdan kha hun dang ang kha a ni a, Inrinni leh Pathianni chauh inbuatsaihna hun a awm a, heilalah chhiat tawk leh engemaw deuhthe an lo awm anih phei chuan inbuatsaihna nei lek lovin kan lo awm thei reng a lo ni a. Hmun dang ang hian theih chu ni sela Inrinni leh Pathiani bakah hian ni 3 vel tal hi chu kan budget han thlir lawkna hun hi chu nei ila, tha ka ti khawp mai a. Ka thiante pawh hi sawi an chaklo a ni lova, thihna leh engemaw harsatna hrang hrangin an tum angin inbuatsaihna hun a pe lova, chumi avang chuan naktuk lama sawi turin an lo inbuatsaih deuh vek mai a lo ni a, keimah ang thoin, chu chu ka sawi duh a. Kan hun kal zelah kan BAC-te khan a theih hram chuan inbuatsaihna hun chung kha rei deuh turin ruahmanna kha lo siam thei tawh selang, tichuan kan hun pawh hi a ngaihnam deuh turah ngaihna ka nei a. Kan chak loh vang nilovin leh kan phur loh vang nilovin naktuka sawi turin kan lo inbuatsaih vek a, kan thiante ho pawh hi khami avanga han ding mai lo kha an ni a. Chu chu a hmasain ka sawi duh a.

SPEAKER : Chuti chu kan bang hma ang a, naktuka sawiah kan khek tawh mai dawn em ni? House thu thu a lawm.

PU T.T. ZOTHANSANGA : Nia, awl pawh awl tak tawh tur a ni, document pawh ka rawn keng mumal lova, mahse min pawt zip tawh dawn mai si a, ka han ding chu a ni leh ta mai a. Engpawh nise Pu Speaker, lawmawm ka tih deuh mai chu kan Finance Minister-in a vawikhatna atan Budget tha deuh mai a rawn siam chhuak hi lawmawm ka ti a, hei kum 2020 hi India ram hian khawvela ram ropui ber pathumte zinga pakhat ni tura kan inbuatsaihna a ni a. Tahchuan kan ram population kan tamnate leh kan economy thatnate hmang hianin khawvelah hian kan chungnun zia lan tir kan tum a ni a. Chumi kan chungnungzia lantir theihna tur chuan tuna kan Central-a kan Sorkar chak tak hian hma a la a, chu a hmalakna kawngah chuan hun tam taka Finance Commission-te chu lo awm thin tawh mahsela tuna 13th Finance Commission hian chumi tinzawn ran chung chuan kan hun kal tawh a kan lo tihsualte leh kan lo hmailpalh thil tam takte hrut telin tunah hian ruahmanna tam tak a rawn siam a. Chumi bawhzui chuan kan budget-te pawh hi rawn siam a ni a, hun kalta te kan han thlir a, hei a rawn tarlan ang hian kum thum kalta khan khawvel hian economic lamah harsatna a tawk a ni.

Keini Sorkar hi kan vanneiin kan vanduai angreng khawp mai a, kan vanneih em emna chu MLA 32 zet mai Assembly-ah kan han inhunglut thei a, miten kan chungah rinna nasa tak an ngat a, Pathianin Mizoramah rorel a tum a, hmanruaah Congress a hmang a ni kan ti a, chu chu kan vanneihna a ni a, kawng leh lamah kan vanneihlohna lai tak erawhchu world re-session, khawvel economic

tlakhniam rup lain lalna kan han chang chho a. Khalaiah khan kan budget pawh a sang hleitheilo lai tak kha, mipui hian an hrethiamlo ang tih ka hlau khawp mai a.

Kum 1998 khan kan Finance Minister zahawm tak Pu Lalsangzuala khan a sawi ka la hre reng a, hei kum 1998-ah kan han inthlang leh dawn chu a ni a, kan hmalamah pawisa hi a luanin a rawn luanglut hum hum mai dawn a ni a. Tahchuan kan chakloh teh chuan aw, kan hnung amite chuan min va han tichhe nasa tak dawn em a ti a. Tichuan kan han chak ta lo ngei a, vanneihthlak takin MNF party ten lalna an han chang ta a, an mahni tana vanneihnain, Mizoramah kan Chief Minister hmasain a sawi angin malsawm periodah kan awm atih kha a dik chiah a ni. Sum kha a tam khawp mai a, an rinloh lam atang pawh khan a putin a rawn put ta zung zung mai a ni. Khatih lai khan MLA Fund te pawh kha nuai 5 lek leka tihsan kha chu a hniam lutuk zawk a ni. Tunah hian a dik tak chuan khawvel economy a tlachhia a, a recovery turah kan in sangmar chho leh mek a ni a, he kan insanmar chhohnaah hian kan recover kim rih silova, chumi avang chuan hetia a ngai renga kan han awm pawh hi a awm ve tlat a ni. A chhan chu 13th Finance Commission hian State tinte hi mahni kawng kalin in lo kal nawk nawk a, ruahmannate pawh in rawn nei a, engemaw chen kan lo tihhlawhtlin sak tawh thin che u a, tun atang chuan hetiang zawng hian i kal tawh ang u, tiin guideline fel tak a rawn nei a, chu an guideline atang chuan vaibelchhe 3400 chuang kan han batte pawh hi tlem tlema nuai ral zeuh zeuh hi kan tum chho dawn a, chuvang chuan keimahniin hetia Chhura buhmun thlira kan en a, “a tha mang e” kan tih ang chi ringawt kha a dik thei tawh lo a ni. Kha kha kan rilruah awm se a thain ka ring a.

Tunah hian recovery zawngin kan kal chho dawn a ni a, a formula hi a dik phawt tur a ni. Chu a formula dik tura kan inbuatsaihna a transitional period-ah chuan kan awm a, kan tum angin a sang thei chiahlo a ni. Amaherawhchu hma chu kan sawn zel tih kha mipuiin min lo hriatsak ka duh khawp mai a. Tuna kan leibat tam takte pawh hi kan improve chho mek zel dawn a ni a, kum 2020ah kan tu leh kan fate hemi khawvelah hlim leh lawm taka an nun theih nan kan vawiinah hian tawrh pawh a tul anih chuan kan tuar mai tur a ni tih hi hriain, Budget huaisen tak tak hi kan hotuten an rawn pharh thin a ni a.

World economy kan hria a, India ram economy kan hria a, Mizoram economy-ah pawh tax thawkchhuaklo ram kan nihzia te pawh kan hria a, khalai dinhmun han thlir vang vang khan kan budget hi a awm thlawt a ni tih kha ka sawi duh a ni. Chutih ruala ka sawi tel leh hram duh chu hei, Assembly kan han nei deuh zauh zauh ta a, keini junior tein bul kan han tan a, kan han zir kan han zir chho a, kum kalta hoah khan enganginnye an lo tih chiah ka hre lova, kan bill leh helai kan Minister-ten an rawn pharh a diklo lutuk hi chu ka hrethiam thei mang lo a ni kei chu. Kan official-te hi ram hmangaihtu te vek an ni. Politician-te hi ram hmangaihtu bikah min puh suh u, kan ram economic a that nan-te leh kan ram ram nuama siam tur hian Mizorama kan officer zawng zawngte nen hian fifty fifty ang deuhah in ngai ta ila, chuvang chuan sorkar official-te hi tang leh zual turin ka beisei a ni. Kan dan siam tamtakte hi chu vetted tawh a ni kan ti deuh zel lehngal a, vetted awmzia chu tualzawlah pawh thlah tawh ila a thlahngam tawh ang kan tih ang chi te kha a ni deuh zel a, khatianga kan Law Department-in a vetted tawh hnu nisi printing mistake te, a tum nilo khatianga rawn lang thin han awmzel te khan he kan Assembly hi a tizahawm lova, Zoram mipui hmaah hian kan Minister-te hi a dik tak chuan a tizahawmlo a ni. Chu chu a diktak chuan kan Minister-te lawng lawng an ni lova,

Minister-te hi a fel ber leh thaber thlante kan ni lo, amaherawhchu mawh an phur a, tah chuan an enpui ngei tur chu a ni. Chutihruah chuan hetah a background-ah official thahnemngai leh mi chinchang hria tamtakte an awm, khatiang tena an Department an mualpho lohna tur leh an thatna tur leh a pumpuih Zoram mipuiin kan hlawk phahna tur leh kan thatpuina turin Dan kan siam a ni a, kha kan dan siam a pawr lutuk thin kha chu kan official-te kha tlem chuan lo inngaihtuah ngun se tih ka duh a, kan sawitel bawk a ni.

Tin, chutih rualin hei Assembly-ah kan session a, kan session lohlah hian Committee kan nei thin a, chu Assembly-a kan thu va thehluh PAC a ni emaw, Assurance a ni emaw thil tamtak Department-ah va thehluh a awm thin a, an lo ngaihpaawimawh dan chinah hian an lo ngaipawimawh lutuk lo anga lanna hi a awm thin a, kan officer tamtakte pawh hi ATI hian Assembly chungchangah hian training a pek lehzuah hi a tha angem aw tih hi ka ngaihtuahnaah a awm a ni. Chu chu ka sawi tel duh a, vawiinah hian ka inbuatsaih lo naa sawitur chu a tam hle mai a.

Hei tuna kan budget hi kan sorkar tirh atang khan mirethei lam hi chu kan han hawi deuh ngar ngar nain a tak takah chuan sorkar hnathawk hlawn hianin a majority hi a chang deuh zel a ni. Chuvang chuan hemi tax kan han tih chungchangah pawh hian Sorkar hnathawk hianin tlema contribution kan neih tam deuh dan pawh hi ngaihtuah a thain ka hria. Hei ram pawnah sorkar hna hi kum 14 ka thawk ve tawh a, ram pawnah chuan tax hi kan chhung deuh mawlh mawlh mai, Mizoram aia Tax chhung tlem hi kan awm lovin ka hria. Chuvang chuan kan service-na atanga kan tax chhunluhah pawh hian consultative committee-in nge tum ang tih ka hre lova, khatiang zawng pawh kha ngaihtuah ho ila, hei kan sorkar hmasa pawh khan a tak takah chuan tax kan chhunluh tam hi a tulin an hria a. Land Revenue-ah khan tax an rawn ti deuh hluai mai a, Mizoramah hi chuan harsatna pakhat awm chu rorel lamin an tih chu a lehlam ho hi chuan kan han oppose deuh ngawr ngawr lai hi a hrehawm lai tak a ni a. Ram tana tha turah chuan Opposition-te pawh hi i inpawthniam ve ang u, ka ti duh a ni vawiinah pawh hian.

Tin, hei sawitur a tam a hun a tlem si a, ka sawi tel leh duh hram chu Zawlaidi, ka bial chhung thil hi han sawitel hram ka duh a. Hei Zoramah hian kan thlai thar atanga kan lakluh tam theihna ber chu Zawlaidi hi a ni. Isreal fate a tak takah chuan Kanaan ram luh an chakna chhan ber kha chu Zawlaidi hi a ni ve bawk a nia, Grape rah tha mi, kan Chief Minister hmasa pawh khan a tuipei a, amaherawhchu harsatna tunah hian kan tawk nasa a, nikum chhung khan quintal 8000 vel Hnahlanah ringawt pawh khian an thar a, sanghnih vel chiah kha a tuih an chan thei a ni. Tunah hian a tak takah chuan chintawt tih hi ka thiam vak lo a, kan ramah hian kohhran leh YMA ngaihdan lo zawnga thil han sawi hi a hrehawm khawp mai a, hetia kan rama kan Synod hotuten Zawlaidi chu i ti rihlo ang u ti a, an han hnawl atang kha chuan mi tamtak phurna hi a ti reh tlat mai a ni.

A tak ta ah chuan kan sorkar hian Shimla Company pakhat te nen khan mumal taka la indawr turin, khutah Sihmuiah pawh a hmunpui la siam tura ruahhmanna lian tak kan neih mek lai hian, theihtawpin mipuite pawh ti turin kan ti a, NLUP ah pawh thlang rawh u, a thei theiin thlang rawh u, a hralhna lamah chuan sorkarin mawh kan phur ang kan ti a, amaherawh chu thil reng reng hi puitling thut thei a ni lo a, khami a puitlin hma si khan eng emaw chin khilayah winery angte leh local angte pawhin an lo tihchhuah a tul a, khatih lai karah kan ram, nia ka sawi thiam

chiahlo a, kan upa rual i ti mai ang, zu in ngai lem lo rualte khan thuthmun atanga an lo phar ringawt avang khan mi tam tak kaihza hi a ti dul tlat mai a, hei hi ka vei khawp a. Ka rilru ang takah phei hi chuan kohhranah hian “in duh dan ang tak hirawn sawi ula, sacrament-ah te pawh hian kanrawn supply thei ang che u” tihte pawh hi a chak awm ka ti a. Keimahni leh keimahni kan inhlut pui a nih loh chuan kan ram economy hi a dingchhuak dawnlo reng reng. Kan grape chingtute kaihza tidul zawnga ro kan rel kan rel hi hlauhawm ve tak a ni. Tichuan sorkar pawh hian kan kohhrante pawh kha ti ti puina nei sela, heta rorelnaa kan chhawp chhuah hma si kha chuanin, a vir tur kha chu kan awm ve mai tur a ni. Khatiang khan kan ramah hian grape a ni emaw, thil dang dang pawh ni sela, khatiang sorkarin a inbuatsaihna remchang leh kohhran lo inrawlhna chiah kha chuan sawiho hi a tha berin ka hria. Khatia kan sawiho mangloh avanga kilkhata ro an lo relna avanga mi tam tak tuina tireh thei ang chi hi pawi ka ti a, churang chuan kan rama grape avanga dinchhuah kan tumna kan Chief Minister hmasa pawhin alo tui tawh na kha kei chuan ka la pawm reng a. Ti tak takin, sorkar hian tui tak tak ila, keini hian an thar chhuah kan dehral sak zel theih chuan he kan ram tax pawh hi a tam ngei ngei ang tih ka beisei tlat a, chu chu duhthawh deuh takin ka sawi a.

Tin, Pu Speaker chutih rual chuan LPG te, Petrol te, Diesel te kan han tisanga a awm ka tih rualin, petrol hi tlemin a luxury deuh hlek avang hian petrol-te hi chu sang deuh bik mahse pawi ka tilo a ni. Diesel-te chu sang nep deuh se, petrol hi sang deuh hlek mahse pawi ka tilova. Tin, chutih rualin Mizoramah hian Building tax te, Wealth tax te hi kan la tilo niin ka hria a, hetiangte pawh hi a building nei ang chi ah te pawh hian inkhawn hi a thain ka hria. A chhan chu Zoramah hian Mirethei kan thahnem lutuk, miretheite hian building neite zar hi an zo ve a ngai a ni. Chutiang zawng chuan kan rilru leh kan ngaihtuahna te pawh hi seng ila, kan hun kalzel turah vairam pawhin an lo tih hi kan lo tih ve hian Opposition vanga indo mai lovin, keimahni ram tan, kan tu leh fate tan, kan thisen zawmpuite tan a ni vek si a, a tax chawi zawng tlema kan insiamrem hi chu a ngaiin ka hria a, chu chu ka sawi tel duh bawka. LSC periodic pata kan tih han tihsan kan han tum ang chi te kha a tha tho nain a mipui nek lutuk lai hi chu dim ila, a mi hausa ho hi tlemin i nek na deuh ang u tih hi ka rilruah chuan an tel bawka a ni.

Dar lah chu an ri a, sawi kan phurlo sia, min pe deuh hlek teh. Helaiah pawh hian kan sum leh pai tihral hnem na ber hi chu food grains ah leh electricity-ah hian a ni a. Tunah hian kan dam anga Pathian zarah Central atang chuan ruah hmanna tha deuh an larawn siamchhuak dawn a, thla ruk chhung hian chu chu ka sawi pawp rih lo anga, tin, chutih rualin reiloteah kan Chief Minister hmasain a sawi kha thudik deuh pakhat a sawi a, kum 5 chhung hian thil hi a tih tak tak theih loh a ni tih kha a dik ka ti a, tunah hian Pathian zarah kan dam anga, kan power pawh hi kum 10 mipuiin chance min pe anih chuan kan dekchhuak hman ngei ngei ang. Chutah erawh chuan Zorama power atanga kan sum chhuak zawng zawng leh kan buhfai intodelh lohna zawng zawng pawh hi hei hian a tum ngei ngei ang tih hi ka ring tlat a, chu chu ka sawi tel hram duh a.

A bu ka lo keng lova a, ka tick nasat teh lul nen! Kan leibatte kha kan sawi deuh thuk thuk bawka a, hei Sports Stadium-te kan han ti a, tunhma kha chuan lehkha zir lo kha chu ei hmulo turah te an ngai thin a, tunah chuan sports atangte pawhin mi tam takin eizawna an hmu tawh a,

chumi remchang tak tur chuan Rajiv Gandhi Sports Stadium kan han ti chho zel turte leh hmun dang danga ruahmanna kan sports department-in an neite pawh hi ropui ka ti a. Tin, chutihrualin ka sawi leh duh chu Pu Speaker, No. 57-naah 'This Ministry always accords priority on the welfare of below poverty line' a tih hi, heta mirethei dinchhuah ngaihna hre tawh lo rethei ngawih ngawih ang chi kha he kan sorkar hian a ngaihtuah ber a ni. Chulai karah chuan theihtawp kan chhuah anga mirethei tam tak hi engtiklai mahin kan dingchhuak vek tak tak dawn lo. Amaherawhchu, tam takin khaw eng an lo hmuh nan leh hun nuam tak an lo hman ve theih nan khan kan sorkar hian hma a la chho mek zel a ni tih kha min hriatthiam kan duh bawk a.

A tawp berah chuan Central chawmhlawm hi kan ni kumkhua thei dawn lova, engtik hunah emaw chuan State dang ang hian kan thang anga he kan ram atanga kan resource atanga keimahni intumchawpa nasa taka hmasawn tumna kan neih hun hi a thleng dawn a chumi tur chuan a local a ni emaw, a state level a ni emaw thalaite rilruah chi tha kan tuh a ngai a, chumi chi tha tuh tur chuan hemi Assembly-a kan rorelnaah ruling kan ni emaw opposition kan ni emaw kan tum leh kan target ber chu mipuite tan a ni tih hria a inhnial buaina athlak leh engemaw mai maia inkah fak fakna hi awm lo thei se ka duh a, chu chu hun chep tak karah ka sawi a ni. Budget hi a tha a, ka pawmpui a ni. Ka lawm e.

SPEAKER : A lawmawm e, Pu T.T. Zothansanga a khat tha a, a thusawi pawh ngaihtlak a nuam khawp mai. Tunge han sawi leh dawn le. Pu R.L. Pianmawia, Pu Piana pawh ngaihnawm deuha sawi thiam chi a nia.

PU R.L. PIANMAWIA : Pu Speaker, ka lawm e. A hmasain hemi Demand for Grant tih bu phek 303 leh phek 304 a, a line tawp bera budget estimates, a chung tlar phei si ah khan a kum zat in dah ve lo hi a dangah hian a indah vek si a, hei hi a kum zat awm lo hian hei hi a ni ta emaw ni tih kha ka ngaihtuah a ka en thiam loh vang nge ni ka hre chiah lova. Budget awm zel tur kha a huam tawp mai dawn ami tih kha ngaihtuahnaah a awm thei a, chuvangin khalai kha ka sawi hmasa duh a.

Le hei, Budget Session-te kan han nei leh thei ta mai a, budget puitling sawi turin kan inpharh chho mek a ni a, a lawmawm a, helaiah hian sum leh paia kan dinhmunte thlir chung budget tha tak mai kan Finance Minister-in a rawn pharh hi a lawmawm ka ti a. Amaherawhchu, sum leh pai thawhchhuah kan neih loh em avang hian a awmsa atanga tihtlem dan han rawt duh ka nei a. Hei Budget Bu kan han en a, a hmanralna tur lamah hian training tih vel hi a tam em em mai a. Sum leh pai hi a ral hnem em em mai a training tih lamah hian. Training hi department thenkhatah te phei hi chuan an ti hluar lutuk a, a tak tak nilova training-na sum lam hi a tam tawh khawp hian ka hre mai a, kan hmuh phak chinah pawh hian. Chuvangchuan, department hrang hranga training-na tur sum kan tih hi a khaikhawm zawng deuha tum khata tha sen anih theih dan hi awm ta sela. Hei hi sual thawina atana hmanraw tha tak a nih theihna niin ka hria a. Chuvangin, hei hi training-na tur atana sum kan senral thin hi enchan deuh a thain ka hria.

Tin, department anga an dinhmun kan budget-a a lan danah tihmasawn tul ve a ka lo ngaih leh kan ram thuvawn pawhina a kawh em em mai department bik a awmin ka hria a. Hei hi Weight & Measures a ni a. Hei hi kan budget-ah khan a lang thalo riauin ka hre mai a. Hei hi kan tih that chuan kan Oil hman zawng zawng check-tu an ni a. An check that khan kan Motor a tlo dawn a, sum tam tak min hailuh saktu an nihna lai a awm a ni. Tin, Gas-ah te thil dang zawng zawngah, kan Retailer-te emaw kan Godown-te emaw buk diklo laka min chhantu, min vengtu pawimawh tak an ni a. An department hi tuna an kal danah hi chuan mi zakhnuaiyah an inzep ve kek niin a lang a. An hnathawh erawh chu mipuiin kan chhawr viau lawi si a, an tangkai si a. Chuvangchuan, anni hi tun dinhmun aia hmasawn zawnga mipui tana tangkai tur zawnga ke pen tir theih an niin ka hria a. Tin kan khawvel hun kalchhoh mek zelah hian an ni hi an kal chak chuan a zar zo tur a te ber atanga a lian ber thlengin kan ni tih kha ka sawilang tel duh a.

Tin, Vety Department-ah hian an budget-a a landanah hi chuan hmasawna ka bial tana kan lo beisei venaah bang a ti bo khawp mai a. Bial tan hian kan lo beisei ve thin a, Manipur lam atangin ran tam tak an lo la lut si a. New Vervekah sawn check gate min dah sak ve rawh u, Champhai lam ringawt emaw in tih hi a diklo a nia kan ti thin a. Pawisa awm lo ti a tun thlenga la tih theih loh a ni a. A then a lut thei a, a then a lut thei lova. Chuvangin, budget kan han en khan a tih theih loh ti a min chhanna tur chu a ni tih a lang reng mai a. Chuvangin, mipuite hriat lar hmarthimpui zangkawh bungbut hnan an tih kan ni bawk a, kan mamawh kan han sawite hi chu min han tih sak thei zat zat sela chuan a lawmawm hlein ka ring a. Sakawrdaihte pawh rana eizawngtu tam tak an awm laiin 4th grade pakhat pawh awm theihna hmun a awm lo reng reng, department in hmalakna a neih lohna reng reng a ni a. Tin, Zohmunte a tawp lam han khaihawm tur ang chiahte pawh Rural Health Centre ang chite pawh kha han dah ve turin kan han dil thin a. Amaherawh chu, tuna a landanah kha chuan thu a tawp e lumam tih kha min chhanna tur anih mai hmel a, a beidawnthlak hlein ka hria a. Hma han lak ve theihna tur kawng engemaw tal kha chu an budget te pawh hi R.E te a awm leh ngai anih chuan tuna dah belh theih tawh loh anih pawhin lo hre ve deuh ta ila tih kha ka sawiduh a.

Tin, budget buah khan SDO(Civil) quarter sakna tur tih neuh neuh kha a awm ve a. Sakawrdai tih hming kha a lang ve reng reng lo mai a, an lo ziak hmai nge ni, tilai khi han tihchangtlun ve deuh a, hmun nuam vak anih loh nak alaiin quarter pawh awm mang lo, mi sira va riak ve mai mai tur ang chi kha chuan hnathawktu tan pawh awm hleih theih a ni lo va, awm tui hleih theih pawh a ni lo va. Chuvang chuan suamhmang puk awm tawk lek a in chhete a dah reng mai kha a tha lovin ka hria. Chuvangin hei pawh hi a awmdan, a hmun a zir te pawh hian chhantu dang nei bial lailum deuhah te hian chuan la ngak deuh ta se la, a hmawr fem deuhah te chuan tlema han intuitai hnum deuh te pawh hi ni thei se la chu a that kan ring a. Tin, SDPO te pawh kha kan han ti thin a, post kan dah thei hrih lova, mihring erawh chu kan dah a, a lawmawm hle a. Amaherawh chu post awm lova awm hi thutthleng nei lova in thut tir ang deuh a ni a, an nghet duh lo deuh a. Chuvang chuan khingte pawh khi kan sawi kan sawi tawh a, zawhnate pawh kan zawt tawh thin a, ala tih hleih theih loh reng mai a. Khingte pawh khi a tih theih dan tur kawng a hria an awm kha chuan min tih sak teh u tih kha ka ngen duh tawp mai a, tiang zawng chuan ka sawiduh a.

Tin, kan bialah khian Darlawn te, New Vervek te, Sakawrdai, Vaitin, Zohmunah te Police an awm ve a. Kan sorkar pawhin a ngaihsak a, duhthusam la ni lo mahsela. Amaherawh chu, tuntuma ngaihsak zual ngai em em mai chu Zohmuna BOP an tih khi. An inchung reng reng a far vek tawh a, Silpaulin-a khuh hul mai chi a ni tawh lo va. A department lam kan dawr lahin an sum ruahman kha ala awm thei mai dawn lo tih kha a ni leh a. Chuvang chuan khingte khi chu fur han tuar tir zel tur chuan kan la hman duh bawk si chuan an va khawngaih thlak tak em ve aw tih kha rilruah a awm a. Kan R.D. Minister hi chuan an inchung tur daih rangva te hi chu pek dan tur a ngaihtuah thei mai lo em ni aw tihte kha rilruah a awm a. Fur ruahtui han tuar tir tur kha chuan a hmutu leh hretu tan chuan an khawngaih thlak khawp mai a tih ka'n sawilang ve duh a. MLA fund-te pawh hi a tha viau a, amaherawh chu khaw 24 enkawl nan chuan a pun belh hle anih loh chuan a har khawp mai tih kha ka sawi duh a. Chuvangin tihpun deuh ni ta sela, a lo awmsa, hman atanga lo luahtawh khaw 24 kha chu, tuna kan neihsa hian chuan han enkawl that leh an duh ang tawka han sem zai pawh a har khawp mai, tih kha ka'n sawi duh a.

Tin, Social Education pawisa hi R.D atangin alo kal thin a, tuntumah pawh nuai zathum a han awm leh a, hengte hi a let hian la pung leh thei sela a tha mange aw ka ti a, a chhan chu thingtlang khaw te ber thleng pawha hall te, field te, zunin te thleng pawhin tih theihna hmanrua pawimawh tak anih avangin tun ai chuan tam thei sela. An han ngaihtuah hian department-ho hian ngaihpawimawh tam tak an nei thin a, amaherawhchu, an han thlitfim tak takah hian a sum a tlem avang hian a daih tura an duh ang pawh kha a daih thei bawk si lova, mipui mamawhte phei chu a daih lo nasa tih a Chiang a. Chuvang chuan Social Education bikah hi chuan sum leh pai tam zawk hi awm thei sela chuan a duh awm hle mai tih kha ka sawi duh a.

Tin, thingtlang mite a bik takin an harsatnate kan hria a, sorkar ang pawhin theihtawp kan chhuah a ni tih hre tho chungin, zirtirtu bik hi khawvel awm chhunga harsatna awm thei tawh tur ang hiala ngaihtuahna ka nei rum rum a. A chhan chu Mauchar, Zokhawthiang kan tih angah te, zirtirtu tur a khaw mi kan dah thei si lova, Aizawl atangin kan lak thar chhun te pawh kan dah a. A khawchhung mite, heng tal te hi chu tih tlin dan a awm thei mai lawm ni kan han tih lahin, an lo thiam lo a ni teh chek ang chu an tling thei bawk si lova. Aizawl lam atangin kan han dah a, insawn an dil leh a. Khati reng reng khan fixed pay hlawh ringte khan sikulte kha an han kaihruai mai mai kha a ni a. Chuvang chuan, tun atang hi chuan sorkar hian ngaihtuah thei nisela chuan, a khaw neitute zel matric pass chin annih chuan matric pass chin an awm chuan a khaw neitute kha lak tawp maina dante ngaihtuah thei sela, chuti lova competition ang zawnga kan kal anih chuan thingtlanga kan zirna pawh hian awmzia a neilo tulh tulh dawn ni te pawn a lang a. Chuvang chuan a khaw neitute ngei hi lak ngei ngei theih dan, an qualification bituk chin a awm anih pawhin, khatiang ang kha an awm thei em tihte kha en ila. Congress kan sorkar hmasak khan, a khaw neitu a theih loh pawhin a hnaivai ber tih kha kan kalpui dan a ni a. Khang khan min fun famkim dawn viau emaw kan ti a, amaherawhchu, tunah hian a famkim leh tawh lo deuh hlek a, khatiang ang khan a khaw neitute zel kha kan dah thei anih chuan hei hian kawngro nasa takin ala su dawn a ni tih leh kan problem tam tak pawh hi a kiam dawn a ni tih ka'n sawi duh a. Tin, transfer dil a

buai, sawipuitu tih fo pawh hi an tlem phah dawn a ni, tih kha thil chiang sa niin ka hria a (Speaker : minute hnih ila nei) aw a lawmawm e.

Kan Higher School chungchangah kan bial khi an fel angreng a, an bengvar angreng a, an taima hlawm bawk a, a head quarter ber mai Sakawrdai ami khi a dinhmun hniam ber maiah ala awm a, khangte pawh kha anni lo inngaihtuah venaah chuan, Chhinlung development head quarter a ni si a, a hniam bera awm mai kha a diklo an ti em em mai a. Naupang an thahnem si a, building-te sakna turte ruahman a ni bawk si a, chuvangin khi khi tih theih dan, a rualpawl tawk velah tal chuan hlankai dan ngaihtuah chu a va tul ve mawle tih ka'n sawilang tel duh a.

Tin, a tawp berah chuan Sinlung Development Council Hqrs. biala awm kan ni a, hei an budget hi nuai 250 a ni a, Sinlung Council area huamchhunga miten an chhawr tangkai chho viau zel a, hemiah hian tangkaipuitu an tam tulh tulh nan sum leh pai lo tlahniam tawh nen, a hlutna lo tla hniam tawh nen tihtam chhoh dan awm thei sela chuan tun ai hian a chhawrtute tan pawh a manhla lehzual awm mang e aw tih kha rilruah a awm bawk a. Chutiang chuan, a hman dan chungchangah sawisel kan kai pawh a ni thei, amaherawhchu, puitling zawka kaihhruaina min pe theitu sorkar kan nei a, chuvang chuan, pangchang takin chulai thute pawh chu ka sawi a nih chu. Kan budget tha ka ti a, ka lawm e.

SPEAKER : Tunah Pu Lalrinmawia Ralte i lo ko leh ang.

PU LALRINMAWIA RALTE : Pu Speaker, kum 2011-12 Mizoram State budget chungchanga kan Finance Minister zahawmtak thusawi sawiho chungchangah sawi ve theia hun min pek avangin ka lawm e. Thunawi han sawi ila, kan Session hi proceedings hi thingtlang lam atang ten an lo thlir a, mipuiin an sawi pakhat chu a awm viauin ka hria a. "Saptawng hman in va'n uar em em," an tia. Pu Speaker, he House kaltlanga thlirtute pawhin an lo hriat atana ka duh chu saptawng intihthiam vang pawh a ni lova, a loh theih lova engemaw ni han tih tur hi a tam em em mai a, mipuite hian an hriatthiam a ngaiin ka hria a, saptawng tel lova sawi theih mang loh ang chi hi budgetah phei chuan a tam avang hian chu chu hriat ve hrim hrim atan a tha awm mang e ka ti a. A pumpui thua han thlirin nichina kan Member zahawmtak pakhat Pu T.T. Zothansanga rawn sawi ang khan chhiatni thatni thuin member-te min han thleng ve lo thei thin silova, duh angin a zirna hunte kan nei lova, han zir ngial pawh ni ila ngaihnam tak leh ropui taka sawi phei chu a theih pawh ka ring chuang lova. Chuti chung chungin inthlahrung hauh lovin han sawi ve ta ila.

He budget ka thlir ruala lo lang lian ta em em mai chu Mizoram hi kan rethei, chawmhlawm kan ni, leiba kan ngah, tih thu vel hian a mipui mimir hi min chiah hneh em em mai a ni. Opposition apiangin rulling sawisel nante kan hmang a. "Nausen piang hlim pawh hi cheng sang chuti zat bain a lo piang", tihte eng tin tin emaw hian kan sawi a. Hei hi mipuiten hrethiam ila ka duh em em a awm ve a, khawvel awm chung hian sorkar hi

leiba tel lovin a kal lovang tih hi rin tur a ni mai, tichuan, a chiang mai, chu chu a kalphung a ni ve hrim hrim a. Amaherawhchu, sorkar meuh pawh a thawhchhuah zawng zawng aia a leiba a tam miau chuan chhungkua kan inenkawlna ang tho hi a ni a, a tal buai dawn a ni tih hi. Independent sorkar ah pawh thudik a ni. Chuvangin leiba ngah luat tuk hi a tha lova, tihniau tura ngen kan ni a, tihniau tura thupek kan ni. Chuvangin he kan Finance Minister zahawmtak thusawia thil lo lang chiang em em mai chu kan State leiba ngah tia kan rum kan rum thin hi he kan Sorkar chak tak hnuaiiah hian a kum telin a hniam zawngin kan la kal chho zar zar a. Tunah pheii chuan Sorkar hmasa hun term 2-na chho vela kan sum dehchhuah zawng zawng za zela sawmkua leh tih te, za zela sawmriat tihte leiba kan neih thin lai khan tunah chuan kan leiba zawng zawng hi tun kan Sorkar kum hmanlaih pheii chuan kan sum dehchhuah za zela hmun sawmli leh pakua vel lekah a tlahniau dawn a ni tihte kan hmu a. Chumi chu tihniau tumin kan Minister zahawmtak hian kan sum pai enkawlna hi a rawn kalpui dawn a ni tih kan hmu a, hei hi lawmawm hle in ka hria a ni.

Leiba hi ram pawhin an buaipui a, khawvel ram tam ber pawhin an buaipui a ni. Khawvela ram hmasawn kan tih tak tak USA te kan ti a, hahipin kan sawi a, Japan te kan ti a hahipin kan sawi a, kan sawi nasat ho hi leibaa buai nasa an ni. Kumin kum tir takah khan entir nan USA Sorkarte chuan a ram sum deh chhuah zawng zawng GDP atanga teha zaa 99 leiba dinhmunah an thu a ni, zaa za chuanga dingte pawh an awm a ni. Chuvang chuan khawvel ram tam tak hi an buai em em a, tunhnai maiah Italy Sorkarte pawhin an budget atangin 30 Billion dollar an cut hniam a ni; chumi buan let nan chuan. Chutih lai chuan India ram hi kan sum pai din hmun hi a that em avang leh chumi chu entawna kal tura State min zirtirnae avangin a tha zawngin kan la kal zel a, chumi malsawmna chu kawng hrang hrangin kan hmu niin ka hria a. District Council-ah duat bikin Autonomous District Council-in kan awm a; rorelna kan hriat theih tirh Democracy-a Mizo fate kan zuan luh tirh atang khan. Kum 20 zet chutianga kan awm hnu chuan UT Sorkarah Central Sorkar zempui zen tawmin buai miah lovin kum 15 chung vel kan han tal leh a. Chuvang chuan thawh chhuah neih ve tih zawng zirtirna hi kan thinlungah hian a tla na lo em em zel mai a. Sorkar hian amaha pawisa nei teuh a kan ngen apiang min pe zel tur leh keini mipuite chu engmah tih ngai lova awm der der tura inzirtirna ang deuh ki hi kan la kalpui lian em em mai a ni. Hei hi a pawii a, nichina member thusawitu tam ber zawkin an rawn sawi ang khan hetiang zawng zela kan kal hi chuan kan ropui dawn lo a ni tih hriain kan Finance Minister zahawmtak hian a thusawi tawp lamah khan Mizoram mipuite hnenah thawh chhuah nei ve turin theihtawp chhuah turin Sorkar hmalaknate pawh pui turin a rawn sawm hi a ropui ka ti a. Hmun tam takah hian kan thawh chhuah ve tipung zawng te, kan leibate tihniau zawng ang chiin kan sorkar hi, he sorkar chaktak alo din tirh leh tun inkar maiah pawh hian chutianga zawnga hmasawna chu a awm a ni tih he a thusawiah hian, kum kaltate kan en letin a hmasawn zawnga kan kalna lawmawm tak kan hmu thei a, hei hi ropui ka ti hle a, fak loh theih niin ka hre lo a ni. Kum tharah hian cheng vaibelchhia hlir 7216 leh nuai 75 thawk chhuak tur angin Mizoram hi ngaih kan ni a, chutih lai chuan leiba vaibelchhe 3580 leh nuai 72 kan nei ang a, kum a tawp meuh chuan. Amaherawhchu, kan sum dehchhuah a tam ve tak tlat avangin kan leiba phurrit hi a zang em em tawh zawk dawn a ni.

Sorkar hmasa hun term hnihna lai vela za zela 90 leh tih lo phur taih taih thin khan he Financial Year tawp lamah hi chuan, sorkar kum tawp lamah hi chuan 49.62 % chauhah a tlathla dawn a ni. Tunah hian India ram pum pawh hi anihna takah chuan kan GDP leh kan leiba ratio hi 70% chunglam vel bawrah ala awm a ni. India ram pumpui dinhmun ai maha thaa he sum deh chhuah leh leiba inlaichinna kan han nei thei hi a lawmawm hlein ka hria a. Chutiange avang chu a niang kan state economy, kan sum dinhmun hi kumin kum chhungah hian 9.57% a thang tur a ni. Chu beiseina chu kan nei a ni tih kan Finance Minister zahawmtak hian a rawn sawi a. Hei hi India ram pum thanna tur 8.6 % aini a sang zawk daih a nih chu. 9.7 % a thang tura kan inngaih avangin. Chung avangte leh kan sum indaih lohna pumpui, kan sum dehchhuah za zela chhutin kan indaih lohna hi engzatnge tihte hi a hniam zawngin a kal thla ta raih raih a. Hei pawh hi sum enkawl thiamna atanga lo chhuak a ni tih a chiang em em a ni. A Budget speech pum pui hi a bul atanga a tawp thlang hian a tehfung pawimawh hraw pui pui khatiang atang khan khaikhawm ila, a tha zawngin a kal a, hetiang zela kan kal chuan kan hmalam hi a eng hle a ni tih alang theiin ka hria a ni.

Tin, kan sorkar flag ship programme NLUP chungchang pawh hian hmun pawh a awn thui viau a, hei hi mi thenkhat tan chuan ngaihthlak ninawm a ni maithei a. Amaherawhchu, keini thingtlang mite tan chuan rimawi ber a ni. Chuvangin Mizoram mipui 60 % dawn lai kut hnathawktu nitina inhlawh thin te tan kuminah hian cheng vaibelchhe 234 lai mai dah leh a ni tih han hriat hi thil ninawm niin ka ring lova. The Hindu chanchinbu 28th December, 2010 ah khan front page ah he thu hi alo lang a. National Crime Records Bureau-in kum 2009 kuma India rama tualthihhate chi hrang hranga zir chianna report lo chhuakah chuan he thil hi alo lang a ni. Kum 2009 chung ringawt khan India ramah hian kut hnathawktu, loneitu beidawng mi 17,368 an intihlum a ni. Kum 1997 atanga intihlum tawh zawng zawng phei chu 216,500 an ni, National Crime Records Bureau-in a tarlan dan a ni, hei hi. Chungte chuan chhantu an nei lova, an state sorkarin NLUP a nei ve si lova. An mamawh tur ang chi cheng sing tlem teah pawh Bank-ah kalin bank lamin a daih seng si lova. Chuvang chuan a pung sang tak taka puk tirtu, money lender kan tih ho hnenah an kal thin a. An leiba an rullh theih loh avangin an mangang a, an intihlum ta thin a ni. Kum 2009-ah ringawt pawh 17368 in an nunna an la a ni.

Khawvelah hian hmasawna a kal sang kan ti a, sum dehchhuah a pung kan ti a. Chutiang a nih mek lai chuan he sum dehchhuah lo pung leh hmasawna kan tih hi a chhawr bawktu an tlem si a. Chutiang a nih avang chuan sorkar hian kan hawi dan kan tihdanglam a ngai a ni, tih hi khawvel angah pawh, UNO level-ah pawh, UNDP te pawhin an buaipui em em a ni a. Chutianga kan kal loh chuan mi rethei ber an tap tlawk tlawk ang a, a tam ber zawk, a hausate an Hausa thur thur ang a, khawvel hmasawna hi a ke a bai dawn a ni, tih hi mithiamten an thlir dan a nih avangin michhe berte ngaihsak zawng Scheme leh Programme hi khawvelin a ngaisang a ni. Hman kum lawk, 2009 kumah khan French President, Nicholas Sarkozy-a ruahmannain Joseph Stiglitz-a te, Amartya Sen te, economics-a Nobel Prize dawngtu ten commission pakhat, "Commission on the Measurement of Economic & Social Progress" tih kha an din a. 'Stiglitz Report' tih kha a lo chhuak a ni. Khata an tarlan chian em em chu, hmasawna kan tih zawng zawng chi hi mi chhe berte dawm kang zawng hmasawna a nih loh chuan awmzia a nei lo, hei hi khawvelin kan buaipui dawn a ni tih hi chiang takin an report-ah khan an tarlang a ni. Chuvangin khawvel mithiam ber ber ten an vei chi kan sorkar hotuten an vei a.

Michhe berte dinhmun, vawiina Mizorama 60% vel lai ni si, kan sum dehchhuah zawng zawng zaa 19 pawh tling phak lo khawpa keini mi rethei, thingtlang mite min ngaihven a, kumin atan pawh vaibelchhe 234 zet mai min dah sak leh hi ropui ka ti a, lawmthu ka sawi a ni. Hetiang ang chi hi hun rei tak chhung kan hmu tawh lova. Congress sorkar hmasak chhung khan kan hmu a, thingtlang mite kan lawm khawp a. Mahse a reh leh ta vung vung a, vawiinah hian a rawn inlar thar leh a. Khawi atanga pawisa lo kal pawh nise, a eng package pawh nise, khawi atang pawn nise, mirethei ber, kut hnathawktute hnen a thleng hrim hrim hi ropui kan ti, thingtlang mi ten, tih hi ka sawi duh a ni. Bial lam chungchangah pawh hian harsatna tam tak kan nei thin a. Amaherawhchu, House-a sawi sen pawh hi a ni lova. Pawn lamah kan Minister zahawmtakte hnenah pawh kan han thlen thin a, kan la thlen zel bawk ang a, min ngaihthlak sak thin a, a lawmawm kan ti a, a tul apiang min tihsak bawk thin a. Vawiinah pheii chuan Mizoram pum huap tak tak, chhim tawp atanga hmar tawp, chhak tawp atanga thlang tawp thlengin khawpui mi pawh bang bik miah lova, mirethei apiang siam that tuma tihchangtlun tuma he hmasawna programme, kan Flagship programme ropui tak mai atana sum dah a'n ni hi lawmawm ka ti a ni. Pu Speaker, chung thu tlem te hmang chuan he kan Finance Minister zahawmtak Budget Speech hi tha ka tiin ka support-na thu ka'n sawi ve a ni e. Ka lawm e.

SPEAKER : In sawi thiam hle si a, sawi tur pawh in ngah hle si a, nichinah khan min timangang hman alawm mawle. Le, kan chawlh a lo hun leh ta reng mai a, dar 4 a lo ri ta a. Naktukah kan sawihona kan chhunzawm leh ang a, ni 19.7.2011 chawhma dar 10:30 ah kan chhunzawm leh dawn nia.

Sitting is adjourned at 4:00 P.M.